

KIKI NDOCHO CHUWO CHA  
MAVOYO GA UMWENGA

NA

KUSONGEZA SAKARAMENTI

KIDZA CHA

MAUTU MENGINE GA KANISA

HERE RIRIZHO ADA RA

KANISA RA UNGEREZA



[PORTIONS OF THE BOOK OF COMMON PRAYER, IN THE GIRIAMA  
LANGUAGE]

SOCIETY FOR PROMOTING CHRISTIAN KNOWLEDGE  
NORTHUMBERLAND AVENUE, W.C.

1912

## KARA-KARA YA KUVOYA KWA MADZACHA KWA KULA SIKU MWA-KA MUZIMA.

*Kuaha Kuvoya kwa Madzacha yuyahu Padiri nashome na mumiro mubomu kifungu kimwenga cha Chuwo cha Mulungu hedu zaidi, kahi za vivi virizho haha. Kidza anene gaga garigoorwa mbere za vifungu vivi.*

**M**UTU mui aurichaho uwi-we ariouhenda, akigahenda garigo kara-kara na hachi, undaritizha roho-re akale moyo. *Ezek. xviii. 27.*

Nagasema makosa gangu, kidza dambi zangu zi mbere zangu siku zosi. *Wira. li. 3.*

Fitsa usoo ukatsalola dambi zangu, ugahanguse mai gangu gosi. *Wira li. 9.*

Sadaka za Mulungu ni roho ririrovundzika: moyo uriovundzika na kukolwa, hewe Mulungu, kundauvudhya. *Wira li. 17.*

Tarurani myoyo yenu, sitarureni mavwalo genu, nanwi uyani kwa Bwana Mulungu wenu: kwa kukala iye una nema na mbazi, kana koro za haraka, una mbazi nyinji, naye ni kuuricha uryahu uwi. *Joeli ii. 13.*

Mbazi na mausizo ga dambi ni zha Bwana Mulungu wehu, kwa kukala fwakedyanya naye: kahusikirire mumiro wa Bwana Mulungu wehu, na kwenenda kahi za malagizo-ge arigogaika mbere zehu. *Dan. ix. 10.*

Hewe Bwana, nikanya, ela kwa hachi; si kwa koro, pore ukaniononga. *Jer. x. 24.*

Dzyuteni; kwa kukala utawali wa mulunguni udzasongera hehi. *Mat. iii. 2.*

Nindauka, nende kwa baba, nikamwambire, Baba, nidzakosa mbere za mulunguni, na mbere-zo uwe, siagirwe kaheri kuifwa mwanao. *Luka xv. 18, 19.*

Hewe Bwana, siangire kahi za maneno na musunyeo ; kwa kukala matsoni hako kakuna ariye moyo andiyekala muhachi.

*Wira cxliii. 2.*

Hukiamba kahuna dambi, hunadzikenga enye, na ujeri kaumo ndani mwehu ; hukizisema dambi zehu, iye ni mukuluhirwi naye una hachi, hata ahuusize dambi zehu, na kuhutsusa uwi wosi.

*1 Joh. i. 8, 9.*

**H**ENWI ndugu zangu muhendzwao zhomu, Maoro ganahuonyesa hatu hangine-hangine kuahikiza na kuzisema dambi zehu na uwi wehu wa kula mudhamba : hukatsazifitsa hedu kuzibinigiza mbere za uso wa Mulungu mwenye nguvu zosi, Babiyehu wa mulunguni ; ela huziseme kwa moyo wa kudzitsereza na kudzizanya, udziodzyuta na kusikira ; kwamba kwa udzo-we na mbazi-ze zisizogoma hupate kuusizwa. Naswi hungahoagirwa makati gosini kuziahikiza dambi zehu mbere za Mulungu kwa kudzitsereza ; fwaagirwe zhomu kuhenda vizho, makati hutungananaho na kuonana hamwenga kudza kumulazhira muvera kwa mbazi nyinji hurizohokera mikononi mwakwe, na kumulika here fwagirwezho zhomu, na kurisikira Neno-re ryeri, na kumuvoya viryahu humalazho, zha kuhufwaha mwiri na roho. Bai kwa utu uo, namuvoya na kumudhedheja, ninwi nyosini murio haha, mutuwane nami kwa myoyo myeri, na mimiro ya kudzitsereza, hudze husongerere kihi cha nema ya mulunguni, munene nyuma zangu ;

*Gaga ni maneno ga atu osi, ga kusema makosa, nago ganenwe ni atu osi nyuma-ze yuyahu Padiri, osi makale madzapiga mavwindi.*

**H**EWÉ Baba mwenye nguvu zosi na mbazi zosi ; Siswi hudzakosa, hudzaricha ngira-zo here ng'ondzi zirizoangamika. Hudzaituwa muno myazo na tamaa za myoyo yehu enye. Hudzakosa malagizo-go maeri. Hurigoagirwa ni kugahenda kahugahendere ; Hudzaga-henda husigoagirwa ni kugahenda ; Na matsiya kahuna

ndani mwehu. Ela uwe, Bwana, fwonere mbazi, siswi akia enye dambi. Hewe Mulungu, uausize ao mazi-semao dambi zao. Uaudzye madzyutao ; Here vilagane-zho urizhoagunulira anadamu kahi za Masihi Jesu Bwana wehu. Kidza, Baba mwenye mbazi zosi, kwa utu-we iye, Ufwadimire kukala hangu vivi rero na mwendo mudzo, wa hachi na ikili, Kwa kurilika Dzina-ro ryeri. *Haami.*

*Usiro ra dambi ; naro rinenwe ni Kasisi hakeye, akale uimire ; atu machere kupiga mavwindi.*

**M**MULUNGU mwenye nguvu zosi, Babe Bwana wehu Jesu Masihi, asiyehendza mwenye dambi afwe, ela unahendza auriche uwi-we akale moyo ; naye udzaapa wadimi Ahumikie, udzaalagiza kuagunulira na kuaambira atue madziodzyuta, ga ao kuusizwa dambi zao : Iye ni kausiza dambi osi madziodzyuta jeri, makuluhirao Uvoro-we udzo ueri hasiho kudzihendya. Kwa utu uo na humuvoye ahupe siswi kudzyuta kwa jeri, ahupe na Roho-re Mweri, mautu hugahendago vikara gamufwahire ; na siku zehu ziserezo zikale za kutsuka na ueri ; hata musindikizo hufike ha kufwahirwa-kwe kwa kare na kare ; kwa Jesu Masihi Bwana wehu.

*Haha, na haho gagomaho mavoyo gosi, atu maahikize, Haami.*

*Kidza Padiri napige mavwindi, anene Voyo ra Bwana na mumiro usikirikao ; atu nao makale madzapiga mavwindi, marinene hamwenga naye, makati gaga, na kula rinenwaho kahi za kazi ii ya kumuvoya Mulungu.*

**B**BABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela ufwokole

#### 4 KARA-KARA YA KUVOYA KWA MADZACHA

na mai : Kwa kukala utawali, na nguvu, na nguma, ni zhako uwe, Kare na kare. Haami.

*Kidza anene vivi,*

Hewe Bwana, gunula milomo yehu.

*Kuahika.* Na makanwa gehu gandanena nguma-yo.

*Kasisi.* Hewe Mulungu, ufwokole haraka.

*Kuahika.* Hewe Bwana, ufwavwize haraka.

*Makati gaga osini na maima, Kasisi nanene,*

Nguma na ikale kwa Baba, na kwa Mwana : na kwa Roho Mweri ;

*Kuahika.* Here virizhokala kwandza, na vikara : hata kare na kare ni vizho. Haami.

*Kasisi.* Mulikeni Bwana.

*Kuahika.* Dzina ra Bwana na rilikwe.

*Haho na ushomwe hedu uimbwe Wira uu (wa Zaburi) utuwao ; isihokala Siku bomu ya Ufufulo haho ndo wira ungene ulagizwaho ; kidza kula siku ya mwezi kumi na chenda ukatsashomwa haha, ela na ushomwe hamwenga na Zaburi here ro ada.*

#### VENITE, EXULTEMUS DOMINO.

Wira xcv.

**N**DZOONI, humwimbire Bwana : hufwahirwe zhomu kwa nguvu za wokolwi wehu.

Hudze mbere-ze na muvera : hufwahirwe ni iye kwa Maira.

Kwa kukala Bwana ni Mulungu mubomu : ni Mutawali mubomu dzulu za milungu yosi.

Madete gosi ga-tsi ga mukononi mwakwe : na virere zha mirima ni zhakwe nazho.

Bahari ni yakwe, nde ariyehenda : mikono-ye ikiumba-tsi furufu.

Ndzooni, huabudu, hudzizanye : hupige mavwindi mbere za Bwana Muumbi wehu.

Kwa kukala nde Mulungu wehu : naswi hu atu ahurisao, hu ng'ondzi za mukono-we.

#### KARA-KARA YA KUVOYA KWA MADZACHA 5

Rero baha mungasikira mumiro-we, sihendeni myoyo yenu myomu : here murizhohenda ko Meriba, here siku ya Masa ko nyika ;

Babizenu marihonijeza : makinimanya, makigaona mahendo gangu.

Myaka mirongo mine natsukirwa na kizhazi kiryahu, nikiamba : Ao ni atu makosao myoyoni mwao, nao kamazimanyire ngira zangu.

Ndo niriholaha kwa koro zangu : Kamandaangira rahani mwangu.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Haho ni kutuwa Zaburi na kara-kara-ye, here virizholagizwa. Kidza musindikizo wa kula Zaburi mwaka muzima, namusindikizo wa Benedictite, na Benedictus, na Magnificat, na Nunc Dimittis, na ganenwe maneno gaga,*

Nguma na ikale kwa Baba, na kwa Mwana : na kwa Roho Mweri ;

*Kuahika.* Here virizhokala kwandza, na vikara : hata kare na kare ni vizho. Haami.

*Haho na gashomwe-to na mumiro wa kusikirika Mashomo ga Kwandza, galaago Kilagane cha Kare, here virizholagizwa kahi za Kalendari, isihokala ni siku iriyolagizwa Mashomo garigotsagulwa. Iye ashomaye na aime adzierekeze dza viryahu andizhosikirwa-to ni atu osi mario haho. Kidza akigonya, na ushomwe hedu uimbwe Wira ufwao Te Deum Laudamus, kwa maneno ga Kigiryama, kula siku mwaka muzima.*

Gwira riri, Mbere za kula Mashomo yuyahu Padiri nanene, Hunaaha Muryango musiku, hedu Hunaaha Kifungu kisiku cha Muryango musiku wa Chuwo kisiku : *Kidza musindikizo wa kula Mashomo, nanene, Mashomo ga Kwandza hedu ga Hiri gadzagoma haha.*

## TE DEUM LAUDAMUS.

**H**UNAKULIKA, hewe Mulungu : hunakuahikiza uwe ndiwe Bwana.

Urumwengu wosi unakuabudu : Baba wa kare na kare.

Malaika osini manakulutira mimiro : Mulunguni na Nguvu zosi zirizo mumo.

Makerubi na Maserafi : kamaricha kunena,

Mweri, Mweri, Mweri : Bwana Mulungu wa Zheti ;

Mulunguni na-tsi zhedzere : Indzi ra Nguma-yo.

Manakulika Uwe : mudhia urio na nguma wa Ahumwa.

Manakulika Uwe : ungara udzo wa Ambirizi.

Manakulika Uwe : ritundu ryeri ra ao mario zhodherwa.

Kanisa ryeri ra urumwengu wosi : rinakuahikiza ;

Ndiwe Baba : wa Indzi risirogoma ;

Mwanao wa kuishimiwa : ariye mujeri, ariye hakeye ;

Naye Roho Mweri : nde Mwavwizi.

Uwe ndiwe Mutawali wa Nguma : hewe Masihi.

Uwe ndiwe Mwana wa kare na kare : wa Baba.

Uwe urihoahikiza kuaokola anadamu : kuikahalire yo ndani ya iye Musichana.

Uwe urihoudhima utsungu wa kifwa ; waagunulira Utawali wa Mulunguni osi mukuluhirao.

Uwe ukeresi mukono wa kurya wa Mulungu : kahi za Nguma ya Baba.

Hunakuluhira kwamba undakudza : ukale Mulamuli wehu.

Bai, hunakuvoya Uwe, fwavwize asunyeo : urioakombola kwa milatso-yo ya kima zhomu.

Uape matawale hamwenga na Aerio : kahi za nguma ya kare na kare.

Uaokole atuo, Bwana : uuhase ufwao.

Uatawale : uaanule kare na kare.

Kula siku idzayo : hunakulika Uwe ;

Na Dzina-ro hunarilika : kare na kare.

Ona-to, hewe Bwana : kuhurinda rero hukatsahenda dambi.

Ufwonere mbazi, Bwana : ufwoneré mbazi.

Mbazi-zo, Bwana, na zihufikire : dza viryahu hukukuluhirazho.

Nidzakukuluhira Uwe, Bwana : nikatsaangalala kare na kare.

*Hedu Wira uu,*

## BENEDICITE OMNIA OPERA.

**H**ENWI Kazi zosi za Bwana, mulazhireni Bwana muvera : mulikeni mumukunye kare na kare.

Henwi Malaika a Bwana, mulazhireni Bwana muvera : mulikeni, mumukunye kare na kare.

Henwi a Mulunguni, mulazhireni Bwana muvera : mulikeni, mumukunye kare na kare.

Henwi Madzi garigo dzulu, mulazhireni Bwana muvera : mulikeni, mumukunye kare na kare.

Henwi Nguvu zosi za Bwana, mulazhireni Bwana muvera : mulikeni, mumukunye kare na kare.

Henwi Dzuwa na Mwezi, mulazhireni Bwana muvera : mulikeni, mumukunye kare na kare.

Henwi Nyenyezi za Mulunguni, mulazhireni Bwana muvera : mulikeni, mumukunye kare na kare.

Henwi Mawawa na Manina, mulazhireni Bwana muvera : mulikeni, mumukunye kare na kare.

Henwi Peho za Mulungu, mulazhireni Bwana muvera : mulikeni, mumukunye kare na kare.

Henwi Moho na Teri, mulazhireni Bwana muvera : mulikeni, mumukunye kare na kare.

Henwi Mwaka na Kasikazi, mulazhireni Bwana muvera : mulikeni, mumukunye kare na kare.

Henwi Manina na Kucha kwa Mwaka, mulazhireni Bwana muvera : mulikeni, mumukunye kare na kare.

Henwi Peho na Kuzizima, mulazhireni Bwana muvera : mulikeni, mumukunye kare na kare.

Henwi Barafu na Thaluji, mulazhireni Bwana muvera : mulikeni, mumukunye kare na kare.

Henwi Usiku na Mutsana, mulazhireni Bwana muvera : mulikeni, mumukunye kare na kare.

Henwi Mulangaza na Kiza, mulazhireni Bwana muvera : mulikeni, mumukunye kare na kare.

Henwi Lumete na Maingu, mulazhireni Bwana muvera : mulikeni, mumukunye kare na kare.

Na-Tsi nayo imulazhire Bwana muvera : na imulike, imukunye kare na kare.

Henwi Mirima na Virima, mulazhireni Bwana muvera : mulikeni, mumukunye kare na kare.

Henwi Mimera yosi mitsi dzulu za-Tsi : mulazhireni Bwana muvera : mulikeni, mumukunye kare na kare.

Henwi Visima zha dzitso, mulazhireni Bwana muvera : mulikeni, mumukunye kare na kare.

Henwi Bahari na Madzi ga Mureto, mulazhireni Bwana muvera : mulikeni, mumukunye kare na kare.

Henwi Mingumi, na ninwi nyosini mukirao mo Madzini, mulazhireni Bwana muvera : mulikeni, mumukunye kare na kare.

Henwi Nyama osi mubururukao dzulu, mulazhireni Bwana muvera : mulikeni, mumukunye kare na kare.

Henwi Nyama osi a Tsakani, na Mifugo, mulazhireni Bwana muvera : mulikeni, mumukunye kare na kare.

Henwi Anadamu, mulazhireni Bwana muvera : mulikeni, mumukunye kare na kare.

Isiraeli naye namulazhire Bwana muvera : amulike, amukunye kare na kare.

Henwi Alombi a Bwana, mulazhireni Bwana muvera : mulikeni, mumukunye kare na kare.

Henwi Ahumiki a Bwana, mulazhireni Bwana muvera : mulikeni, mumukunye kare na kare.

Henwi Vivuri-vuri, Maroho ga Enye-Hachi, mulazhireni Bwana muvera : mulikeni, mumukunye kare na kare.

Henwi Atu aeri, a kudzitsereza myoyoni, mulazhireni Bwana muvera : mulikeni, mumukunye kare na kare.

Henwi Ananiya, na Azariya, na Misaeli, mulazhireni Bwana muvera : mulikeni, mumukunye kare na kare.

Nguma na ikale kwa Baba, na kwa Mwana : na kwa Roho Mweri ;

Here virizhikala kwandza, na vikara : hata kare na kare ni vizho. Haami.

*Haho na gashomwe vizho Mashomo ga Hiri, galaago Kilagane Kisha. Kidza Wira uu utuwao ; isihokala uu undakala kushomwa kahi za Muryango wa siku-ye, hedu kushomwa kahi za Injili (Uvoro-udzo) siku ya Mubaputizi Johane.*

## BENEDICTUS.

Mweri Luka i. 68.

**N**ALAZHIRWE muvera Bwana Mulungu wa Isiraeli : kwa kukala udzaalola atue, udzaahendera ukombolwi ;

Kidza udzafwanulira pembe ya wokolwi : kahi za nyumba ya Daudi muhumiki-we.

Here arizhonena kwa makanwa ga Ambirizie aeri : mariokala hangu kapindi ;

Hupate wokolwi kahi za adui ehui : na kahi za mikono ya osi mahutsukirirwao.

Kuaonera mbazi babizehu : na kukumbukira Malagano-ge maeri ;

Kilagane arichomulahira : babiyehu Ibrahimu ;

Kwamba undahupa : hukale hudzaokoka kahi za mikono ya adui ehui,

Kumuhumikira hasiho oga kwa ueri na hachi : mbere-ze siku zehu zosi.

Na uwe, muhoho, undaifwa Mwambirizi wa Ariye-dzulu-zhomu : kwani undamutongodhyera Bwana mbere za uso-we, kumuhendera-to ngira-ze ;

Kuapa atue kuumanya wokolwi : kwa kuusizwa dambi zao,

Kwa mbazi mbidzo za Mulungu wehu : kwa zizo Madzacha ga dzulu gandahudzirira ;

Kuang'aziza makeresio kizani na kahi za kivurivuri cha kifwa : na kuhulongoza magulu gehu kahi za ngira ya dheri.

Nguma na ikale kwa Baba na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Hedu Wira uu kahi za Zaburi.*

### JUBILATE DEO.

Wira c.

**M**MUTSANGIRENI Bwana, henwi-tsi zosi : muhukimikireni Bwana kwa kufwahirwa, ndzooni mbere-ze na kuimba.

Manyani kwamba Bwana nde Mulungu : nde ariyehumba, naswi hu akwe ; hu atue, hu ng'ondzi-ze ahurisao.

Angirani miviryani mwakwe na muvera, muhalani mwakwe na kulika : mulazhireni muvera, murihase Dzina-re.

Kwani Bwana nde mudzo, mbazi-ze ni za kare na kare : ujeri-we unenderera hata vizhazi zhosi.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Haho na riimbwe hedu rinenwe Kuluhiro ra Ahumwa ni yuyahu Padiri na aryahu atu, makale maimire.*

**N**AKULUHIRA kwa Mulungu Baba mwenye nguvu zosi, Muumbi wa dzulu na-tsi :

Na kwa Jesu Masihi Mwanawe wa hakeye, Bwana wehu, Ariyehenderwa mimba ni Roho Mweri, Akizhalwa ni Musichana Maryamu, Akisirinywa kahi za indzi ra Pontio Pilato, Akigozhwa, akifwa, akizikwa, Akitserera kuzimu ; Siku ya hahu akifufuka, akilaa nyufuni,

Achanuka, achangira mulunguni, Naye ukeresi mukono wa kurya wa Mulungu Baba mwenye nguvu zosi ; Ndo andihouya kudza kualamula atu mario moyo na mariofwa.

Nakuluhira kwa Roho Mweri ; na Kanisa Ryeri ra urumwengu wosi ; na Ungara wa Aeri ; na Usiro ra dambi ; na Kufufuka kwa mwiri, na Uzima wa kare na kare. Haami.

*Kidza, mavoyo gaga gatuwago haha, atu osi makale madzapiga mavwindi kwa kuhurira ; yuyahu Padiri kwandza nanene na mumiro mubomu,*

Bwana nakale hamwenga nanwi.

*Kuahika.* Nakale hamwenga na roho-ro nawe.

*Padiri.* Na huvoye.

Bwana, fwonere mbazi.

*Masihi, fwonere mbazi.*

Bwana, fwonere mbazi.

*Haho yuyahu Padiri, nao maimbao, na aryahu atu, na manene Voyo ra Bwana na mumiro mubomu.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela fwo-kole na mai. Haami.

*Haho Kasisi naime, anene,*

Hewe Bwana, ufwonyese mbazi-zo dzulu zehu.

*Kuahika.* Hupe wokolwio.

*Kasisi.* Hewe Bwana, mokole Mutawali.

*Kuahika.* Nawe husirikize kwa mbazi hukuvoyaho.

*Kasisi.* Avwike hachi Ahumikio.

*Kuahika.* Ahendye mafwahirwe atsagulwio.

*Kasisi.* Hewe Bwana, aokole atuo.

*Kuahika.* Uhase ufwao.

*Kasisi.* Hupe dheri siku zehu zosi, hewe Bwana.

*Kuahika.* Kwa kukala kakuna ahuheheraye, usihokala uwe, hewe Mulungu.

*Kasisi.* Hewe Mulungu, uhutsuse myoyo yehu ndani.

*Kuahika.* Nawe utsahuusira Roho-ro Mweri.

*Haho ndo kutuwa Mavoyo mahahu : ra kwandza ni ra Siku iryahu, ndo ririvolagizwa kahi za Ungara ; na ra hiri ndo ra kuvoyera Dheri ; na ra hahu ndo ra kuvoyera Nema za kukala-to. Nago Mavoyo mairi gago ga kusindikiza gatsagaluka kamare, ganenwe kula siku makati ga Kuvoya kwa Madzacha mwaka muzima, here gatuwanazho haha ; atu osi makale madzapiga mavwindi.*

#### VOYO RA HIRI, RA KUVOYERA DHERI.

**H**WE Mulungu, urehaye dheri na kuhendza masikirano, uzima wehu wa kare na kare ni kahi za kukumanya uwe, kukuhumikira uwe ndo ungwana udziotimira ; Huchinge siswi ahumikio hurio maguluni hako, kahi za mapigano gosi ga adui eh ; hata kwa kukuluhira sana urindzio, hukatsaogoha nguvu za mudui atungwaye, kwa wadimi wa Jesu Masihi Bwana wehu. *Haami.*

#### VOYO RA HAHU, RA KUVOYERA NEMA.

**H**WE Bwana, Babiyehu wa mulunguni, Mulungu mwenye nguvu zosi wa kare na kare, udziyehureha azima hata kuaha kwa siku ii ; Hurinde vi rero kwa nguvu-zo nyinji ; nawe fwadimire vi rero hukatsagwa dambini, hedu hukatsaangira zanini kwa neno ritungwaro rosi ; ela mahendo gehu gosi galongozwe kwa kutawalwa ni uwe, huhende siku zosi garigo ga hachi mbere-zo ; kwa Jesu Masihi Bwana wehu. *Haami.*

*Hatu haimbwaho haho na urefwe Wira.*

*Kidza haho na gashomwe Mavoyo gaga matsano gatuwanago, isihokala makati ishomwaho Litanja ; na makati gago, mavoyo gashomwago ni gago mairi ga kusindikiza tu, here gadzizhoikwa haha.*

#### VOYO RA KUMUVOYERA MUTAWALI.

**H**WE Bwana Babiyehu wa mulunguni, Mubomu, Mwadimi, Mutawali wa atawali, Bwana wa mabwana, utawalaye abomu hakeyo, nawe kuko uriko kihini mwako unaalola atu osi mario kahi za-tsi zosi ; Siswi hunakuvoya zhomu umulole kwa nema-yo Bwana wehu Dzumbe mudzo, Mutawali *GEORGE* ; umongezeze zhomu nema iryahu ya Roho-ro Mweri, hata akale siku zosi kugagwira mahendzo-go, na kwenda kahi za ngira-yo ; Mugere vigerwa-zho vinji zha mulunguni ; mupe kukala moyo siku nyinji kwa matsiya na ushaha ; mwadimire apate kuadhima aakire aduie osi ; kidza, uzima uu ukigoma, afikire kufwahirwa na vidzo visizhogoma ; kwa Jesu Masihi Bwana wehu. *Haami.*

#### VOYO RA KUAVOYERA ATU A MBARI YA UTAWALI.

**M**ULUNGU mwenye nguvu zosi, Sina ra udzo wosi, siswi hu maguluni hako, hunakuvoya umuhase mukaza Mutawali wehu, Bibi mudzo *Mary*, na *Alexandra* mame Mutawali, na *Edward Prince of Wales*, na mbari yosi ya Utawali : Uagere Roho-ro Mweri ; uape nema-yo ya mulunguni ; uaongezeze raha rosi ; uafishe hata utawaliao wa kare na kare ; kwa Jesu Masihi Bwana wehu. *Haami.*

#### VOYO RA KUAVOYERA MAPADIRI GA KANISANI NA ATU AO.

**M**ULUNGU mwenye nguvu zosi wa kare na kare, uwe hakeyo ndiwe uhendaye mivano mibomu ; Hunaavoyera Mabishopu gehu, na Matsundzao maroho ga atu, na mitunganano yosi ya atu mariopewa mait-sundze, kwamba uatserezere Roho ra nema-yo, ariye wa uzima ; kidza kwamba mapate kukufwahirwa jeri, uamwagire manina gasigogoma ga kuhasa-ko. Uhupe gaga, hewe Bwana, kwa utu wa ishima-ye Mwawwizi wehu, Muneneri wehu, Jesu Masihi. *Haami.*



## VOYO RA MWERI CHRYSOSTOM.

**M**MULUNGU mwenye nguvu zosi, udziyehugera nema makati gaga hukurehere uwe mavoyo gehu siswi hosini na moyo mumwenga; kidza unamba kwamba, airi hedu ahahu mandihotunganana hamwenga kwa Dzina-ro, undaapa mamalazho: Uhu-timize vikara, hewe Bwana, mautu hudzigogamala na kugavoya siswi ahumikio, mwero wa gandizhohu-fwaha; kwa kuhupa kuumanya ujerio kahi za uru-mwengu uu, na uzima wa kare na kare kahi za uru-mwengu udzao. *Haami.*

2 *Akor.* xiii. 14.

**N**EMA ya Bwana wehu Jesu Masihi, na mahendzo ga Mulungu, na ungara wa Roho Mweri, vikale hamwenga naswi hosini hata kare na kare. *Haami.*

*Kara-kara ya Kuvoya kwa Madzacha kwa kula siku mwaka muzima idzagoma haha.*

## KARA-KARA YA KUVOYA KWA DZILONI KWA KULA SIKU MWAKA MUZIMA.

*Kuaha Kuvoya kwa Dziloni yuyahu Padiri nashome na mumiro mubomu kifungu kimwenga cha Churwo cha Mulungu hedu zaidi, kahi za vivi virizho haha. Kidza anene gaga garigoorwa mbere za vifungu vivi.*

**M**MUTU mui aurichaho uwi-we ariouhenda, akigahenda garigo kara-kara na hachi, undaritizha roho-re akale moyo. *Ezek.* xviii. 27.

Nagasema makosa gangu, kidza dambi zangu zimbere zangu siku zosi. *Wira* li. 3.

Fitsa usoo ukatsalola dambi zangu, ugahanguse maigangu gosi. *Wira* li. 9.

Sadaka za Mulungu ni roho ririrovundzika: moyo uriovundzika na kukolwa, hewe Mulungu, kundauvudhya. *Wira* li. 17.

Tarurani myoyo yenu, sitarureni mavwalo genu; nanwi uyani kwa Bwana Mulungu wenu: kwa kukala iye una nema na mbazi, kana koro za haraka, una mbazi nyinji, naye ni kuuricha uryahu uwi.

*Joeli* ii. 13.

Mbazi na mausizo ga dambi ni zha Bwana Mulungu wehu, kwa kukala fwakedyanya naye: kahusikirire mumiro wa Bwana Mulungu wehu, na kwenenda kahi za malagizo-ge arigogaika mbere zehu. *Dan.* ix. 9, 10.

Hewe Bwana, nikanya, ela kwa hachi; si kwa koro, pore ukaniononga. *Jer.* x. 24.

Dzyuteni; kwa kukala utawali wa mulunguni udzasongera hehi. *Matt.* iii. 2.

Nindauka, nende kwa baba, nikamwambire, Baba, nidzakosa mbere za mulunguni, na mbere-zo uwe, siagirwe kaheri kuifwa mwanao. *Luka* xv. 18, 19.

Hewe Bwana, siangire kahi za maneno na musunyeo; kwa kukala matsoni hako kakuna ariye moyo andiyekala muhachi. *Wira* cxliii. 2.

Hukiamba kahuna dambi, hunadzikenga enye, na ujeri kaumo ndani mwehu: hukizisema dambi zehu, iye ni mukuluhirwi naye una hachi, hata ahuisize dambi zehu, na kuhutsusa uwi wosi. *1 Joh.* i. 8, 9.

**H**ENWI ndugu zangu muhendzwao zhomu, Maoro ganahuonyesa hatu hangine-hangine kuahikiza na kuzisema dambi zehu na uwi wehu wa kula mudhemba: hukatsazifitsa hedu kuzibinigiza mbere za uso wa Mulungu mwenye nguvu zosi, Babiyehe wa mulunguni; ela huziseme kwa moyo wa kudzitserera na kudzizanya, udziodzyuta na kusikira; kwamba kwa udzo-we na mbazi-ze zisizogoma hupate kuusizwa. Naswi hungahoagirwa makati gosini kuziahikiza dambi zehu mbere za Mulungu kwa kudzitserera; fwaagirwe

zhomu kuhenda vizho makati hutungananaho na kuonana hamwenga kudza kumulazhira muvera kwa mbazi nyinji hurizohokera mikononi mwakwe, na kumulika here fwagirwezho zhomu, na kurisikira Neno-re ryeri, na kumuvoya viryahu humalazho, zha kuhufwaha mwiri na roho. Bai kwa utu uo, namuvoya na kumudhedheja, ninwi nyosini murio haha, mutuwane nami kwa myoyo myeri, na mimiro ya kudzitserereza, hudze husongerere kihi cha nema ya mulunguni, munene nyuma zangu ;

*Gaga ni maneno ga atu osi, ga kusema makosa, nago ganenwe ni atu osi nyuma-ze yuyahu Padiri, osi makale madzapiga mavwindi.*

**H**EWÉ Baba mwenye nguvu zosi na mbazi zosi ; Siswi hudzakosa, hudzaricha ngira-zo here ng'ondzi zirizoangamika. Hudzaituwa muno myazo na tamaa za myoyo yehu enye. Hudzakosa malagizogo maeri. Hurigoagirwa ni kugahenda kahugahendere ; Hudzagahenda husigoagirwa ni kugahenda ; Na matsiya kahuna ndani mwehu. Ela uwe, Bwana, fwonere mbazi, siswi akia enye dambi. Hewe Mulungu, uau-size ao mazisemao dambi zao. Uaudzye madzyutao ; Here vilagane-zho urizhoagunulira anadamu kahi za Masihi Jesu Bwana wehu. Kidza, Baba mwenye mbazi zosi, kwa utu-we iye, Ufwadimire kukala hangu vivi rero na mwendo mudzo, wa hachi na ikili, Kwa kurilika Dzina-ro ryeri. Haami.

*Usiro ra dambi ; naro rinenwe ni Kasisi hakeye, akale uimire ; atu machere kupiga mavwindi.*

**M**MULUNGU mwenye nguvu zosi, Babe Bwana wehu Jesu Masihi, asiyehendza mwenye dambi afwe, ela unahendza auriche uwi-we akale moyo ; naye udzaapa wadimi Ahumikie, udzaalagiza kuagunulira na kuaambira atue madziodzyuta, ga ao kuusizwa dambi zao : Iye ni kausiza dambi osi madziodzyuta

jeri, makuluhirao Uvoro-we udzo ueri hasiho kudzi-hendya. Kwa utu uo na humuvoye ahupe siswi kudzyuta kwa jeri, ahupe na Roho-re Mweri, mautu hugahendago vikara gamufwahire ; na siku zehu ziserezo zikale za kutsuka na ueri ; hata musindikizo hufike ha kufwahirwa-kwe kwa kare na kare ; kwa Jesu Masihi Bwana wehu. *Haami.*

*Kidza Padiri napige mavwindi, anene Voyo ra Bwana ; atu nao makale madzapiga mavwindi, marinene hamwenga naye.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela ufwokole na mai : kwa kukala utawali, na nguvu, na nguma, ni zhako uwe, Kare na kare. Haami.

*Kidza anene vivi,*

Hewe Bwana, gunula milomo yehu.

*Kuahika.* Na makanwa gehu gandanena nguma-yo.

*Kasisi.* Hewe Mulungu, ufwokole haraka.

*Kuahika.* Hewe Bwana, ufwavwize haraka.

*Makati gaga osini na maimé, Kasisi nanene,*

Nguma na ikale kwa Baba, na kwa Mwana : na kwa Roho Mweri ;

*Kuahika.* Here virizhokala kwandza, na vikara : hata kare na kare ni vizho. Haami.

*Kasisi.* Mulikeni Bwana.

*Kuahika.* Dzina ra Bwana na rilikwe.

*Haha na zishomwe hedu ziimbwe Zaburi kwa karakara-ye here virizholagizwa. Kidza na gashomwe Mashomo ga Kilagane cha Kare, here virizholagizwa. Gakigoma, ndo Magnificat (hedu Wira wa Musichana*

*muhadzwi-wa-to Maryamu, kwa maneno ga Kigiryama; here urizhorefwa haha.*

## MAGNIFICAT.

Mweri Luka i. 46.

**M**OYO wangu unamulika Bwana : roho rangu rina-fwahirwa kwa Mulungu Mokoli wangu.

Kwa kukala udzaulola : unyonge wa musunye-we.

Kwani lola, hangu vikara : vizhazi zhosi vindani-hadza na vidzo.

Kwa kukala Mwenye-nguvu udzanihendera mabomu : na Dzina-re ni ryeri.

Mbazi-ze nazo ni za vizhazi zhosi : kwa ao mamogohao.

Udzahenda nguvu na mukono-we : udzatsamula anyeti kahi za myazo ya myoyo yao.

Mario na nguvu udzaatsereza kahi za vihi zhao zha indzi : udzaanula anyonge.

Mario na ndzala udzadzaziza tele vitu vidzo : na mario ashaha udzaainga kihuhu.

Udzamwavwiza Isiraeli muhumiki-we, apate kua-kumbukirira mbazi : here arizhonena na babizehu, Ibrahimu na kizhazi-che, hata kare na kare.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Hedu Wira uu (wa Zaburi) ; isihokala mwezi kumi na chenda, ndo ishomwaho kahi za Zaburi, here ro ada.*

## CANTATE DOMINO.

*Wira xcviii.*

**M**WIMBIRENI Bwana wira usha : kwani udza-henda mautu ga kumasha.

Mukono-we wa kurya, mukono-we mweri : udzamu-hendera wokoli.

Bwana udzamanysa wokoli-we : udzaonyesa lwazu hachi-ye mbere za kolo zosi.

Udzakumbukira mbazi-ze na ukuluhirwi-we : kwa nyumba ya Isiraeli :

Pembe zosi za-tsi zidzawona : wokoli wa Mulungu wehu.

Mutsangireni Bwana, henwi-tsi zosi : lutani, imbani kwa kufwahirwa, imbani maira.

Mukunyeneni Bwana na ndeveve : na ndeveve na mimiro ya kuimba.

Na tarumbeta na palapanda : tsangirani mbere za Mutawali Bwana.

Bahari na irurume, na zhedzerezhomumo : urumwengu, na maukeresio.

Miho na ipige makofi : virima na vimbe hamwenga na kufwahirwa ;

Mbere za Bwana : kwa kukala unadza kuilamula-tsi.

Undaalamula hachi urumwengu : nazo kolo kara-kara.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Kidza na gashomwe Mashomo kahi za Kilagane Kisha, here virizholagizwa. Gakigoma, ndo Nunc dimittis (hedu Wira wa Simeoni) kwa maneno ga Kigiryama, here urizhorefwa haha.*

## NUNC DIMITTIS.

Mweri Luka ii. 29.

**V**IKARA Bwana, unamuricha musunyeo ende : na dheri, kara-kara na neno-ro.

Kwa kukala matso gangu : gadzawona wokolwio,

Udziowika-to : mbere za atu osi ;

Mulangaza wa kuagunulira zo Kolo : kidza nguma ya atu Isiraeli.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Hedu Wira uu (wa Zaburi) ; isihokala kwa siku ya mwezi kumi na mbiri.*

### DEUS MISEREATUR.

Wira lxvii.

**M**MULUNGU na afwonere mbazi, ahuhase : afwonyese mulangaza wa uso-we :

Ngira-yo imanyikane dzulu za-tsi : wokolwio umanyikane kahi za kolo zosi.

Atu na makulike, hewe Mulungu : atu osi na makulike.

Kolo za atu mafwahirwe, maimbe na kuererwa : kwa kukala undaalamula atu na hachi, undaalongoza kolo za atu dzulu za-tsi.

Atu na makulike, hewe Mulungu : atu osi na makulike.

Tsi na izhale vitu-zhe : Mulungu, Mulungu wehu, undahhasa.

Mulungu undahhasa : pembe zosi za-tsi zindamogoha.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Haho na riimbwe hedu rinenwe Kulukiro ra Ahumwa ni yuyahu Padiri na aryahu atu, makale maimire.*

**N**AKULUHIRA kwa Mulungu Baba mwenye nguvu zosi, Muumbi wa dzulu na-tsi :

Na kwa Jesu Masihi Mwanawe wa hakeye, Bwana wehu, Ariyehenderwa mimba ni Roho Mweri, Akizhalwa ni Musichana Maryamu, Akisirinywa kahi za indzi ra Pontio Pilato, Akigozhwa, akifwa, akizikwa, Akitserera

kuzimu ; Siku ya hahu akifufuka, akilaa nyufuni, Achakuka, achangira mulunguni, Naye ukeresi mukono wa kurya wa Mulungu Baba mwenye nguvu zosi ; Ndo andihouya kudza kualamula atu mario moyo na mariofwa.

Nakuluhira kwa Roho Mweri ; na Kanisa Ryeri ra urumwengu wosi ; na Ungara wa Aeri ; na Usiro ra dambi ; na Kufufuka kwa mwiri, na Uzima wa kare na kare. Haami.

*Kidza, mavoyo gaga gatuwago haha, atu osi makale madzapiga mavwindi kwa kuhurira ; yuyahu Padiri kwandza nanene na mumiro mubomu,*

Bwana nakale hamwenga nanwi.

*Kuahika.* Nakale hamwenga na roho-ro nawe.

*Padiri.* Na huvoye.

Bwana, fwonere mbazi.

*Masihi, fwonere mbazi.*

Bwana, fwonere mbazi.

*Haho yuyahu Padiri, nao maimbao, na aryahu atu, na manene Voyo ra Bwana na mumiro mubomu.*

**B**BABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela fwokole na mai. Haami.

*Haho Kasisi naime, anene,*

Hewe Bwana, ufwonyese mbazi-zo dzulu zehu ;

*Kuahika.* Hupe wokolwio.

*Kasisi.* Hewe Bwana, mokole Mutawali.

*Kuahika.* Nawe husirikize kwa mbazi hukuvoyaho.

*Kasisi.* Avwike hachi Ahumikio.

*Kuahika.* Ahendye mafwahirwe atsagulwio.

*Kasisi.* Hewe Bwana, aokole atuo.

*Kuahika.* Uhase ufwao.

*Kasisi.* Hupe dheri siku zehu zosi, Hewe Bwana.

*Kuahika.* Kwa kukala kakuna ahuheheraye, usihokala uwe, hewe Mulungu.

*Kasisi.* Hewe Mulungu, uhutsuse myoyo yehu ndani.

*Kuahika.* Nawe utsahuusira Roho-ro Mweri.

*Haho na gatuwane Mavoyo mahaku; ra kwandza ni ra Siku iryahu; ra hiri ni ra kuvoyera Dheri; ra haku ni ra kuvoyera Wavwizi kuchingira Mazani gosi, here virizhorefwa haha: na Mavoyo gaga mairi ga kusindikiza na gashomwe siku zosi makati ga Kuvoya kwa Dziloni kula siku gakatsagaluka.*

#### VOYO RA HIRI KAHU ZA KUVOYA KWA DZILONI.

**H**EWU Mulungu, kwako uwe tamaa zosi nyeri zinaaha, na maojano madzo gosi, na kazi zosi za hachi; Hupe siswi ahumikio dheri riryahu husiroadima kupewa ni urumwengu; kwamba myoyo yehu yerekezwe-to kugagwira malagizo-go, kidza kwa viryahu hurindwazho ni uwe na oga wa adui chu, hupate kukala na dheri na uhurizi siku zehu zosi; kwa utu wa kufwaha-kwe Jesu Masihi Mokoli wehu. *Haami.*

#### VOYO RA HAHU, RA KUVOYERA WAVWIZI KUCHINGIRA MAZANI GOSI.

**U**HUNG'AZIZE kahi za kiza chehu, hunakuvoya, hewe Bwana; kidza kwa mbazi-zo nyinji uhuchinge na mazani gosi ga usiku uu; kwa utu wa mahendzo ga Mwanao wa hakeye, Mokoli wehu, Jesu Masihi. *Haami.*

*Hatu haimbwaho haho na urefwe wira.*

#### VOYO RA KUMUVOYERA MUTAWALI.

**H**EWU Bwana Babiyehu wa mulunguni, Mubomu, Mwadimi, Mutawali wa atawali, Bwana wa mabwana, utawalaye abomu hakeyo, nawe kuko uriko kihini mwako unaalola atu osi mario kahi za-tsi zosi;

Siswi hunakuvoya zhomu umulole kwa nema-yo Bwana wehu Dzumbe mudzo, Mutawali *GEORGE*; umongezeze zhomu nema iryahu ya Roho-ro Mweri, hata akale siku zosi kugagwira mahendzo-go, na kwenda kahi za ngirayo: Mugere vigerwa-zho vinji zha mulunguni; mupe kukala moyo siku nyinji kwa matsiya na ushaha; mwadimire apate kuadhima aakire aduie osi; kidza, uzima uu ukigoma, afikire kufwahirwa na vidzo visizhogoma; kwa Jesu Masihi Bwana wehu. *Haami.*

#### VOYO RA KUAVOYERA ATU A MBARI YA UTAWALI.

**M**ULUNGU mwenye nguvu zosi, Sina ra udzo wosi, siswi hu maguluni hako, hunakuvoya umuhase mukaza Mutawali wehu, Bibi mudzo *Mary*, na *Alexandra* mame Mutawali, na *Edward Prince of Wales*, na mbari yosi ya Utawali: Uagere Roho-ro Mweri; uape nema-yo ya mulunguni; uaongezeze raha rosi; uafishe hata utawalio wa kare na kare; kwa Jesu Masihi Bwana wehu. *Haami.*

#### VOYO RA KUAVOYERA MAPADIRI GA KANISANI NA ATU AO.

**M**ULUNGU mwenye nguvu zosi wa kare na kare, uwe hakeyo ndiwe uhendaye mivano mibomu; Hunaavoyera Mabishopu gehu, na Matsundzao maroho ga atu, na mitunganano yosi ya atu mariopewa maitsumdzc, kwamba uatserczere Roho ra nema-yo, ariye wa uzima; kidza kwamba mapate kukufwahirwa jeri, uamwagire manina gasigogoma ga kuhasa-ko. Uhupe gaga, hewe Bwana, kwa utu wa ishima-ye Mwavwizi wehu, Muneneri wehu, Jesu Masihi. *Haami.*

#### VOYO RA MWERI CHRYSOSTOM.

**M**ULUNGU mwenye nguvu zosi, udziyehugera nema makati gaga hukurehere uwe mavoyo gehu siswi hosini na moyo mumwenga; kidza unamba kwamba,

airi hedu ahahu mandihotunganana hamwenga kwa Dzina-ro, undaapa mamalazho; Uhutimizize vikara, hewe Bwana, mautu hudzigogamala na kugavoya siswi ahumikio, mwero wa gandizhohufwaha; kwa kuhupa kuumanya ujerio kahi za urumwengu uu, na uzima wa kare na kare kahi za urumwengu udzao. *Haami.*

2 Akor. xiii. 14.

**N**EMA ya Bwana wehu Jesu Masihi, na mahendzo ga Mulungu, na ungara wa Roho Mweri, vikale hamwenga naswi hosini hata kare na kare. *Haami.*

*Kara-kara ya Kuvoya kwa Dziloni kwa kula siku Mwaka muzima idzagoma haha.*

## LITANIA.

*Hako na ituwe LITANIA; Matsanganyikano ga Mavoyo; iimbwe hedu inenwe musindikizo wa Kuvoya kwa Madzacha siku za Jumaapili na Jumaatsano na Jumaa, na makati mengine indiholagizwa ni iye mwenye amulo.*

**H**EWÉ Mulungu Baba, wa mulunguni : ufwonere mbazi akia enye dambi.

*Hewe Mulungu Baba, wa mulunguni : ufwonere mbazi akia enye dambi.*

Hewe Mulungu Mwana, Mukomboli wa urumwengu : ufwonere mbazi akia enye dambi.

*Hewe Mulungu Mwana, Mukomboli wa urumwengu : ufwonere mbazi akia enye dambi.*

Hewe Mulungu Roho Mweri, ulaaye kahi za Baba na Mwana : ufwonere mbazi akia enye dambi.

*Hewe Mulungu Roho Mweri, ulaaye kahi za Baba na Mwana : ufwonere mbazi akia enye dambi.*

Hewe Uhahu, Mweri, Muhadzwi-wa-to, wa nguma

nyinji, Nafusi tahu, Mulungu Mumwenga : ufwonere mbazi akia enye dambi.

*Hewe Uhahu Mweri, Muhadzwi-wa-to, wa nguma nyinji, Nafusi tahu, Mulungu mumwenga : ufwonere mbazi akia enye dambi.*

Sikumbukire makosa gehu, Bwana, hedu makosa ga babizehu; sidzirihize na dambi zehu : huusize Bwana mudzo, huusize atuo, urioakombola kwa milatso-yo ya kima zhomu, ukatsahuhendera koro kare na kare.

*Uhuusize, Bwana mudzo.*

Uwi wosi na mazani; na dambi, na ukengi wa Shetani na mapigo-ge; koro-zo, na kupigwa ulongo kare na kare, *Bwana mudzo, fwokole nago.*

Kiza chosi cha moyoni; unyeti, na kudziona, na kudzihendya; kuhenda kidzitso, na kimene, na mufundo wa moyo, na kula mudhamba wa kutsahendzana,

*Bwana mudzo, fwokole nago.*

Uzindzi na dambi nyingine zosi za kifwa; na ukengi wosi wa urumwengu, na wa mwiri, na wa Shetani,

*Bwana mudzo, fwokole nago.*

Lumete na luvuto; na mapigo, na makongo mai, na ndzala; na viha na walagi, na kifwa cha kimoho-moho,

*Bwana mudzo, fwokole nago.*

Fitini zosi, na maojano mai ga njama, na makedyanyo kula mudhamba; na mafundyo ga ulongo, na mafundyo gasigo kara-kara, na matanyikano; na uomu wa myoyo, na kuvudhya Neno-ro na Malagizo-go,

*Bwana mudzo, fwokole nago.*

Kwa njama ya Urizhohala mwiri wa kidamu; na kwa Kuzhalwa-ko kweri na Kutahirwa-ko; kwa Kuba-putizwa-ko, na Urizhozira chakurya, na Kujezwa,

*Bwana mudzo, fwokole.*

Kwa Utsungu uriokupata na Mavukuhi-go ga milatso; kwa Muhio-wa-kukinganywa na Kusirinywa-ko; kwa Kifwa-cho cha kima zhomu na Kuzikwa-ko; kwa Kufufuka-ko kwa nguma na Kuanuka-ko; na kwa kudza-kwe Roho Mweri,

*Bwana mudzo, fwokole.*

Makati gosi husirimaho; na makati gosi huhenderkerwaho; murongo wa kifwa, na siku ya kulamulwa,

*Bwana mudzo, fwokole.*

Siswi hurio na dambi hunakuvoya uhusikire, hewe Bwana Mulungu; kidza uone-to kurilagiza na kurita-wala Kanisa-ro ryeri ririro ra urumwengu wosi, rigwire ngira iriyo kara-kara;

*Hunakuvoya uhusikire, Bwana mudzo.*

Uone-to kumurinda muhumikio *GEORGE*, Mutawali wehu mudzo, Mubomu wehu, na kumuangiza nguvu kahi za kukuabudu kwa jeri na kahi za mwendo wa hachi na ueri;

*Hunakuvoya uhusikire, Bwana mudzo.*

Uone-to kuutawala moyo-we kahi za kukukuluhira, na kukogoha, na kukuhendza, naye siku zosi akweremere Uwe, amale ishima-yo na nguma-yo kula makati;

*Hunakuvoya uhusikire, Bwana mudzo.*

Uone-to kukala Muheheri-we, Murindzi-we, umupe aadhime aduie osi.

*Hunakuvoya uhusikire, Bwana mudzo.*

Uone-to kuahasa na kuarinda mukaza Mutawali wehu, Bibi mudzo *Mary*, na *Alexandra* mame Mutawali, na *Edward Prince of Wales*, na mbari yosi ya Utawali;

*Hunakuvoya uhusikire, Bwana mudzo.*

Uone-to kuang'aziza Mabishopu osi, na Makasisi osi, na Mashemasi osi, mapate kurimanya Neno-ro kwa jeri na kung'alirwa naro; kidza kwa kuambiriza kwao na kwa kukala kwao marigunule, mariike lwazu;

*Hunakuvoya, uhusikire, Bwana mudzo.*

Uone-to kuagera atu a Moroni mwa Mutawali, na Abomu osi, nema na ikili na kung'alirwa;

*Hunakuvoya uhusikire, Bwana mudzo.*

Uone-to kuahasa na kuarinda Alamuli, kwa kuapa nema ya kulamula hachi, na kuuhehera ujeri;

*Hunakuvoya uhusikire, Bwana mudzo.*

Uone-to kuahasa na kuarinda atu osi;

*Hunakuvoya uhusikire, Bwana mudzo.*

Uone-to kuagera kolo zosi umwenga, na dheri, na masikirano;

*Hunakuvoya uhusikire, Bwana mudzo.*

Uone-to kuhugera siswi myoyo ya kukuhendza na kukogoha, na kuhenda chadi fwende kara-kara na malagizo-go;

*Hunakuvoya uhusikire, Bwana mudzo.*

Uone-to kuaongezeza atu osi nema kwamba marisikire Neno-ro na upore, na kurihokera na mahendzo madzo, mazhale ndude za Roho;

*Hunakuvoya uhusikire, Bwana mudzo.*

Uone-to kuareha kahi za ngira ya ujeri osi marioangamika na kukengwa;

*Hunakuvoya uhusikire, Bwana mudzo.*

Uone-to kuaangiza nguvu aryahu maimireo; na kuahuriza na kuaavwiza mario na myoyo ya uhuyehuye; na kuaanula mariogwa; hata musindikizo-we kumugwaga Shetani tsini za magulu gehu;

*Hunakuvoya uhusikire, Bwana mudzo.*

Uone-to kuatizha, na kuaavwiza, na kuahuriza myoyo, osi mario kahi za mazani, na kukonyeka, na masirimo;

*Hunakuvoya uhusikire, Bwana mudzo.*

Uone-to kuarinda osi mahambao tsi furufu na baharini, na ache osini mario na utsungu wa kuzhala, na akongo osi, na ahoho osi atite; na kuaonera mbazi-zo afungwa na atavwa osi;

*Hunakuvoya, uhusikire, Bwana mudzo.*

Uone-to kuahehera, na kuapatira, ahoho masio na baba, na ache magungu, na osi mario akia na kuonerwa;

*Hunakuvoya uhusikire, Bwana mudzo.*

Uone-to kuaonera mbazi atu osi;

*Hunakuvoya uhusikire, Bwana mudzo.*

Uone-to kuausiza dambi adui ehu, na mahusirinyao, na mahusingizirao, uagaluze myoyo yao;

*Hunakuvoya uhusikire, Bwana mudzo.*

Uone-to kuhugera vitu zha-tsi na midhemba-ye, na kuhurindira, hupate kwa makati-ge kufwahirwa nazho ;

*Hunakuwoya uhusikire, Bwana mudzo.*

Uone-to kuhugera kudzyuta kwa jeri ; nawe uhuusize dambi zehu zosi, na kuregera kwehu kosi, na ujinga wehu wosi ; kidza uhupe nema ya Roho-ro Mweri huhende-to mwendo wehu ukale kara-kara na Neno-ro ryeri ;

*Hunakuwoya uhusikire, Bwana mudzo.*

Mwana wa Mulungu : hunakuwoya uhusikire.

*Mwana wa Mulungu : hunakuwoya uhusikire.*

Hewe Mwana-wa-ng'ondzi wa Mulungu : uusaye dambi za urumwengu ;

*Uhugere dheri-ro.*

Hewe Mwana-wa-ng'ondzi wa Mulungu : uusaye dambi za urumwengu ;

*Ufwonere mbazi.*

Hewe Masihi uhusikire.

*Hewe Masihi, uhusikire.*

Bwana, ufwonere mbazi.

*Bwana, ufwonere mbazi.*

Masihi, ufwonere mbazi.

*Masihi, ufwonere mbazi.*

Bwana, ufwonere mbazi.

*Bwana, ufwonere mbazi.*

*Haho yuyahu Kasisi, na aryahu atu hamwenga naye, na manene Voyo ra Bwana.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeki kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela fwokole na mai. Haami.

*Kasisi.* Hewe Bwana, sihurihize kara-kara na viwiryazho dambi zehu.

*Kuahika.* Hedu ukatsahuriha kara-kara na utiriri wehu.

Na huvoye.

**H**EWÉ Mulungu, Baba uriye na mbazi, usiyekuvu-dhya kwagula kwa moyo udziodzyuta, hedu kumala kwao mario na kigondzi ; Gahokere kwa mbazi mavoyo gehu hukureherago mbere-zo kahi za kukonyeka kwehu kosi na masirinyo gehu gosi, kula gahueremeraho ; uhusikire kwa nema, kwamba mai garyahu, huhenderwago ni ulachu wa Shetani hedu mudamu, gavire ; nago kwa kutsundza-ko kudzo gatsamukane ; kwamba siswi ahumikio hukatsalumira kwa masirinyo gosi gatungwago, fwenderere na kukulazhira muvera siku zosi kahi za Kanisa-ro ryeri ; kwa Jesu Masihi Bwana wehu.

*Hewe Bwana, uka, ufwawwize, ufwokole kwa utu wa Dzina-ro.*

**H**EWÉ Mulungu, hudzasikira na masikiro gehu, babizehu mahugunulira lwazu, mautu mabomu urigogahenda siku zao, na siku za kare mbere zao.

*Hewe Bwana, uka, ufwawwize, ufwokole kwa utu wa ishima-yo.*

Nguma na ikale kwa Baba, na kwa Mwana : na kwa Roho Mweri ;

*Kuahika.* Here virizhokala kwandza, na vikara : hata kare na kare ni vizho. Haami.

Huchinge na adui ehu, hewe Masihi.

*Ugalole kwa nema masirinyo gehu.*

Uulole kwa mbazi utsungu wa myoyo yehu.

*Uziuse kwa mbazi dambi za atuo.*

Gasikire-to mavoyo gehu kwa mbazi.

*Hewe Mwana wa Daudi, ufwonere mbazi.*

Vikara na siku zosi ona-to kuhusikira, hewe Masihi.

*Uhusikire kwa nema, hewe Masihi ; uhusikire kwa nema, hewe Bwana Masihi.*

*Kasisi.* Hewe Bwana, mbazi-zo na zioneke kwehu.

*Kuahika.* Kwa viryahu hukukuluhirazho uwe.



Na huvoye.

**H**EWÉ Baba, siswi hu maguluni hako, hunakuvoya uwonere mbazi uhuye-huye wehu; nawe kwa nguma ya Dzina-ro ufwahusize kure mai garyahu gosi gaagirwego kuhupata kwa hachi zhomu; kidza uhupe kwamba, kahi za masirinyo gehu gosi huzikuluhire kamare mbazi-zo na kuzieremera, fwenderere siku zosi kukuhumikira kwa mwendo wa kara-kara na ueri, kwa ishima-yo na nguma-yo; kwa Muneneri wehu ariye hakeye, Mwavwizi wehu, Jesu Masihi Bwana wehu. *Haami.*

### VOYO RA MWERI CHRYSOSTOM.

**M**MULUNGU mwenye nguvu zosi, udziyehugera nema makati gaga hukurehere uwe mavoyo gehu siswi hosini na moyo mumwenga; kidza unamba kwamba, airi hedu ahahu mandihotunganana hamwenga kwa Dzina-ro, undaapa mamalazho; Uhutimize vikara, hewe Bwana, mautu hudzigogamala na kugavoya siswi ahumikio, mwero wa gandizhohufwaha; kwa kuhupa kuumanya ujerio kahi za urumwengu uu, na uzima wa kare na kare kahi za urumwengu udzao. *Haami.*

2 *Akor.* xiii. 14.

**N**EMA ya Bwana wehu Jesu Masihi, na mahendzo ga Mulungu, na ungara wa Roho Mweri, vikale hamwenga naswi hosini hata kare na kare. *Haami.*

*LITANIA idzagoma haka.*

### MAVOYO NA MUVERA ZHA MAKATI GA LWAKWE-LWAKWE.

*Na gahumirwe mbere za garyahu Mavoyo mairi kahi za kusindikiza kwa Litania, hedu kahi za Mavoyo ga Madzacha na Dziloni.*

### MAVOYO.

*Ra kuvoyera Vula.*

**H**EWÉ Mulungu, Babiyehu wa mulunguni, uwe kwa Mwanao Jesu Masihi waagera kilagane atu osi maumalao utawalio, na hachi-ye, kwamba uwe undaagera vitu zhosi viwiryazho kutsundza miiri yao; Hunakuvoya zhomu, uhurehere vikara makati ga ukia wehu, vula ya kara-kara na mawawa, kwamba hupate kuhokera vitu zha-tsi kwa uhurizi wehu, na ishima-yo; kwa Jesu Masihi Bwana wehu. *Haami.*

*Ra kuvoyera Mitsari.*

**H**EWÉ Bwana Mulungu mwenye nguvu zosi, hako kare kwa utu wa dambi za anadamu wauhosa urumwengu wosi, isihokala atu anane, kidza kwa mbazi-zo nyinji walaga kwamba kundauononga vizho kaheri; Siswi hu maguluni hako, naswi hungahokala kwa utu wa mai gehu fwagirwe ni kureherwa pigo ra vula bomu na madzi manji, ela hunakuvoya kwamba uhuonaho hudzadzzyuta jeri, uhupe mitsari, mwero wa siswi kuvipata vitu zha-tsi kwa makati-ge; hudzifundye kuuhenda-to mwendo wehu kwa utu wa pigo-ro, na kukulika na kukupa nguma kwa utu wa mbazi-zo; kwa Jesu Masihi Bwana wehu. *Haami.*

*Makati ga Ndzala.*

**H**EWÉ Mulungu, Baba wa mulunguni, ni kwa noso-ro vula ni kunya, na-tsi ni kuzhala vitu, na nyama ni kuzhala, na makumba ni kukala manji; hunakuvoya ugalole masirinyo ga atuo; nawe hendza kwamba ii ndzala, ihupigayo vikara kwa hachi kwa utu wa mai gehu, igaluzwe kwa udzoo na mbazi-zo ikale zhangwangu na nema; kwa utu wa mahendzo ga Jesu Masihi Bwana wehu, naye apewe ishima yosi na nguma yosi, hamwenga na uwe na Roho Mweri, vikara na hata kare na kare. *Haami.*

*Hedu riri.*

**H**EWÉ Mulungu, Baba mwenye mbazi, uwe uriyega-luza ndzala na masirinyo garigokala Samaria siku

za mwambirizi Elisha, lumwenga gakikala nema na zhangwangu; Ufwonere mbazi siswi, na hungahopigwa vikara kwa ukia here uryahu, kwa utu wa dambi zehu, ela hupate kuavwizwa dza viryahu kwa makati-ge; Uviongeze vitu zha-tsi kwa kuhasa-ko kwa mulunguni; uhendze kwamba siswi hundihoihokera nema-yo nyinji, huihumire kwa ngira ya kukurehera nguma, na kuaavwiza mario akia, na kudzifwaha siswi enye: kwa Jesu Masihi Bwana wehu. *Haami.*

*Makati ga Viha na Kondo.*

**H**EWÉ Mulungu mwenye nguvu zosi, Mutawali wa atawali osi, Mubomu wa mautu gosi, kakuna chumbe hata kinwenga kiadimacho kuziziza nguvu-zo, ni hachi-yo uwe kuapiga enye dambi, na kuaonera mbazi ao madzyutao jeri; Hu maguluni hako, hunakuvoya ufwokole, na kuhutizha na mikono ya adui ehu; uhunguze unyeti wao, uuse ugwaha wao, ulachu wao upambaze; kwamba siswi hurindwe na mazani gosi siku zosi kwa kuvwikwa viyera zha kuchinga-ko, hupate kukurehera nguma, uriye hake-yo mwenye kugera kudhima kosi; kwa utu wa udzo-we Mwanao wa hakeye, Jesu Masihi Bwana wehu. *Haami.*

*Makati ga Pigo hedu Makongo garigoapata atu osi.*

**H**EWÉ Mulungu mwenye nguvu zosi, uwe kwa koro-zo waarehera atu-o pigo kuryahu nyika, kwa utu wa viryahu marizhonyeta na kukedyanya na Musa na Haruni; kidza makati ga mutawali Daudi, ukiaalaga atu magana kumi kana mirongo mifungahe kwa pigo ra makongo, ela urihokumbukira mbazi-zo ukiaokola mariosala; Ufwonere mbazi siswi akia enye dambi, hudziotekezwa vikara ni makongo mabomu na vifwa vinji; na dza viryahu urizhoahikiza kuhenderwa sadaka makati garyahu, nawe ukimulagiza Malaika muonongi ariche kupiga, vizho vikara uone vidzo kuhuusiza pigo riri, na makongo maziho; kwa Jesu Masihi Bwana wehu. *Haami.*

*Kahi za Majumwa ga Makati mane ga Mwaka, gashomwe kula siku, kwa utu wa atu mandiopewa utalo ueri wa Kanisani.*

**M**MULUNGU mwenye nguvu zosi, Babiyehu wa mulunguni, uriyepata Kanisa ra-tsi zosi kwa kurigula kwa milatso ya kima zhomu ya Mwanao Muhendzwio; Rilole kwa mbazi ro Kanisa-ro, nawe makati ga vikara ilongoze na kuitawala myoyo ya ahumikio Mabishopu na Arisa a kundi-ro, kwamba makatsamwikira mutu mikono haraka, ela matsagule kwa ukuluhirwi na ikili atu mafwahao kuhumika kahi za Uhumiki ueri wa Kanisa-ro. Na ao mandioikwa kwa kazi nyeri yosi, uagere nema-yo na kuhasa-ko kwa mulunguni; kwamba kwa mwendo wao na kufundya kwao mapate kuonyesa lwazu nguma-yo, na kuendereza wokolwi wa atu osi; kwa Jesu Masihi Bwana wehu. *Haami.*

*Hedu riri.*

**M**MULUNGU mwenye nguvu zosi, mulazhi wa vigerwa zhosi vidzo, uwe kwa umanyiririo wa Kimulungu walagiza Mitalo lwakwe-lwakwe kahi za Kanisa-ro; Siswi hu maguluni hako, hunaavoyera osi mandioifwa kwa kazi itungwayo na uhumiki wosi muryahu ndani ya Kanisa riro; kwamba uagere nema-yo; na kuaongezeza ujeri wa mafundyo-go, na kuapa ueri wa mwendo, hata mahumike mbere-zo kwa ukuluhirwi, kwa kurirehera nguma Dzina-ro bomu, na kwa kurifwaha Kanisa-ro ryeri; kwa Jesu Masihi Bwana wehu. *Haami.*

*Voyo rifwaharo kunenwa nyuma za gago garigo mbere, mwenga raho.*

**H**EWÉ Mulungu, ndiwe siku zosi mwenye kuonera mbazi na kuusa dambi, hokera mavoyo gehu siswi hurio maguluni hako; naswi hungahofungwa na kuzizwa kwa mikufu ya dambi zehu, ela mbazi-zo zirizo nyinji na zihuvugule; kwa ishima-ye Jesu Masihi, Muneneri wehu, Mwavwizi wehu. *Haami.*

*Voyo ra kuvoyera Mutunganano-wa-Ojano uifwao Parliament, naro rishomwe makati utungananaho.*

**M**MULUNGU mwenye nema zosi, siswi hu maguluni hako, kidza here huuvoyerazho Utawali uu wosi, vizho hunauvoyera zhomu Mutunganano-wa-Ojano wa Parliament, udziotunganana vikara tsini za Mutawali wehu mudzo amogohaye Mulungu zhomu: Uhendze kugalongoza na kugahendya maojano gao gosi gafwahe, kwa kuiongeza nguma-yo, na kwa kurifwaha Kanisa-ro, na kwa kureha dheri na ishima na uhendekerwi wa iye Mubomu wehu na tsi zosi za Utawali-we; kwamba mautu gosi gahendwe-to na kulamulwa kwa chadi chao, dzulu za kipesa kiricho kidzo cha kara-kara, hata dheri na raha, na ujeri na hachi, na dini na oga wa Mulungu, gaga gosi gakale-to na kwenderera kwehu hata vizhazi zhosi. Gaga na manginge gosi gamalwago, ga ao, na ga siswi enye, na ga Kanisa-ro rosi, hunagavoya hurio maguluni hako, kwa Dzina ra Jesu Masihi na kwa Uneneri-we, ariye Bwana wehu, Mokoli wehu, ahadzwaye-to zhomu. *Haami.*

*Voyo ra kuavoyera atu kula mudhemba, naro ni kuhu-mirwa makati isigolagizwa Litanja.*

**H**EWEE Mulungu, ndiwe Muumbi, Murindzi wa atu osi, siswi hu maguluni hako, hunavoyera atu osi a kula mudhemba na a kula mutalo; uone-to kua-manyisa ngira-zo, na kuaonyesa kolo zosi wokolwio. Kidza, huvoyerazho zhomu, ni zha Kanisa ra urumwengu wosi utu-we ukale udzo; rilongozwe na kutawalwa ni Roho-ro Mudzo, hata osi madziuhao Amasihia malongozwe kahi za ngira ya ujeri, marigwire kuluhuro kwa moyo munwenga, na kwa kifungo cha dheri, na kwa mwendo wa hachi. Kidza hunavoyera kwa udzoo wa ubaba, ualole osi makonyekao na kusirima, kwa utu wa roho, hedu wa mwiri, hedu wa utu wao; [\*zaidi zhomu ao malirwao kuvoyerwa ni siswi,] uhendze kuahuriza na

\* Gaga na gashomwe makati gamahwaho MAVOYO ga Mutunganano.

kuaavwiza, kula mutu kwa mwero wa utsowi-we, uadimire mavumirire kahi za masirinyo gao, na kuombola kahi za kukonyeka kwao kwa kufwahirwa. Na gaga hunakuvoya kwa utu wa Jesu Masihi. *Haami.*

## MUVERA.

*Muvera wa atu osi.*

**M**MULUNGU mwenye nguvu zosi, Baba wa mbazi zosi, siswi ahumikio husiofwaha, hunakulazhira muvera kwa kudzitseriza na kwa myoyo yehu, kwa utu wa udzoo wosi na mbazi-zo, kwehu siswi na kwa atu osi; [\*zaidi zhomu kwa ao mamalao vikara kuku- \* Maneno galika na kukulazhira muvera wao kwa utu wa ga na gashomwe mbazi-zo urizoahendera siku zizi.) Hunaku- aryahai mario- voyerwa mahe- ndzaho kulazha muvera.] lazhira muvera wa viryahu hurizhoumbwa, na kurindwa, na vidzo zhosi zha kukala moyo kuku; na dzulu za gosi, kwa mahendzo-go gasigotalika kwa viryahu urizhoukombola urumwengu kwa Bwana wehu Jesu Masihi; na kwa ngira za nema, na tamaa mbidzo ya nguma. Naswi hunakuvoya sana, ufwadimire kuzisikira-to rohani mbazi-zo zosi, myoyo yehu ilazhe muvera wa jeri, naswi huonyese nguma-go, si kwa milomo yehu tu, ela kwa mwendo wehu; kwa kudzilazha kukala ahumikio, na kwa kwenda mbere-zo uwe kwa ueri na hachi siku zehu zosi; kwa Jesu Masihi Bwana wehu, naye apewe ishima yosi na nguma yosi, hamwenga na uwe na Roho Mweri, kare na kare. *Haami.*

*Kwa utu wa Vula.*

**H**EWEE Mulungu Babiyehu wa mulunguni, uwe kwa umanyiririo udzo ni kuinyesa dzulu ya-tsi vula ya Mwaka na ya Vuri, izhale vitu zha kuumirwa ni anadamu; Siswi hu maguluni hako, hunakulazhira muvera kwa viryahu urizhoona vidzo, makati ga utsowi wehu, kuhurehera nusindikizoni vula mbidzo dzulu za

ufwao, ukaukoza urihokala u furufu, kwa kuhuhuriza zhomu siswi ahumikio husiofwaha, na kurirehera nguma Dzina-ro ryeri; kwa mbazi-zo zirizo kahi za Jesu Masihi Bwana wehu. *Haami.*

*Kwa utu wa Mitsari.*

**H**EWÉ Bwana Mulungu, una hachi udzizhohupiga kwa vula nyinji zhomu na mureto, nawe kwa mbazi-zo udzaiavwiza myoyo yehu na kuihuriza kwa viryahu urizhagaluzza vidzo kureha mutsari; siswi hunarilika Dzina-ro ryeri na kurirehera nguma, kwa utu wa mbazi-zo zizo, naswi siku zosi hundaonyesa udzoo kizhazi hata kizhazi; kwa Jesu Masihi Bwana wehu. *Haami.*

*Kwa utu wa nema nyinji.*

**H**EWÉ Baba mwenye mbazi zosi, uwe kwa udzoo udzasikira Kanisa-ro ridzizhokuvoya kwa moyo, nawe udzagaluzza ukia wehu na ndzala yehu vidzakala zhangwangu na nema; Siswi hu maguluni hako, hunakulazhira muvera kwa noso-ro riri riro lwakwe; naswi hunakuvoya uenderere na kuhuonera mbazi vizho, kwamba tsi yehu ihuzhalire vitu-zhe zha kuongezeka, kwa nguma-yo uwe na kwa uhurizi wehu; kwa Jesu Masihi Bwana wehu. *Haami.*

*Kwa utu wa Dheri na Kutizhwa kahi za Adui ehu.*

**H**EWÉ Mulungu mwenye nguvu zosi, Uwe ndiwe Ngome ya nguvu ya kuachingira ahumikio mbere za adui ao; Siswi hunakulika na kukulazhira muvera kwa viryahu hurizhotizhwa na mazani garyahu mabomu ga lwazu garigohudengereka: Hunaahikiza kwamba ni udzoo uwe siswi kutsalazhwa mikononi mwao kukala atavwa ao; naswi hunakuvoya ukale vizho kuhuonera mbazi-zo here zizo, urumwengu wosi upate kumanya kwamba ndiwe Mokoli wehu, Mutizhi wehu mwenye nguvu; kwa Jesu Masihi Bwana wehu. *Haami.*

*Kwa utu wa kuudzizwa Dheri kahi za atu a kwehu.*

**H**EWÉ Mulungu wa kare na kare, Babiyeu wa mulunguni, ndiwe hakeyo uhendyaye atu makale na moyo mumwenga kahi za nyumba yao, na kuhuriza ugwaha wa atu a kilumelume na makedyanyo; Hunarilika Dzina-ro ryeri, kwamba udzahendza kuzihuriza kondo ziriyahu za fitini zirizotsatsamulwa kwehu siku zizi; naswi hunakuvoya maguluni hako uhupe nema siswi hosini, kwamba hangu vikara fwende kahi za malagizo-go maeri kwa kusikira; na kwa kukala na mwendo wa uhurizi na dheri kahi za kumogoha Mulungu, na hachi kwa andziehu, hupate kukulazhira siku zosi sadaka yehu ya kulika na muvera kwa utu wa zizi mbazi-zo kwehu siswi; kwa Jesu Masihi Bwana wehu. *Haami.*

*Kwa utu wa kutizhwa kahi za Makongo garigoapata atu osi.*

**H**EWÉ Bwana Mulungu, udzahulumiza kwa utu wa dambi zehu, udzahuanganiza kwa utu wa makosa gehu, na mapigo maziho ga kuogosha urigohurehera siku zizi zirizokira; nawe vikara, kwa viryahu urizhokumbukira mbazi kahi za malamuli, udzagakombola maroho gehu kahi za ndea za kifwa; Hunausongezera udzoo wa ubaba siswi enye, maroho gehu na miiri yehu, urizhovitizha, vikale sadaka iriyo moyo kwako uwe, kwa hundi-zhozilika na kuzikunya mbazi-zo siku zosi kahi-kahi za Kanisa-ro; kwa Jesu Masihi Bwana wehu. *Haami.*

*Hedu riri.*

**S**ISWI hu maguluni hako, hunaahikiza mbere-zo, hewe Baba wa mbazi zosi, kwamba mapigo gosi garigoorwa kuogosha kahi za wagirwio gangahupata kwa hachi, kwa utu wa makosa gehu ga midhemba minji na uomu wa myoyo yehu: Ela kwa kukala haho hurihodzitsereza kwa unyonge na kwa kutsafwaha, udzahendza kwa mbazi-zo mbidzo kugahunguza

garyahu makongo ga lwitso hurigopigwa nago zhomu siku ziryahu zirizokira vikara, na kuhuudziza vumi ra kufwahirwa na matsiya kahi za nyumba zehu; Hunarilazhira Indzi-ro ra Kimulungu sadaka ya kulika na muvera, kwa kurilika na kurikunya Dzina-ro ra nguma, kwa viryahu urizhohutizha na kuhutsundza; kwa Jesu Masihi Bwana wehu. *Haami.*

## MAVOYO, WARAKA, INJILI, ZHA KULA SIKU MWAKA MUZIMA.

*Gwira riri, voyo ririrolagizwa rihumirwe kula Jumaapili, na kula Siku bomu iriyo na Kuchesa-kwe hedu Kuhenda-to-kwe, na rishomwe kahi za Mavoyo ga Dziloni ya siku ya kulamukira siku iryahu.*

JUMAAPILI RA KWANDZA KAHU ZA MAKATI GA KUDZA.  
*Voyo.*

**M**MULUNGU mwenye nguvu zosi, uhugere nema hugatsuhe mahendo ga kiza, huvivwale viyera zha mulangaza, vikara hurizho kahi za uzima uu ugwirwao ni kifwa, arioangira Mwanao Jesu Masihi arihokudza hulola kwa unyonge zhomu; kwamba, siku ya musindikizo, andihokudza kaheri kahi za nguma ya indzi-re kualamula mario moyo na mariofwa, siswi hupate kufufuka kwa uzima usiogwirwa ni kifwa, kwa iye ariye moyo na kutawala hamwenga na uwe na Roho Mweri, vikara na kare na kare. *Haami.*

*Voyo riri na rishomwe kula siku hamwenga na Mavoyo mangine ga Makati ga Kudza, hata indihofika siku ya kulamukira Kirisimasi.*

*Waraka—Arumi xiii. 8-14. Injili—Mat. xxi. 1-13.*

JUMAAPILI RA HIRI KAHU ZA MAKATI GA KUDZA.  
*Voyo.*

**B**WANA wa kuhadzwa-to, uriyelagiza gaorwe Maoro maeri gosi kukala mafundyo gehu; Uhupe kugasikira, na kugashoma, na kugagwira, na kudzifundya, na kugaririkana myoyoni mwehu, kwamba kwa uvumirizi na uhurizi wa Neno-ro ryeri, huigadzamire na kuitsundza-to siku zosi tamaa iryahu mbidzo ya uzima wa kare na kare, uriyohugera kahi za Mokoli wehu Jesu Masihi. *Haami.*

*Waraka—Arumi xv. 4-13. Injili—Luka xxi. 25-33.*

JUMAAPILI RA HAHU KAHU ZA MAKATI GA KUDZA.  
*Voyo.*

**H**EWWE Bwana Jesu Masihi, urihokudza lwa kwandza wamuhuma muhumwao akutongodhyere kuku-hendera-to ngira-yo; Uagere kwamba ao ahumiki na njama-zo nao maziimirao maihende-to vizho ngira-yo, maiike-to kwa mandizhoigaluzi myoyo ya masiosikira na kuierekeza kahi za ikili za enye hachi, hata undihokudza lwa hiri kuulamula urumwengu, huoneke kukala hu atu a kuahikizwa mbere-zo, uriye moyo na kutawala hamwenga na Baba na Roho Mweri, Mulungu mu-mwenga siku zosi kare na kare. *Haami.*

*Waraka—1 Akor. iv. 1-5. Injili—Mat. xi. 2-10.*

JUMAAPILI RA-NE KAHU ZA MAKATI GA KUDZA.  
*Voyo.*

**Z**IREHE nguvu-zo hunakuvoya, hewe Bwana, nawe udze kwehu siswi, ufwavwize kwa wadimi unji; hata hungahokala hunazuliwa zhomu na kuzizwa ni dambi zehu na uwi wehu, kahi za kuyera kwehu hudzikolagizwa, ela hamwenga na gago nema-yo nyinji na mbazi-zo zifwavwize haraka zifwokole; kwa radi-ye Mwanao Bwana wehu, naye aishimiwe na kulikwa hamwenga na uwe na Roho Mweri, kare na kare. *Haami.*

*Waraka—Afil. iv. 4-7. Injili—Joh. i. 19-28.*

SIKU YA KUZHALWA-KWE MASIHI BWANA WEHU, IIFWAYO  
NI ATU KIRISIMASI.

*Voyo.*

**M**MULUNGU mwenye nguvu zosi, uriyehugera Mwanao ariyezhalwa hakeye adzivwike utu wehu, na kuzhalwa ni Musichana mweri, here dza makati gaga; Hugere siswi kwamba viryahu hurizhozhalwa lwa hiri, na kuhendywa kukala anao kwa kurerwa na kwa nema, huhendywe asha kula siku ni Roho-ro Mweri; kwa iye Bwana wehu Jesu Masihi, ariye moyo na kutawala hamwenga na uwe na yuyahu Roho, Mulungu mumwenga, siku zosi, hata kare na kare. *Haami.*

*Waraka*—Aheb. i. 1-12. *Injili*—Joh. i. 1-14.

SIKU YA SITEFANO MWERI.

*Voyo.*

**U**HUPE, hewe Bwana, kwamba kahi za masirinyo gehu gosi gahupatago haha urumwenguni kwa utu wa kuulazhira uzhodherwa ujeri-o, hulangaze matso mulunguni, huyone kwa kukuluhira iryahu nguma indiyogunulwa; kidza, kwa kuadzalwa ni Roho Mweri, hudzifundye kuahendza na kuahasa ao mahusirinyao, kwa kutuwa arizhoonyesa chodherwacho cha kwandza, Sitefano Mweri, ariyeavoyera mariomwalaga kwako uwe, hewe Muhadzwi-wa-to Jesu, uimireye mukono wa kurya wa Mulungu kuaavwiza osi masirinywao kwa utuo, Muneneri wehu hakeyo, Mwavwizi wehu. *Haami.*

*Haho na rituwe Voyo ra Kuzhalwa-kwe Bwana, naro rikatsarichwa kushomwa kula siku hata ifike siku ya kulamukira Mwaka Musha.*

*Hatu ha Waraka*—Mat. vii. 55-60.

*Injili*—Mat. xxiii. 34-39.

SIKU YA MWERI JOHANA MUENEZI WA UVORO-UDZO.

*Voyo.*

**B**WANA wa mbazi, hunakuvoya zhomu rimirikire Kanisa-ro na chenje za mulangazao, kwamba

riking'azizwa ni mafundyo ga Muhunwao, Muenezio Mweri Johana ariyehadzwa-to, rienderere kahi za mulangaza wa ujerio, hata musindikizoni ripate kuufikira mulangaza wa uzima wa kare na kare; kwa Jesu Masihi Bwana wehu. *Haami.*

*Waraka*—1 Joh. i. 1-10. *Injili*—Joh. xxi. 19-25.

SIKU YA MASIO MAKOSA.

*Voyo.*

**H**EWI Mulungu mwenye nguvu zosi, ndiwe uriyetimiza nguvu kwa makanwa ga ahoho atite na maamwao, ukahenda kwamba ana atsanga makulike kwa vifwa zhao; Uvitsindze na kuvigonya vii zhosi virizho ndani mwetu siswi, ukafwangize nguvu kwa nema-yo, hata kwa mwendo wehu kutsakala na kapalata kamare, na kwa kukuluhira kwehu kwenderera hata kifwa, hupate kurilika Dzina-ro ryeri; kwa Jesu Masihi Bwana wehu. *Haami.*

*Hatu ha Waraka*—Magun. xiv. 1-5.

*Injili*—Mat. 2. 13-18.

JUMAAPILI NYUMA ZA KUZHALWA KWA BWANA WEHU.

*Voyo.*

**M**MULUNGU mwenye nguvu zosi, uriyehugera Mwanao ariyezhalwa hakeye adzivwike utu wehu, na kuzhalwa ni Musichana mweri, here dza makati gaga; Hugere siswi kwamba viryahu hurizhozhalwa lwa hiri, na kuhendywa kukala anao kwa kurerwa na kwa nema, huhendywe asha kula siku ni Roho-ro Mweri, kwa iye Bwana wehu Jesu Masihi; ariye moyo na kutawala hamwenga na uwe na yuyahu Roho, Mulungu mumwenga, siku zosi, hata kare na kare. *Haami.*

*Waraka*—Agal. iv. 1-7. *Injili*—Mat. i. 18-25.

KUTAHIRWA-KWE MASIHI.

*Voyo.*

**M**MULUNGU mwenye nguvu zosi, walagiza kwamba Mwanao muhadzwi-wa-to atahirwe, apate kugwira

wagirwi kwa utu wa mudamu ; Hugere siswi kutahirwa kwa jeri kwa Roho ; kwamba myoyo yehu, na vilungo zhehu zhosi, vikale vidzafwerera tamaa zosi za mwiri na za urumwengu, hupate kahi za mautu gosi kugatuwa mahendzo-go madzo ; kwa iye Mwanao Jesu Masihi Bwana wehu. *Haami.*

*Waraka*—Arum. iv. 8-14. *Injili*—Luka ii. 15-21.

*Voyo riri na Waraka uu na Injili ii na vihumike kula siku hata ifike siku ya Magunulo.*

MAGUNULO, HEDU KUONYESWA-KWE MASIHI KWA KOLO.

*Voyo.*

**H**EW E Mulungu, waagunulira atu a ziryahu Kolo Mwanao ariyezhalwa hakeye, kwa kutongodhyerwa ni nyenyezi, Hugere kwa mbazi-zo kwamba, siswi hukumanyao vikara kwa kukuluhira, nyuma za kukala moyo kuku hupate raha ridzirotimira ra Umulunguo wa nguma ; kwa Jesu Masihi Bwana wehu. *Haami.*

*Waraka*—Aefes. iii. 1-12. *Injili*—Mat. ii. 1-12.

JUMAAPILI RA KWANDZA NYUMA ZA MAGUNULO.

*Voyo.*

**H**EW E Bwana, hunakuvoya sana ugahokere kwa mbazi mavoyo ga atuo makuvoyao ; ukaagere magaone magamanye mautu maagirwego ni kugahenda, kidza agere nema na nguvu mapate kugatimiza kwa ukuluhirwi ; kwa Jesu Masihi Bwana wehu. *Haami.*

*Waraka*—Arum. xii. 1-5. *Injili*—Luka ii. 41-52.

JUMAAPILI RA HIRI NYUMA ZA MAGUNULO.

*Voyo.*

**M**ULUNGU mwenye nguvu zosi wa kare na kare, utawalaye mautu gosi ga mulunguni na ga-tsi ; Usikire kwa mbazi mavoyo ga atuo, uhupe dheri-ro siku zosi za kukala moyo kwehu ; kwa Jesu Masihi Bwana wehu. *Haami.*

*Waraka*—Arum. xii. 6-16. *Injili*—Joh. ii. 1-11.

JUMAAPILI RA HAHU NYUMA ZA MAGUNULO.

*Voyo.*

**M**ULUNGU mwenye nguvu zosi wa kare na kare, uulole kwa mbazi uhuye-huye wehu, kidza kahi za mazani gehu gosi na utsowi wehu wosi uugolozе mukonoo wa kurya, ufwavwize na kuhuchinga ; kwa Jesu Masihi Bwana wehu. *Haami.*

*Waraka*—Arum. xii. 16-21. *Injili*—Mat. viii. 1-13.

JUMAAPILI RA-NE NYUMA ZA MAGUNULO.

*Voyo.*

**H**EW E Mulungu, unahumanya kwamba siswi huri-zhoikwa kahi-kahi za mazani manji mabomu, kafwadima siku zosi kuima to-to-to, kwa kukala utu wehu ni wa uhuye-huye ; Uhugere nguvu na urindzi mwero wa kufwika-to kahi za mazani gosi, na kuhutizha kahi za majezo gosi ; kwa Jesu Masihi Bwana wehu. *Haami.*

*Waraka*—Arum. xiii. 1-7. *Injili*—Mat. viii. 23-34.

JUMAAPILI RA TSANO NYUMA ZA MAGUNULO.

*Voyo.*

**H**EW E Bwana, hunakuvoya sana, riri Kanisa-ro, nyumba-yo, uririnde siku zosi kahi za dini-yo ya ujeri ; kwamba aryahu maieremerao tamaa ya nema-yo ya mulunguni, iyo tu, marindwe siku zosi ni nguvu-zo zirizo nyinji ; kwa Jesu Masihi Bwana wehu. *Haami.*

*Waraka*—Akol. iii. 12-17. *Injili*—Mat. xiii. 24-30.

JUMAAPILI RA HANDAHU NYUMA ZA MAGUNULO.

*Voyo.*

**H**EW E Mulungu, Mwanao muhadzwi-wa-to wakudza oneka lwazu apate kuziononga kazi za pepo, na kuhuhendya siswi hukale ana a Mulungu, ahali-a-ufwa a uzima wa kare na kare ; Hunakuvoya, uhugere kwamba hurizho na tamaa il hudzieze here iye arizho mweri ;

hata andihooneka lwa hiri na nguvu na nguma nyinji, hupate kuhalanywa naye kahi za utawali-we wa kare na kare urio na nguma; muryahu atoamo na kutawala hamwenga na uwe, hewe Baba, na uwe, hewe Roho Mweri, Mulungu mumwenga, kare na kare. *Haami.*

*Waraka*—1 Joh. iii. 1-8. *Injili*—Mat. xxiv. 23-31.

JUMAAPILI RIFWARO SEPITUAGESIMA, RA HAHU MBERE ZA KUZIRA CHAKURYA.

*Voyo.*

**H**EW E Bwana, hunakuvoya ukale radi kugasikira mavoyo ga atuo; kwamba siswi huriopigwa kwa hachi kwa utu wa makosa gehu, huokolwe na kuonerwa mbazi ni uwe kwa udzoo, kwa nguma ya Dzina-ro; kwa Jesu Masihi Mokoli wehu, ariye moyo na kutawala hamwenga na uwe na Roho Mweri, Mulungu mumwenga, kare na kare. *Haami.*

*Waraka*—Akor. ix. 24-27. *Injili*—Mat. xx. 1-16.

JUMAAPILI RIFWARO SEKISAGESIMA, RA HIRI MBERE ZA KUZIRA CHAKURYA.

*Voyo.*

**H**EW E Bwana Mulungu, uwe unaona kwamba kahuere-mera kazi zehu huhendazo siswi enye, hata mwenga raho; Kwa mbazi-zo hugere kwamba kwa nguvu-zo uwe huchingwe na kula vii zhosi; kwa Jesu Masihi Bwana wehu. *Haami.*

*Waraka*—2 Akor. xi. 19-31. *Injili*—Luka viii. 4-15.

JUMAAPILI RIFWARO KWINIKWAGESIMA, RIRIRO MBERE ZA KUZIRA CHAKURYA.

*Voyo.*

**H**EW E Bwana, udzahufundya kwamba mahendo gehu gosi kagafwaha kitu hasiho kuhendzana; Muhume Roho-ro Mweri, ahumwagire myoyoni mwehu noso riryahu ridzo zhomu ra kuhendzana, ririro mudhao

wenye wa dheri na wa vidzo zhosi, urio kula mutu atungwaye akikala kanao udzakala here mufwadzi mbere-zo: Hugere gaga kwa utu wa Mwanao Jesu Masihi. *Haami.*

*Waraka*—1 Akor. xiii. 1-13. *Injili*—Luka xviii. 31-43.

SIKU YA KWANDZA YA KUZIRA CHAKURYA, IFWAYO NI ATU JUMAATSANO RA MAIVU.

*Voyo.*

**M**ULUNGU mwenye nguvu zosi wa kare na kare, uwe kuvizira urizhozhumba hata kimwenga, ndiwe uzusaye dambi za osi madzyutao; uhuumbire ndani mwehu myoyo misha iriyobundika, siswi kwa kuziririra dambi zehu here zhagirwezho, na kusema ukia wehu, hupate kwako uwe, hewe Mulungu wa mbazi zosi, kuusizwa na kurichirwa kamare dambi zehu; kwa Jesu Masihi Bwana wehu. *Haami.*

*Voyo riri na rishomwe kula siku makati ga Kuzira chakurya nyuma za Voyo ririrolagizwa kwa Siku iyo.*

*Hatu ha Waraka*—Joeli. ii. 12-17.

*Injili*—Mat. vi. 16-21.

JUMAAPILI RA KWANDZA KAHU ZA KUZIRA CHAKURYA.

*Voyo.*

**H**EW E Bwana, uwe kwa utu wehu siswi wazira chakurya siku mirongo mine mutsana na usiku; Hugere nema hudziunye, hata miiri yehu idhimwe ni iye Roho, hukutuwe siku zosi ufwenendzyazho kwa vidzo kahi za uhachi na ueri wa jeri, kwa ishima-yo na ngumayo uwe, uriye moyo na kutawala hamwenga na Baba na Roho Mweri, Mulungu mumwenga, kare na kare. *Haami.*

*Waraka*—2 Akor. vi. 1-10. *Injili*—Mat. iv. 1-11.

JUMAAPILI RA HIRI KAHU ZA KUZIRA CHAKURYA.

*Voyo.*

**M**ULUNGU mwenye nguvu zosi, uwe unaona kwamba kahuna nguvu siswi enye za kudziavwiza; Uhurinde-ndze kahi za miiri yehu, na ndani kahi za maroho



gehu; hupate kuchingwa na masirinyo gosi gapatago mwiri, na myazo mii yosi ihehayo na roho na kurilumiza; kwa Jesu Masihi Bwana wehu. *Haami.*

*Waraka*—1 Athes. iv. 1-8. *Injili*—Mat. xv. 21-28.

JUMAAPILI RA HAHU KAHU ZA KUZIRA CHAKURYA.

*Voyo.*

**M**MULUNGU mwenye nguvu zosi, hunakuvoya uga-sikire hugavoyago kwa myoyo siswi ahumikio hurio maguluni hako, nawe uugolozze mukonoo wa kurya wa Indzi, kuhuchinga na adui ehosi; kwa Jesu Masihi Bwana wehu. *Haami.*

*Waraka*—Aefes. v. 1-14. *Injili*—Luka xi. 14-28.

JUMAAPILI RA-NE KAHU ZA KUZIRA CHAKURYA.

*Voyo.*

**M**MULUNGU mwenye nguvu zosi, hunakuvoya kwa-amba, siswi hungahowirya zhomu kupigwa kwa utu wa vihendo zhehu vii, ela kwa kuhurizwa myoyo yehu kwa nema-yo, hupate kutizhwa kwa mbazi-zo; kwa Bwana wehu Mokoli wehu Jesu Masihi. *Haami.*

*Waraka*—Agal. iv. 21-31. *Injili*—Joh. vi. 1-14.

JUMAAPILI RA TSANO KAHU ZA KUZIRA CHAKURYA.

*Voyo.*

**H**HUNAKUVOYA, Mulungu mwenye nguvu zosi, ualole atuo na mbazi; kwamba kwa udzoo unji matawalwe na kurindwa siku zosi, miiri yao na maroho gao; kwa Jesu Masihi Bwana wehu. *Haami.*

*Waraka*—Aheb. ix. 11-15. *Injili*—Joh. viii. 46-59.

JUMAAPILI RIRIRO MBERE ZA UFUFULO.

*Voyo.*

**M**MULUNGU mwenye nguvu zosi wa kare na kare, uwe kwa kuahendza anadamu zhomu, wamuhuma Mwanao, Mokoli wehu Jesu Masihi, adze adziwike

mwiri wehu wa kidamu, na kupatwa ni kifwa dzulu za muhi wa kulinganywa, kwamba anadamu osi makwige kudzitserereza-kwe kubomu; Uhugere siswi kwa mbazi-zo kwamba hukwige kuvumirira-kwe, na kuhendywa angara a kufufuka-kwe; kwa iye Jesu Masihi Bwana wehu. *Haami.*

*Waraka*—Afl. ii. 5-11. *Injili*—Mat. xxvii. 1-54.

JUMAAHAHU MBERE ZA UFUFULO.

*(Voyo riryahu.)*

*Hatu ha Waraka*—Isa. lxiii. 1-19.

*Injili*—Mariko xiv. 1-72.

JUMAANE MBERE ZA UFUFULO.

*(Voyo riryahu.)*

*Hatu ha Waraka*—Isa. i. 5-11.

*Injili*—Mariko xv. 1-39.

JUMAATSANO MBERE ZA UFUFULO.

*(Voyo riryahu.)*

*Waraka*—Aheb. ix. 16-28. Luka xxii. 1-71.

ALHAMISI MBERE ZA UFUFULO.

*(Voyo riryahu.)*

*Waraka*—1 Akor. xi. 17-34. *Injili*—Luka xxiii. 1-49.

JUMAA RIDZO.

*Mavoyo.*

**M**MULUNGU Mwenye nguvu zosi, hunakuvoya ualole na mbazi aa atu a nyumba-yo, aa ndo kwa utu wao Bwana wehu Jesu Masihi wakala radi kulonderwa, na kuangizwa mikononi mwa atu ai, na kualagwa dzulu za muhi wa kulinganywa, naye vikara u moyo na kutawala hamwenga na uwe na Roho Mweri, Mulungu mumwenga kare na kare. *Haami.*

**M**MULUNGU mwenye nguvu zosi wa kare na kare, kundi zima ra Kanisa ni kutawalwa na kuezwa ni Roho-ro; Ugasikire madhedhejo gehu na mavoyo gehu, hukureherago uwe kwa kuavoyera atu osi a kula mutalo

kahi za Kanisa-ro ryeri, kwamba kula mumwenga waho akuhumikire kwa ujeri na hachi, kahi za muza-we wa kazi ariogerwa, na uhumiki-we; kwa Bwana wehu Mokoli wehu, Jesu Masihi. *Haami.*

**H**WE Mulungu wa mbazi, uriyeaumba atu osi, kuvizira urizhozhumba hata kimwenga, kidza kwendzi kifwa cha mwenye dambi, ela unaona ni baha agaluke apate kukala moyo; Uaonere mbazi osi Ayahudi, na Isilamu, na Makafiri, na matuwao mafundyo ga ulongo, uausize uzuzu wosi, na uomu wosi wa myoyo, na mavudhyo gosi ga Neno-ro; ualongoze Bwana mudzo, uarehe kwao kahi za badi-ro, mapate kuokoka hamwenga na Aisraeli a jeri mariosala, makale kundi mwenga tsini za Murisa mumwenga, Jesu Masihi Bwana wehu, ariye moyo na kutawala hamwenga na uwe na Roho Mweri, Mulungu mumwenga, kare na kare. *Haami.*

*Waraka*—Aheb. x. 1-25. *Injili*—Joh. xix. 1-37.

#### SIKU YA KULAMUKIRA UFUFULO.

*Voyo.*

**H**WE Bwana, uhugere kwamba here hubaputizwazho siswi kahi za kifwa cha Mwanao muhadzwi-wa-to Mokoli wehu Jesu Masihi, vizho hupate na kuzikwa hamwenga naye kwa kuzialaga siku zosi tamaa zehu mbii; hata kwa kukira ndani za mbira, kahi za muvirywa wa kifwa, hukufikire kufufuka kwehu kuriko na kufwahirwa; kwa utu wa kufwaha-kwe iye, ariyefwa, akizikwa, akifufuka kwa utu wehu, Mwanao Jesu Masihi Bwana wehu. *Haami.*

*Waraka*—1 Pet. iii. 17-22. *Injili*—Mat. xxvii. 57-66.

#### SIKU YA UFUFULO.

*Kahi za Kwoya kwa madzacha, hatu ha Wira wa Ndzooni humwimbire Bwana, na gaimbwe hedu gashomwe Maira gaga.*

**M**ASIHI ariye Pasaka wehu udzalazhwa akale sadaka kwa utu wehu; bai na huhende nyambura;

Si kwa tsatsu ya kare, hedu kwa tsatsu ya udhu na uwi: ela kwa mukahe usio tsatsu wa ukuluhirwi na ujeri.

1 *Akor.* v. 7.

Masihi kwa kukala wafufuka kahi za nyufu kafwa kaheri: kifwa kakimutawala kaheri.

Kwa kukala viryahu arizhofwa, waifwerera dambi lumwenga: na viryahu arizho moyo, u moyo kwa Mulungu.

Nanwi vizho mudzitale enye kukala mu nyufu kwa dambi: ela mu moyo kwa Mulungu, kwa Jesu Masihi Bwana wehu.

*Arum.* vi. 9.

Masihi udzafufuka kahi za nyufu: udzakala lumbuko ra ao mariolala.

Kwa kukala here kifwa ni kwa utu wa mudamu: vizho na kufufuka nako ni kwa utu wa mudamu.

Kwa kukala here osi mafwazho kahi za Adamu: vizho osi mandahendywa kukala moyo kahi za Masihi.

1 *Akor.* xv. 20.

Nguma na ikale kwa Baba, na kwa Mwana: na kwa Roho Mweri;

Here virizhokala kwandza, na vikara: hata kare na kare ni vizho. *Haami.*

*Voyo.*

**M**ULUNGU mwenye nguvu zosi, uwe kwa Mwanao ariyehalwa hakeye Jesu Masihi udzakidhima kifwa, na kuhusundulira muvirywa wa uzima wa kare na kare; Siswi hu maguluni hako, hunakuvoya kwamba, here nema-yo iriyo lwakwe ihulongozazho, hata uwe ni kuangiza tamaa mbidzo myoyoni mwehu, hukale siswi naswi kwa kuavwizwa ni uwe siku zosi kuzitimiza zizo to-to-to; kwa Jesu Masihi Bwana wehu, ariye moyo na kutawala hamwenga na uwe na Roho Mweri, Mulungu mumwenga, kare na kare. *Haami.*

*Waraka*—Akol. iii. 1-7. *Injili*—Joh. xx. 1-10.

#### JUMAAHAHU NYUMA ZA UFUFULO.

*(Voyo riryahu.)*

*Hatu ha Waraka*—Mah. x. 34-43.

*Injili*—Luka xxiv. 13-35.

JUMAANE NYUMA ZA UFUFULO.

(*Voyo riryahu.*)

*Hatu ha Waraka*—Mah. xiii. 26–41.

*Injili*—Luka xxiv. 36–48.

JUMAAPILI RA KWANDZA NYUMA ZA UFUFULO.

*Voyo.*

**B**ABA mwenye nguvu zosi, udziyehupa Mwanao ariyeczhalwa hakeye afwe kwa utu wa dambi zehu, na kufufuka kaheri kwa kuhugera hachi; Ufwaywize kuitsuha tsatsu ya udhu na uwi, kwamba hupate kukuhumikira siku zosi na mwendo wa kuera na ujeri; kwa kufwaha-kwe iye Mwanao Jesu Masihi Bwana wehu. *Haami.*

*Waraka*—1 Joh. v. 4–12. *Injili*—Joh. xx. 19–23.

JUMAAPILI RA HIRI NYUMA ZA UFUFULO.

*Voyo.*

**M**MULUNGU mwenye nguvu zosi, udziyehupa Mwanao ariyeczhalwa hakeye, akale kwehu sadaka kwa utu wa dambi, kidza ahuonyese mwendo mudzo; Uhugere nema hupate siku zosi kuhokera na muvera zhomu riryahu pato-re risirotalika, kidza hujeze kula siku kuzitua nyayo mbidzo za mwendo-we wa kuera zhomu; kwa Jesu Masihi Bwana wehu. *Haami.*

*Waraka*—1 Pet. ii. 19–25. *Injili*—Joh. x. 11–16.

JUMAAPILI RA HAHU NYUMA ZA UFUFULO.

*Voyo.*

**M**MULUNGU mwenye nguvu zosi, uaonyesaye mlangaza wa ujerio ao makosao, mapate kuiuyira ngira ya hachi; Aavwize osi marioangizwa kahi za ungara wa Dini ra Masihi, kwamba magashule mautu gosi gasigogwirana na kuahikiza kwao, magatuwe gosi gadzigogwirana nako; kwa Bwana wehu Jesu Masihi. *Haami.*

*Waraka*—1 Pet. ii. 11–17. *Injili*—Joh. xvi. 16–22.

JUMAAPILI RA-NE NYUMA ZA UFUFULO.

*Voyo.*

**H**EWWE Mulungu mwenye nguvu zosi, ni uwe hakeyo uadimaye kuitawala myoyo ya ugwaha na maendzo ga utiriri ga anadamu enye dambi; Agere atuo kugahendza urigolagiza, na kugamala urigolaga; kwamba vivi, mumu kahi za kugaluka kunji kwa urumwengu uu, myoyo yehu ierekezwe-to kuko kuriko na kufwahirwa kwa jeri; kwa Jesu Masihi Bwana wehu. *Haami.*

*Waraka*—Jak. i. 17–21. *Injili*—Joh. xvi. 5–15.

JUMAAPILI RA TSANO NYUMA ZA UFUFULO.

*Voyo.*

**H**EWWE Bwana, mautu madzo gosini galaa kwako; Siswi ahumikio hurio maguluni hako, uhugere kwamba, kwa kuvivira-ko kweri hupate kugaririkana mautu garigo madzo, kidza kwa kulongozwa ni mbazi-zo hupate kugahenda gago; kwa Bwana wehu Jesu Masihi. *Haami.*

*Waraka*—Jak. i. 22–27. *Injili*—Joh. xvi. 23–33.

SIKU YA KUANUKA.

*Voyo.*

**H**HUNAKUVOYA, Mulungu mwenye nguvu zosi, uhupe siswi here hukuluhirazho kwamba Mwanao ariyeczhalwa hakeye Bwana wehu Jesu Masihi waanuka achangira mulunguni; na siswi naswi huanuke vizho kwa myoyo yehu na ikili zehu, na kutoa kuko hamwenga naye siku zosi, ariye moyo na kutawala hamwenga na uwe na Roho Mweri, Mulungu mumwenga, kare na kare. *Haami.*

*Waraka*—Mah. i. 1–11. *Injili*—Mar. xvi. 14–20.

JUMAAPILI NYUMA ZA SIKU YA KUANUKA.

*Voyo.*

**H**EWWE Mulungu, Mutawali wa nguma, udzamwanula dzulu Mwanao wa hakeye Jesu Masihi hata utawalio wa mulunguni kwa nguma nyinji za kudhima;

Hunakuvoya, utsahuricha hukakala akia; uhurehere Roho-ro Mweri adze ahuhurize, na kufwanula dzulu hata kuko arikotongodhya Mokoli wehu Masihi, ariye moyo na kutawala hamwenga na uwe na Roho Mweri, Mulungu mumwenga, kare na kare. *Haami.*

*Waraka*—1 Pet. iv. 7–11. *Injili*—Joh. xv. 26–xvi. 4.

## JUMAAPILI RA PENTEKOSITO.

*Voyo.*

**M**MULUNGU, uwe makati dza gaga waafundya myoyo yao atuo akuluhirwi, kwa kuarehera mulangaza wa Roho-ro Mweri; Uhupe siswi kwa iye Roho kukala na ikili mbidzo kahi za mautu gosi, na kufwahirwa siku zosi kwa uhurizi-we ueri; kwa kufwaha-kwe Masihi Jesu Mokoli wehu, ariye moyo na kutawala hamwenga na uwe, kahi za umwenga wa iye Roho, Mulungu mumwenga, kare na kare. *Haami.*

*Hatu ha Waraka*—Mah. ii. 1–11. *Injili*—Joh. xiv. 15–31.

## JUMAHAHU NYUMA ZA PENTEKOSITO.

*(Voyo riryahu.)*

*Hatu ha Waraka*—Mah. x. 34–48. *Injili*—Joh. iii. 16–21.

## JUMAANE NYUMA ZA PENTEKOSITO.

*(Voyo riryahu.)*

*Hatu ha Waraka*—Mah. viii. 14–17. *Injili*—Joh. x. 1–10.

## JUMAAPILI RA UHAHU.

*Voyo.*

**M**MULUNGU mwenye nguvu zosi wa kare na kare, udzahugera siswi ahumikio nema ya kuahikiza nguma ya Uahu usio na chaho usio na ha kusindikiziza, kwa viryahu hurizhosema kuluhuro ra ujeri, udzahugera na kuuabudu uryahu Umwenga kwa nguvu za Indzi ra Kimulungu; Hunakuvoya kwamba, uhurinde kahi za kuluhuro riri, hukatsagaluka, uhuchinge siku zosi na mai gosi, uwe uriye moyo na kutawala, Mulungu mumwenga, kare na kare. *Haami.*

*Hatu ha Waraka*—Magun. iv. 1–11. *Injili*—Joh. iii. 1–15.

## JUMAAPILI RA KWANDZA NYUMA ZA UHAHU.

*Voyo.*

**H**HEWE Mulungu, uwe ndiwe nguvu za osi mukukulu-hirao, ugahokere na mbazi mavoyo gehu; kidza kwa viryahu husizhoadima kuhenda utu udzo wosi utungwao kwa utu wa uhuye-huye wehu wa kidamu, husihokala na uwe, ufwangize tiba ya nema-yo, kwamba kwa kugagwira malagizo-go hupate kukufwahira, kahi za kuaza kwehu, na kahi za kuhenda kwehu; kwa Jesu Masihi Bwana wehu. *Haami.*

*Waraka*—1 Joh. iv. 7–21. *Injili*—Luka xvi. 19–31.

## JUMAAPILI RA HIRI NYUMA ZA UHAHU.

*Voyo.*

**H**HEWE Bwana, uwe kuricha kamare kuaavwiza na kuatawala ao uarerao kahi za kukuogoha na kuku-hendza hasiho kugaluka; Uhurinde siswi, hunakuvoya, kwa umanyiririo wa kutsundza-ko kudzo, uhendye kwamba hukale siku zosi kuriogoha na kurihendza Dzina-ro ryeri; kwa Jesu Masihi Bwana wehu. *Haami.*

*Waraka*—1 Joh. iii. 13–24. *Injili*—Luka xiv. 16–24.

## JUMAAPILI RA HAHU NYUMA ZA UHAHU.

*Voyo.*

**H**HEWE Bwana, hunakuvoya uhusikire kwa mbazi-zo; uhupe siswi udzioghugera myoyo ya kuhendza zhomu kuvoya, huchingwe, huhurizwe kwa wavwizio ubomu, kahi za mazani gosi na masirinyo gosi; kwa Jesu Masihi Bwana wehu. *Haami.*

*Waraka*—1 Pet. v. 5–11. *Injili*—Luka xv. 1–10.

## JUMAAPILI RA-NE NYUMA ZA UHAHU.

*Voyo.*

**H**HEWE Mulungu, ndiwe Murindzi wa osi makukulu-hirao, hasihokala na uwe kakuna kiricho na nguvu, kakuna kiricho kyeri; Ufwongezeze mbazi-zo uzihendye zikale nyinji kwehu kwamba, kwa kukala ndiwe

Mutawali wehu, Ndongori yehu, viryahu hukirazho kahi za mautu ga urumwengu uu na vikale kwamba musindikizoni hukatsagakosa mautu ga kare na kare: Uhupe gaga, hewe Baba wa mulunguni, kwa utu wa Jesu Masihi Bwana wehu. *Haami.*

*Waraka*—Arum. viii. 18–23. *Injili*—Luka vi. 36–42.

JUMAAPILI RA TSANO NYUMA ZA UHAHU.

*Voyo.*

**H**EWÉ Bwana, hunakuvoya, uhendye kwamba mwendo wa urumwengu uu uerekezwe kwa kulongozwa ni uwe kahi za dheri, hata Kanisa-ro rikuhumikire kwa kufwahirwa kahi za uhurizi udzo; kwa Jesu Masihi Bwana wehu. *Haami.*

*Waraka*—1 Pet. iii. 8–15. *Injili*—Luka v. 1–11.

JUMAAPILI RA HANDAHU NYUMA ZA UHAHU.

*Voyo.*

**H**EWÉ Mulungu, udzaahendera-to ao makuhendzao mautu madzo gasigomanyikana kwa ikili za kidamu; Humwagire myoyoni mwehu mahendzo kwako uwe, kwamba siswi, kwa kukuhendza kuriko zhosi, hupate vilagane-zho, vikirazho gosi huadimago kugamala; kwa Jesu Masihi Bwana wehu. *Haami.*

*Waraka*—Arum. vi. 3–11. *Injili*—Mat. v. 20–26.

JUMAAPILI RA FUNGAHE NYUMA ZA UHAHU.

*Voyo.*

**B**WANA uriye na nguvu zosi na wadimi wosi, ndiwe chaho cha vitu zhosi vidzo, kidza ndiwe uvilazhaye; Gaangize myoyoni mwehu mahendzo ga Dzinaro, uongeze ndani mwehu dini ra ujeri, uhurise na udzo wosi, na kuhurinda mumo kwa mbazi-zo nyinji; kwa Jesu Masihi Bwana wehu. *Haami.*

*Waraka*—Arum. vi. 19–23. *Injili*—Mar. viii. 1–9.

JUMAAPILI RA NANE NYUMA ZA UHAHU.

*Voyo.*

**H**EWÉ Mulungu, umanyiririo usiohunguka ndo uamulirao mautu gosi ga mulunguni na ga-tsi; Siswi hu maguluni hako, hunakuvoya uhuusize mautu gosi gahulumizago, uhugere garyahu gahufwahago; kwa Jesu Masihi Bwana wehu. *Haami.*

*Waraka*—Arum. viii. 12–17. *Injili*—Mat. vii. 15–21.

JUMAAPILI RA CHENDA NYUMA ZA UHAHU.

*Voyo.*

**B**WANA, hunakuvoya, uhugere roho ra kuaza siku zosi mautu ga kara-kara na kugahenda; kwamba siswi, husioadima kuhenda utu udzo hata umwenga hasihokala na uwe, hupate kukala here uhendzazho kwa kuangizwa nguvu ni uwe; kwa Jesu Masihi Bwana wehu. *Haami.*

*Waraka*—1 Akor. x. 1–13. *Injili*—Luka xvi. 1–9.

JUMAAPILI RA KUMI NYUMA ZA UHAHU.

*Voyo.*

**H**EWÉ Bwana, masikiro-go ga mbazi na gagunuke kwa mavoyo ga ahumikio mario maguluni hako; kidza kwamba mapate magavoyago uahendye magamale garyahu gakufwahirago; kwa Jesu Masihi Bwana wehu. *Haami.*

*Waraka*—1 Akor. xii. 1–11. *Injili*—Luka xix. 41–47.

JUMAAPILI RA KUMI NA MWENGA NYUMA ZA UHAHU.

*Voyo.*

**H**EWÉ Mulungu, uonyesaho zhomu nguvu-zo zisizo-adimika ni haho kahi za kuonera mbazi na huruma; Kwa mbazi-zo uhugere nema-yó, mwero wa kufwadimira huyere kahi za ngira ya malagizo-go, hupate vilagane-zho vidzo, na kuhendywa angara a mali-zo za mulunguni; kwa Jesu Masihi Bwana wehu. *Haami.*

*Waraka*—1 Akor. xv. 1–11. *Injili*—Luka xviii. 9–14.

JUMAAPILI RA KUMI NA MBIRI NYUMA ZA UHAHU.

*Voyo.*

**M**MULUNGU mwenye nguvu zosi wa kare na kare, uwe siku zosi u mwangwangu kusikira kuriko siswi kuvoya, unazoera kuhugera vinji kuriko huvimalazho na kuriko fwagirwezho kupewa; Uhumwagire unji wa mbazi-zo; uhuusize mautu garyahu hugaogohago kwa kudzimanya hu akosa, uhugere mautu garyahu madzo husigowirya kugavoya, isihokala kwa viryahu afwahazho na kuhuvoyera Jesu Masihi, Mwanao, Bwana wehu. *Haami.*

*Waraka*—2 Akor. iii. 4-9. *Injili*—Mar. vii. 31-37.

JUMAAPILI RA KUMI NA TAHU NYUMA ZA UHAHU.

*Voyo.*

**M**MULUNGU mwenye nguvu zosi uriye na mbazi, ni noso-ro uwe tu atuo akuluhirwi kuadima kuku-humikira kwa kufwaha na kulikwa; Hunakuvoya, uhupe kukuhumikira kwa ukuluhirwi kahi za uzima uu wa vikara, hata musindikizo hukatsakosa kuvipata vilagane-zho zha mulunguni; kwa kufwaha-kwe Jesu Masihi Bwana wehu. *Haami.*

*Waraka*—Agal. iii. 16-22. *Injili*—Luka x. 23-37.

JUMAAPILI RA KUMI NA-NE NYUMA ZA UHAHU.

*Voyo.*

**M**MULUNGU mwenye nguvu zosi wa kare na kare, uhuongezeze kuluhuro, na tamaa mbidzo, na kuhendzana; kidza, kwamba huvipate urizholagana, uhu-hendye huvihendze urizholagiza; kwa Jesu Masihi Bwana wehu. *Haami.*

*Waraka*—Agal. v. 16-24. *Injili*—Luka xvii. 11-19.

JUMAAPILI RA KUMI NA TSANO NYUMA ZA UHAHU.

*Voyo.*

**H**HUNAKUVOYA hewe Bwana, ririnde Kanisa-ro kwa mbazi-zo zisizogoma: na kwa kukala uhuye-huye

wa mudamu suti ugwe hasihokala na uwe, uhurinde siku zosi na wavwizio, hukatsapatwa ni mautu gosi galumizago, uhulongoze hugafikire gosi gandigohufwaha kwa wokolwi wehu; kwa Jesu Masihi Bwana wehu. *Haami.*

*Waraka*—Agal. vi. 11-18. *Injili*—Mat. vi. 24-34.

JUMAAPILI RA KUMI NA TANDAHU NYUMA ZA UHAHU.

*Voyo.*

**H**HEWE Bwana, hunakuvoya, mbazi-zo zisizogoma na zirize Kanisa-ro na kurichinga; kidza kwa viryahu risizhoadima kukala-to hasihokala na wavwizio, uririnde siku zosi kwa tiba-yo na udzoo; kwa Jesu Masihi Bwana wehu. *Haami.*

*Waraka*—Aefes. iii. 13-21. *Injili*—Luka vii. 11-17.

JUMAAPILI RA KUMI NA FUNGAHE NYUMA ZA UHAHU.

*Voyo.*

**B**BWANA, hunakuvoya kwamba nema-yo siku zosi ihutongodhyere na kuhutuwa nyuma, kidza ifwangize moyo fwenderere kula siku kuhenda kazi zosi mbidzo; kwa Jesu Masihi Bwana wehu. *Haami.*

*Waraka*—Aefes. iv. 1-6. *Injili*—Luka xiv. 1-11.

JUMAAPILI RA KUMI NA NANE NYUMA ZA UHAHU.

*Voyo.*

**B**BWANA, hunakuvoya, uagere atuo nema ya kudhima majezo ga urumwengu, na ga mwiri, na ga pepo, makutuwe uwe tu Mulungu wa ujeri hakeyo, na myoyo myeri na ikili zirizoezwa; kwa Jesu Masihi Bwana wehu. *Haami.*

*Waraka*—1 Akor. i. 4-8. *Injili*—Mat. xxii. 34-46.

JUMAAPILI RA KUMI NA CHENDA NYUMA ZA UHAHU.

*Voyo.*

**H**HEWE Mulungu, kwa kukala husihokala na uwe kafwadima kukufwahira; Kwa mbazi-zo uhugere

kwamba Roho-ro Mweri ailongoze myoyo yehu na kuita-wala kahi za mautu gosi ; kwa Jesu Masihi Bwana wehu. *Haami.*

*Waraka*—Aefes. iv. 17–32. *Injili*—Mat. ix. 1–8.

JUMAAPILI RA MIRONGO MIIRI NYUMA ZA UHAHU.

*Voyo.*

**H**EWWE Mulungu mwenye nguvu zosi na mbazi zosi, hunakuvoya kwa udzoo unji, uhurinde na mautu gosi gaadimago kuhulumiza ; hata siswi hundiokala-to miiri yehu na maroho gehu, hutimize kwa kutangamuka mautu garyahu uhendzago gahendeke ; kwa Jesu Masihi Bwana wehu. *Haami.*

*Waraka*—Aefes. v. 15–21. *Injili*—Mat. xxii. 1–14.

JUMAAPILI RA MIRONGO MIIRI NA MWENGA NYUMA ZA UHAHU.

*Voyo.*

**H**UNAKUVOYA, Bwana wa mbazi, uagere atuo akuluhirwi usiro ra dambi na dheri, kwamba maezwe kahi za dambi zao zosi, makuhumikire na myoyo idziyohurira ; kwa Jesu Masihi Bwana wehu. *Haami.*

*Waraka*—Aefes. vi. 10–20. *Injili*—Joh. iv. 46–54.

JUMAAPILI RA MIRONGO MIIRI NA MBIRI NYUMA ZA UHAHU.

*Voyo.*

**H**UNAKUVOYA Bwana, riri Kanisa-ro, naro ndo atu ha nyumba-yo, uririnde kahi za kukuogoha uwe siku zosi ; kwamba kwa kutsundzwa ni uwe rikatsapatwa ni mai gosi, rikale na chadi kahi za kukuhumikira kwa kazi mbidzo, kwa nguma ya Dzina-ro ; kwa Jesu Masihi Bwana wehu. *Haami.*

*Waraka*—Afil. i. 3–11. *Injili*—Mat. xviii. 21–35.

JUMAAPILI RA MIRONGO MIIRI NA TAHU NYUMA ZA UHAHU.

*Voyo.*

**H**EWWE Mulungu, ndiwe chimbiriro yehu, ndiwe nguvu zehu, nawe ndiwe chaho cha udzo wosi ; Hunakuvoya ukale radi kugasikira garyahu Kanisa-ro rikuvoyago kwa chadi ; uhugere kwamba garyahu hugamalago kwa ukuluhirwi hugapate kwa utimiri ; kwa Jesu Masihi Bwana wehu. *Haami.*

*Waraka*—Afil. iii. 17–21. *Injili*—Mat. xxii. 15–22.

JUMAAPILI RA MIRONGO MIIRI NA-NE NYUMA ZA UHAHU.

*Voyo.*

**H**EWWE Bwana, hunakuvoya uausize atuo makosa gao ; kwamba kwa udzoo unji huvugulirwe nyugwe za dambi ziryahu hurizozihenda kwa uhuye-huye wehu : Uhugere gaga, hewe Baba wa mulunguni, kwa utu wa Jesu Masihi Bwana wehu muhadzwi-wa-to, Mokoli wehu. *Haami.*

*Waraka*—Akol. i. 3–12. *Injili*—Mat. ix. 18–26.

JUMAAPILI RA MIRONGO MIIRI NA TSANO NYUMA ZA UHAHU.

*Voyo.*

**H**UNAKUVOYA hewe Bwana, uilamuse myoyo ya atuo akuluhirwi ; kwamba kwa vizho mandizho-zhala zhomu ndude za kazi mbidzo, mapate kugerwa miza yao ni uwe kwa unji ; kwa Jesu Masihi Bwana wehu. *Haami.*

*Hatu ha Waraka*—Jer. xxiii. 5–8. *Injili*—Joh. vi. 5–14.

*Chamba kuna siku za Jumaapili nyingine mbere kari-dzangwe kufika Jumaapili ra Makati ga Kudza, na gashomawe Mavoyo na Mashomo ga siku ziryahu za Jumaapili zirizorichwa nyuma za Siku ya Magunulo, mwero wa zirizohunguka haha. Na chamba Jumaapili zidzahunguka, garigozidi na garichwe. Ela*

*Voyo riri ra kusindikiza, na Waraka uu, na Injili ii na vishomwe siku zosi siku ya Jumaapili iriyo mbere za Makati ga Kudza.*

SIKU YA MWERI ANDAREA.

*Voyo.*

**M**MULUNGU mwenye nguvu zosi, uriyemugera nema Muhumwao Mweri Andarea, hata achahika haho henyeye arihoifwa ni Mwanao Jesu Masihi, akimutuwa kakalire dii; Uhugere siswi hosini kwamba, hurizhoifwa ni Neno-ro ryeri, husikire, hudzilazhe vikara zhenye kugatimiza malagizo-go maeri; kwa iye Jesu Masihi Bwana wehu. *Haami.*

*Waraka—Arum. x. 9-21. Injili—Mat. iv. 18-22.*

SIKU YA MWERI THOMA MUHUMWA.

*Voyo.*

**M**MULUNGU mwenye nguvu zosi uriye moyo kare na kare, ni kwa utu wa kurirungaraza ro kuluhiro urizhomuricha Muhumwao Mweri Thoma ahende kimoyomoyo kwa utu wa kufufuka kwa Mwanao; Uhugere siswi kumukuluhira-to Mwanao Jesu Masihi, hasiho kimoyomoyo kamare, kwamba kuluhiro rehu rikatsapata kukanywa mbere-zo siku zosi. Uhusikire, hewe Bwana, kwa utu-we iye Jesu Masihi, naye apewe ishima yosi na nguma yosi, hamwenga na uwe na Roho Mweri, vikara na hata kare na kare. *Haami.*

*Waraka—Aefes. ii. 19-22. Injili—Joh. xx. 24-31.*

SIKU YA KUGALUKA-KWE MWERI PAULO.

*Voyo.*

**H**EWEL Mulungu, udzang'aziza mulangaza wa Uvoro-udzo urumwengu wosi kwa viryahu arizhoambiriza Muhumwa muhadzwi-wa-to Mweri Paulo; Hunakuvoya hugere kwamba siswi, kwa viryahu hundizhokumbukira kugaluka-kwe kurikomasha, hukale hukikuonyesa muvera wehu wa utu uryahu, kwa kugatuwa mafundyo

garyahu maeri arigokala akifundya; kwa Jesu Masihi Bwana wehu. *Haami.*

*Hatu ha Wakara—Mah. ix. 1-22.*

*Injili—Mat. xix. 27-30.*

SIKU YA KUONYESWA-KWE LWAZU MASIHI HEKALUNI, NI SIKU IFWAYO NI ATU, KUTSUSWA-KWE MWERI MARYAMU MUSICHANA.

*Voyo.*

**M**MULUNGU mwenye nguvu zosi, uriye moyo kare na kare, siswi hu maguluni ha Indzi-ro, hunakuvoya kwamba, here Mwanao ariyezhalwa hakeye arizhoonyeswa lwazu muryahu hekaluni here makati dza vivi rero, naye were una utu wa mwiri wehu, vizho siswi naswi huonyeswe kwako uwe enye myoyo myeri ya kutsuka, kwa iye Mwanao Jesu Masihi Bwana wehu. *Haami.*

*Hatu ha Waraka—Mal. iii. 1-5. Injili—Luka ii. 22-40.*

SIKU YA MWERI MATHIA.

*Voyo.*

**H**EWEL Mulungu mwenye nguvu zosi, wamutsagula Mathia muhumikio mukuluhirwi akale mumwenga wa aryahu Ahumwa kumi na airi, hatu ha Judasi iye mulonderi; Henda kwamba Kanisa-ro ririndwe, rikatsapatwa ni Ahumwa a ulongo, ritsundzwe, rilongozwe ni arisa akuluhirwi, ajeri; kwa Jesu Masihi Bwana wehu. *Haami.*

*Hatu ha Waraka—Mah. i. 15-26. Injili—Mat. xi. 25-30.*

KUAMBIRWA-KWE MARYAMU MUSICHANA MUHADZWI-WA-TO.

*Voyo.*

**H**UNAKUVOYA, hewe Bwana, uhumwagire nema-yo myoyoni mwehu; kwamba siswi, here hurizho-manyaga kuhendywa mwiri Mwanao Jesu Masihi kwa uvaro uriorefwa ni malaika, na vikara kwa kugozhwa-kwe na kusirima-kwe huhirikwe mbere vizho hata



hufikire kufufuka-kwe kwa nguma ; kwa iye Jesu Masihi Bwana wehu. *Haami.*

*Hatu ha Waraka*—Isa. vii. 10–15. *Injili*—Luka i. 26–38.

SIKU YA MWERI MARIKO.

*Voyo.*

**H**EWWE Mulungu mwenye nguvu zosi, udzarifundya Kanisa-ro ryeri mafundyo garyahu ga mulunguni arigokala nago Mwambirizio Mweri Mariko ; Uhugere nema, kwamba hukatsakala here ahoho, hukahalwa ni kula peho ya mafundyo ga ulongo, ela hurungarazwe kahi za ujeri wa uvoroo udzo ueri ; kwa Jesu Masihi Bwana wehu. *Haami.*

*Waraka*—Afes. iv. 7–16. *Injili*—Joh. xv. 1–11.

SIKU YA AERI FILIPO NA JAKOBU.

*Voyo.*

**H**EWWE Mulungu mwenye nguvu zosi, kukumanya uwe jeri ndo uzima wa kare na kare ; Hugere humumanye kara-kara Mwanao Jesu Masihi kukala nde ngira, nde ujeri, nde uzima ; hata siswi kwa kuzituwa nyayo za Ahumwao aeri, Mweri Filipo na Mweri Jakobi, fwenderere-to kahi za ngira ifishayo uzima wa kare na kare ; kwa iye Mwanao Jesu Masihi Bwana wehu. *Haami.*

*Waraka*—Jak. i. 1–12. *Injili*—Joh. xiv. 1–14.

SIKU YA MWERI BARANABA.

*Voyo.*

**H**EWWE Bwana Mulungu mwenye nguvu zosi, wamupa Muhumwao Mweri Baranaba vigerwa zha lwakwe-lwakwe zha Roho Mweri ; Hunakuvoya ukatsahuricha siswi hukavikosa vigerwazho zha midhamba, hedu hukakosa nema za kuvihumira siku zosi kwa kukuishimu na kukurehera nguma ; kwa Jesu Masihi Bwana wehu. *Haami.*

*Hatu ha Waraka*—Mah. xi. 22–30.

*Injili*—Joh. xv. 12–16.

SIKU YA MWERI JOHANE MUBAPUTIZI.

*Voyo.*

**M**ULUNGU mwenye nguvu zosi, kwa umanyiririo uwe muhumikio Johane Mubaputizi wazhalwa kwa utu wa kumasha, akihumwa aihendere-to ngira ya Mwanao Mokoli wehu, kwa kuambiriza atu ga kudzyuta dambi ; Ufwadimire hugatuwe mafundyo-ge na mwendo-we mweri, hata siswi hudzyute jeri here arizhoambiriza ; kidza here arizhofwonyesa hukale siku zosi kunena ujeri, na kuukanya uwi, hasiho kuaogoha atu, na kuvumirira masirinyo gahupatago kwa utu wa uryahu ujeri ; kwa Jesu Masihi Bwana wehu. *Haami.*

*Hatu ha Waraka*—Isa. xl. 1–11. *Injili*—Luka i. 57–80.

SIKU YA MWERI PETERO.

*Voyo.*

**H**EWWE Mulungu mwenye nguvu zosi, uwe kwa Mwanao Jesu Masihi wamugera Muhumwao Mweri Petero vigerwa vinji vidzo zhomu, ukimulagiza sana kwamba aririse badi-ro ; Hunakuvoya, uaadimire Mabishopu osi na Arisa osi a atu maambirize Neno-ro ryeri kwa chadi, nao atu marituwe kwa kurisikira, kwamba mapate kugerwa kidhumbiri cha nguma ya kare na kare ; kwa Jesu Masihi Bwana wehu. *Haami.*

*Hatu ha Waraka*—Mah. xii. 1–11.

*Injili*—xvi. 13–19.

SIKU YA MWERI JAKOBU MUHUMWA.

*Voyo.*

**H**EWWE Mulungu wa mbazi, here Muhumwao Mweri Jakobi arizhomuricha babaye na zhosi arizhokala nazho, akiusikira mwifwa wa Mwanao Jesu Masihi, kaka lire dii, akimutuwa ; uhugere siswi kwamba huziriche vizho tamaa zosi za urumwengu na za mwiri, hukale-to siku zosi kugatuwa malagizo-go maeri ; kwa Jesu Masihi Bwana wehu. *Haami.*

*Hatu ha Waraka*—Mah. xi. 27–xii. 3.

*Injili*—Mat. xx. 20–28.

SIKU YA MWERI BARITHOLOMAYO MUHUMWA.

*Voyo.*

**H**EWÉ Mulungu mwenye nguvu zosi wa kare na kare, wamugera Muhumwao Baritholomayo nema ya kurikuluhira jeri Neno-ro na kuriambiriza; Hunakuvoya urigere Kanisa-ro kurihendza riryahu Neno arirorikuluhira iye, na kuriambiriza, na kurihokera; kwa Jesu Masihi Bwana wehu. *Haami.*

*Hatu ha Waraka—Mah. v. 12–16.**Injili—Luka xxii. 24–30.*

SIKU YA MWERI MATHAYO MUHUMWA.

*Voyo.*

**H**EWÉ Mulungu mwenye nguvu zosi, kwa Mwanao muhadzwi-wa-to wamwiha Mathayo auke haryahu arihokala akihokera ushuru akale Muhumwa, Muenezi; Uhugere siswi nema huziriche tamaa zosi za kidzitso-dzitso, na za kuhendza mali zhomu, hupate kumutuwa iye Mwanao Jesu Masihi, ariye moyo na kutawala hamwenga na uwe naye Roho Mweri, Mulungu mu-mwenga, kare na kare. *Haami.*

*Waraka—2 Akor. iv. 1–6. Injili—Mat. ix. 9–13.*

SIKU YA MWERI MIKAEELI NA MALAIKA OSI.

*Voyo.*

**H**EWÉ Mulungu wa kare na kare, ndiwe uriyelagiza ukiwika-to uryahu uhumiki wa Malaika na wa anadamu kwa mitalo ya kumasha; Uhendye kwa mbazi-zo kwamba dza viryahu Malaikao aeri makuhumikirazho siku zosi mulunguni, na siswi naswi na mafwawwize na kuhuchinga haha urumwenguni, kwa kulagizwa ni uwe; kwa Jesu Masihi Bwana wehu. *Haami.*

*Hatu ha Waraka—Magun. xii. 7–12.**Injili—Mat. xviii. 1–10.*

SIKU YA MWERI LUKA MUENEZI.

*Voyo.*

**M**ULUNGU mwenye nguvu zosi, yuyahu Luka Muganga alikwaye kahi za Uvoro-udzo, wamwiha uwe akale Muenezi, Muganga wa maroho ga anadamu; Hunakuvoya kwamba, uone-to makongo gosi ga maroho gehu gahozwe kwa mihaso midzo ya mafundyo arigolazha iye; kwa kufwaha-kwe Mwanao Jesu Masihi Bwana wehu. *Haami.*

*Waraka—2 Tim. iv. 5–15. Injili—Luka x. 1–7.*

SIKU YA AERI SIMON NA JUDA, AHUMWA.

*Voyo.*

**H**EWÉ Mulungu mwenye nguvu zosi, wariaka Kanisa-ro dzulu za misinji ya Ahumwa na Ambirizi, na ro iwe bomu ra pembeni ni Jesu Masihi mwenye; Uhugere siswi kugwizanywa kara-kara kahi za umwenga wa roho kwa mafundyo gao, hata siswi huhendywe hukale mushikiti mweri undiokufwahira; kwa Jesu Masihi Bwana wehu. *Haami.*

*Waraka—Juda 1–8. Injili—Joh. xv. 17–27.*

SIKU YA AERI OSI.

*Voyo.*

**H**EWÉ Mulungu mwenye nguvu zosi, udzaalunganya atsagulwi-o makale ungara umwenga, ndugu mwenga, kahi za mwiri wa Mwanao Masihi Bwana wehu urio wa njama; Uhugere siswi nema huatuwe Aerio ahadzwi-a-to, kwa mwendo wosi mudzo wa kukuogoha, kwamba hukufikire kufwahirwa kuryahu kusikoneneka, udzikoahendera-to ao makuhendzao hasiho kudzihendya; kwa Jesu Masihi Bwana wehu. *Haami.*

*Hatu ha Waraka—Magun. vii. 2–12.**Injili—Mat. v. 1–12.*

## KARA-KARA YA KUSONGEZA CHAKURYA CHA BWANA, HEDU UNGARA UERI.

*MWERO wa ao mamalao kukala angara a Ungara Ueri na mamupe Padiri madzina gao, siku ya kulamukira Ungara, hedu mbere.*

*Na kahi za atu ao akioneka mutu amanyikanaye lwazu kukala na mwendo mui, hedu udzaahendera andzie vii kwa neno hedu kwa hendo, hata kuritsukiza Kanisa kwa vizho; yuyahu Padiri akigonya kumanya viryahu, namwihe, amuonye asisubutu kamare kuidzirira Meza ya Bwana, hata andihogonya kulazha mivano iriyo lwazu ya kudzyuta-kwe jeri na ya mwendo-we mui kugaluka; kwamba ro Kanisa rikale radi, ao mariotsukizwa mbere; kidza nakale udzaalazhizha kosa ao ariohendera vii; hedu alage kuhenda vizho, andihopata murongo.*

*Naye Padiri ahende vizho kwa ao aonao kukala na mfundo wa moyo na kuzirana enye na enye; akatsaricha kukala angara a Meza ya Bwana, hata amanye kwamba madzapatana. Na ao madzioheha mumwenga waho akikala-to kumurichira mwandzi-we kwa ndani za moyo-we makosa gosi arigomukosa, na kumulazhira hachi-ye kwa gosi arigomutsukiza iye mwenye; na yuyahu wa hiri akikala kendzi kugwizanywa naye kwa vidzo, ela uchere vizho kahi za vitsukizi-zhe na mfundo wa moyo: vinawirya yuyahu Padiri kumuhokera iye adziyedzyuta audzirire Ungara ueri, akatsamuhokera yuyahu ariye munyeti. Ela kula Padiri akikahaza vizho, here vidzizhoonyeswa kwa malagizo gaga kahi za maneno gaga hedu garyahu garigotongodhya, ni suti kumumanyisa uworo-we yuyahu mwenye amulo, mbere za siku mirongo mine kazidzangwe kutimira, zikatsazidi. Na yuyahu mwenye amulo namuhendere yuyahu mukosa here virizholagizwa kahi za Kanuni.*

*Makati ga Ungara, iryahu Meza ikale idzahandikwa*

*nguvo mbidzo nyaruhe ya katani, naiime kahi-kahi za Mushikiti hedu haryahu harihotengwa, haho hariholagizwa kushomwa Mavoyo ga Madzacha na Dziloni. Naye Kasisi nakale uimire luhande lwa kasikazini lwa Meza, nanene Voyo ra Bwana, hamwenga na Voyo riro ra nyuma-ze, nao atu makale madzapiga mavwindi.*

**B**ABIYEHU uriye ko mulunguni, Dzina-ro rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. Haami.

*Voyo.*

**M**MULUNGU mwenye nguvu zosi, kwako uwe myoyo yosi i lwazu, kumala kosi kudzamanjikana, kidza kakuna utu wa njama udziofitswa kwako; Uyeze myazo ya myoyo yehu kwa kuhuvivira Roho-ro Mweri, hupate kukuhendza kamare, na kurilika Dzina-ro ryeri here zhagirwezho; kwa Jesu Masihi Bwana wehu. Haami.

*Haho Kasisi na aerekeze aryahu atu, anene lwazu MALAGIZO KUMI gosi; na aryahu atu makale vizho madzizhopiga mavwindi, naye akigonya kuhadza kula Lagizo mamuwoye Mulungu aonere mbazi kwa utu wa madzizhorivundza kare, na kuagera nema kurigwira-to hangu vikara; manene here vivi vituwazho.*

*Padiri.*

**M**MULUNGU wanena maneno gaga, akiamba; Mimi ni Bwana Mulungu: Sikale na milungu mingine isihokala mimi tu.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Sidzihendere kizuka chosi cha kutsonga, hedu muhalano wa kitu chosi kiricho mulunguni dzulu, hedu kiricho tsini dzulu ya-tsi, hedu kiricho kahi za madzi

tsini ya-tsi. Sivizamire, hedu sivihase: kwa kukala mimi Bwana Mulunguo ni Mulungu mwenye wivu, naarihiza ana kwa dambi za babizao, hata kizhazi cha hahu na cha-ne cha ao manizirao, na kuaonera mbazi magana-magana manji manihendzao, magagwirao malagizo gangu.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Sirihadze kizuzu Dzina ra Bwana Mulunguo: kwa kukala Bwana kandamuhendya mujeri iye arihadzaye Dzina-re kizuzu.

*Atu.* Bwana fwonere mbazi, uyerekeze myoyo yehu hurigwire amulo riri.

*Padiri.* Ikumbukire siku ya Sabatu uyeze. Siku tandahu humika, uhende kazi-zo zosi; ela siku ya fungahe ni Sabatu ya Bwana Mulunguo. Siku iryahu usihende kazi yosi, uwe mwenye, hedu mwanao mulume, hedu mwanao muche, hedu muhumikio mulume, hedu muhumikio muche, hedu mufugoo, hedu mujeni adziye-angira ndani za muviryo. Kwa kukala kwa siku tandahu Bwana waumba mulunguni na-tsi, na bahari, na zhoshi virizho mumo, akioya siku ya fungahe: ndosa Bwana waihasa siku ya fungahe, akiyeza.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Aishimu babayo na mameyo; siku-zo zipate kukala nyinji kahi za-tsi uriyopewa ni Bwana Mulunguo.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Salage.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Sizinge.

*Atu.* Bwana fwonere mbazi, uyerekeze myoyo yehu hurigwire amulo riri.

*Padiri.* Siye.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Sikale chodherwa cha ulongo kwa mwandzio.

*Atu.* Bwana, fwonere mbazi, uyerekeze myoyo yehu hurigwire amulo riri.

*Padiri.* Sihendere kidzitso nyumba ya mwandzio; simuhendere kidzitso muche wa mwandzio, hedu muhumiki-we mulume, hedu muhumiki-we muche, hedu ng'ombe-ye, hedu ndzowe-ye, hedu chosi aricho nacho mwandzio.

*Atu.* Bwana, fwonere mbazi, ukagaore mamulo-go gaga gosi myoyoni mwehu, hunakuvoya.

*Haha na rishomwe mwenga kahi za Mavoyo gaga mairi ga kumuwoyera Mutawali, yuyahu Kasisi akale wimire here viryahu mbere, naye anene,*

Na huvoye.

**M**MULUNGU mwenye nguvu zosi, utawalio ni wa kare na kare, wadimio kauna ha kusindikiziza; Rionere mbazi Kanisa rosi; nawe utawale moyo wa Muhumikio uriyemutsagula *GEORGE*, Mutawali wehu, Mubomu wehu, hata iye kwa kumanya ni hani amuhumikiraye, mbere za zhoshi amale kwandza ishima-yo na nguma-yo: na siswi na atue osi, kwa kuririkana ni hani ariyemupa amulo, hukale kumuhumikira kwa ukuluhirwi, na kumuishimu, na kumusikira kwa kudzitserereza, kahi za uwe na kwa utuo, kara-kara na Neno-ro na malagizo-go madzo; kwa Jesu Masihi Bwana wehu, ariye moyo na kutawala hamwenga na uwe na Roho Mweri, Mulungu mumwenga siku zosi, kare na kare. *Haami.*

*Hedu,*

**M**MULUNGU mwenye nguvu zosi wa kare na kare, hunafundywa kahi za Neno-ro ryeri kwamba myoyo ya Atawali ni kulagizwa na kutawalwa ni uwe, nawe ni kuigaluzwa na kuilongoza here ionazho vidzo

ikili-zo za Kimulungu ; Siswi hu maguluni hako, huna-kuvoya kwamba ugaluze na kuulongoza moyo wa *GEORGE* Muhumikio, Mutawali wehu, Mubomu wehu, hata kahi za myazo-ye yosi, na maneno-ge gosi, na vihendo-zhe zhosi, amale siku zosi ishima-yo na ngumayo, kidza atuo marioikwa mikononi mwakwe ahende chadi kuarinda, kahi za ushaha, na dheri, na kukuo-goha ; Henda gaga, hewe Baba wa mbazi, kwa utu wa Mwanao muhendzwi, Jesu Masihi Bwana wehu. *Haami.*

*Haho na rishomwe Voyo ra Siku iyo. Akigonya ro Voyo haho lumwenga Kasisi nashome Waraka, anene, Waraka (hedu, Fungu ra Maoro ririrolagizwa hatu ha Waraka) udzaorwa kahi za Muryango musiku wa Waraka usiku unaaha Kifungu kisiku. Naye akigonya Waraka, anene, Waraka udzagoma haha. Kidza nashome Injili (atu osi na majime) anene, Injili yeri idzaorwa kahi za Muryango musiku wa Injili siku unaaha Kifungu kisiku. Akigonya kushoma Injili, na riimbwe hedu rinenwe Kuluhiro riri rituwaro, atu na makale machere kuima, here viryahu mbere.*

**N**AKULUHIRA kwa Mulungu mumwenga, Baba mwenye nguvu zosi, Muumbi wa mulunguni na-tsi, Na vitu zhosi zhonekazho na visizhooneka :

Kidza kwa Bwana mumwenga Jesu Masihi, Mwana wa Mulungu ariyezhahwa hakeye, Ariyezhahwa ni Babaye mbere za kare kosi : Mulungu kahi za Mulungu, Mulangaza kahi za Mulangaza, Mulungu jeri kahi za Mulungu jeri, Wazhalwa, ela kaumbirwe ; Utu-we na wa Baba ni utu umwenga, Kidza kwa iye vitu zhosi zhaumbwa : Naye kwa utu wehu siswi anadamu na kwa wokolwi wehu watsrerera kulaa mulunguni, Akihendywa mwiri ni Roho Mweri kwa Musichana Maryamu, Akihendywa mudamu, Naye akigozhwa kwa utu wehu kahi za indzi ra Pontio Pilato. Akisirinywa, akizikwa, Siku ya hahu aki-fufuka here virizhoorwa, Achanuka, achangira mulunguni,

Naye ukeresi mukono wa kurya wa Baba. Naye unda-kudza kaheri na nguma aalamule mario moyo na mari-ofwa : Na utawali-we kaundakala na musindikizo.

Nakuluhira kwa Roho Mweri, Bwana Mulazhi wa uzima, Alaaye kwa Baba na Mwana, Naye hamwenga na Baba na Mwana ni kuabudiwa na kulikwa, Naye ndeye ariyenena kwa makanwa ga Ambirizi. Kidza nakulu-hira kwa Kanisa mwenga ra urumwengu wosi ririzhoikwa ni Ahumwa. Naahikiza Ubaputizi umwenga wa kuusizwa dambi. Nami naulolera Ufufulo wa mariofwa, Na uzima wa urumwengu udzao. *Haami.*

*Haho Padiri nalazhire atu woro, hakikala hana Siku Bomu kahi za Ijumaa riro ridzaro. Kidza aambire siku za Ungara na Notisi nyingine. Kidza haho ndo Ku-ambiriza. Akigonya, aiwiyire Meza ya Bwana, aahe Tsanzi, ashome kimwenga hedu zaidi kahi za Vifungu vivi vituwanazho, here andizhoona, vidzo mwenye.*

**M**MULANGAZA wenu ung'ale vizho mbere za atu, hata mazone kazi zenu mbidzo, mamulike Babiyentu ariye mulunguni. *Mat. v.*

Sidzikireni mali urumwenguni ; ziriwaho ni poho na kanga, na aivi ni kuobola na kuiya ; ela dziikireni mali mulunguni ; zisikoriwa ni poho hedu kanga, na aivi kamaobola, kamaiya. *Mat. vi.*

Zhosini muhendzazho kuhenderwa ni atu, nanwi ahendereni vizho ; kwani ndo wagiwri na ambirizi. *Mat. vii.*

Si kula mutu anambaye, Bwana, Bwana, andiyeangira kahi za Utawali wa mulunguni, isihokala agahendaye mahendzo ga Baba ariye ko mulunguni. *Mat. vii.*

Akiima Zakio akimwambira Bwana, Lola, Bwana, nusu ya vitu zhangu naagera akia ; nami kala nahala cha mutu kwa kumukenga, namuudziza kana nne.

*Luka xix.*

Ni shikari hiye ahumukiraye makati gosi na kudzitsukula mwenye? Ni hani alayaye munda wa mizabibu, akatsarya ndude-ze? Hedu ni hani arisaye badi, akatsarya maziya ga ro badi? *1 Akor. ix.*

Chamba siswi fwamulayira vitu zha rohoni, ni utu ubomu sana kwamba hundavivuna vitu zheni zha urumwenguni? *1 Akor. ix.*

Kamumanya kwamba ao mahumikao kahi za mautu ga hekalu ni kurya vitu zha hekaluni; na ao mahumikao kizani mana fungu rao ra kiza? Ni vizho zhenye, Bwana walagiza kwamba ao maambirizao Uvoro-udzo mandakala moyo kahi za Uvoro-udzo. *1 Akor. ix.*

Alayaye vichache undavuna vichache; alayaye vinji undavuna vinji. Kula mutu nahende here aonazho moyoni mwakwe, si kwa kusangamiza, hedu kwa nguvu; kwa kukala Mulungu unamuhendza mutu alazhaye na moyo. *2 Akor. ix.*

Iye afundwaye riro Neno na amugazhizhe yuyahu afundayeye vitu vidzo zhosi. Sikengweni, Mulungu katseewa: kwani chosi mudamu alayacho ndo andichovuna. *Agal. vi.*

Hupataho murongo, na huahendere atu osi vidzo; zaidi-ao mario a mbari makuluhirao. *Agal. vi.*

Kuogoha Mulungu na radi ni pato bomu: kwani kahurehere kitu hurihoangira urumwenguni, kidza kahundaadima kutsukula kitu hundihoombola. *1 Tim. vi.*

Lagiza aryahu mario apati kahi za urumwengu uu wa vikara, kwamba makale-to kulazha, makale-to kugazhizha; vizho madziikire enye msinji mudzo hata makati gadzago, kwamba mafikire uzima uryahu urio uzima jeri-jeri. *1 Tim. vi.*

Mulungu katsowa hachi, hata ailaye kazi yenu na mahendzo murigoonyesa ga Dzina-re, kwa viryahu murizhoahumikira aeri, nanwi muchere kuahumikira. *Aheb. vi.*

Silayeni kuhenda-to na kukala angara; kwani Mulungu ni kufwahirwa na sadaka dza zizi. *Aheb. xiii.*

Iye ariye na vitu zha urumwengu uu, kidza unamona

ndugu-ye udzatsowa, naye akiziza mbazi-ze zikatsamufikira, mahendzo ga Mulungu ganatoadze ndani mwakwe iye? *1 Joh. iii.*

Lazha sadaka kahi za urizho nazho, usimugaluzize usoo mukia wosi atungwaye; ndo uso wa Bwana kundakugaluziza uwe. *Tobiti iv.*

Kala na mbazi mwero uadimazho. Ukikala na vinji, lazha zhomu: ukikala na vichache, henda chadi kulazha kahi za viryahu vichache kwa kufwahirwa: kwani vizho undadzikundzumanyizira muza mudzo kwa siku ya utsowi. *Tobiti iv.*

Iye amuoneraye mbazi mukia unamuahasa Bwana: naye undamuriha hendo-re ridzo. *Ndumo xix.*

Baha mutu iye amukumbukiraye mukia; Bwana undamutizha siku ya mashaka. *Wira xli.*

*Makati ga kushomwa Vifungu vivi, mutu airyelagizwa undazihokera pesa za sadaka za atu na kumupa Kasisi, naye undaziika dzulu za Meza nyeri.*

*Ukalaho Ungara, yuyahu Kasisi undaika dzulu za Meza Mukaha na Divei andizhoona vinatosha.*

*Kidza Kasisi undanena,*

Na hurivoyere utu-we Kanisa ra Masihi ririro kahi za viha haha urumwenguni.

**M**MULUNGU mwenye nguvu zosi uriye moyo kare na kare, uwe udzahufundya kwa Muhumwao mweri kuahendera atu osini mavoyo, na madhedhejo, na mivera; Siswi hu maguluni hako, hunakuvoya kwa mbazi-zo uhokere [*sadaka zehu na vigerwa zhehu, na*] mavoyo gehu gaga, hulazhago kwa Indzi-ro ra Kimulungu; hunakuvoya kwamba urivivire siku zosi Kanisa ra urumwengu wosi roho ra ujeri, na umwenga, na masikirano: Nawe hugere kwamba osi maahikizao Dzina-ro ryeri masikirane kahi za ujeri wa Neno-ro ryeri, na kukala kahi za umwenga na uhendzano udzo. Kidza hunakuvoya uaokole uachinge Atawali osi a Kimasihia

*Na hasiholazhwa sadaka hedu vigerwa maneno gaga [sadaka zehu na vigerwa zhehu na] gakatsashomwa.*

na Madzumbe na Enye wadimi ; na zaidi hunamuvoyera Muhumikio *GEORGE* Mutawali wehu ; kwamba huta-walwe tsini-ze kwa udzo na dheri : Uape atu osi a moroni mwakwe, na osi mariogerwa wadimi tsini-ze, malamule ujeri hasiho kuhendzegeza, maupige utiriri na uwi, na kurungaraza dini-yo ya ujeri, na mautu madzo. Uagere nema, hewe Baba wa mulunguni, Mabishopu osi na Atsundzi a maroho ga atu, kwamba ao kwa mwendo wao na kwa mafundyo gao marigunule lwazu Neno-ro ra ujeri ririro moyo, na Sakaramenti-zo nyeri mazisongeze kara-kara na kwa hachi : na atuo osi uagere nema-yo ya mulunguni ; zaidi mutunganano uu urio haha ; kwamba kwa myoyo ya kudzitsereza na ishima ya kara-kara marisikire Neno-ro ryeri marihokere ; makuhumikire jeri kwa ueri na hachi siku zao zosi. Naswi kwa kudzitse-reza zhomu, hunakuvoya hewe Bwana, kwa udzoo uahurize na kuaavwiza osi kahi za uzima uu ukirao mario na masirinyo, hedu kigondzi, hedu utsowi, hedu ukongo, hedu utsungu ungene wosi. Kidza Dzina-ro ryeri hunarilazhira muvera kwa utu wa ahumikio osi marioufwerera uzima uu kahi za kukukuluhira na kukuogoha ; hunakuvoya kwamba uhugere siswi nema hupate kutuwa kuonyesa kwao kudzo, hata vikale siswi hamwenga nao kukala angara a utawalio wa mulunguni : Hugere gaga, hewe Baba, kwa utu wa Jesu Masihi, ariye Muneneri wehu, Mwavwizi wehu. *Haami.*

*Makati ga Kusongezwa uryahu Ungara, aryahu mandikokala Angara makigonya kukala-to here mandizhokera Sakaramenti nyeri, yuyahu Kasisi nagashome Maonyo gaga.*

**A**HENDZWI kahi za Bwana, murio na myoyo ya kudza kwa Ungara ueri wa Mwiri-we na Milatso-ye Mokoli wehu Masihi, mwaagirwe ni kuririkana viryahu Mweri Paolo aambirazho atu osi kwamba madzijeze zhomu na kudzipeleleza, mbere kamadzasubutu kurya

Mukahe uryahu, na kunwa kahi za Kiparya kiryahu. Kwa kukala kwa viryahu ririzho bomu pato, hukiihokera Sakaramenti iryahu nyeri kwa myoyo ya kudzyuta jeri na kuluhiro ririro moyo ; (kwani haho ndo huryaho kwa roho mwiri wa Masihi, na kuinwa milatso-ye ; haho ndo hukalaho ndani ya Masihi, naye Masihi ndani mwehu ; naswi hudzakala utu umwenga na Masihi, na Masihi hamwenga naswi ;) bai vizho mazani ni manji, hukiihokera Sakaramenti iryahu kwa ngira isiyogirwa. Kwa kukala ndo Mwiri-we na Milatso-ye Masihi i dzulu zehu ; hunakurya hunakunwa kupigwa ulongo kwehu enye, kwa kutsamanya Mwiri wa Bwana ; hunadzibusiza koro za Mulungu ; hunamusongeza ahupige na makongo mangine-mangine, na midhemba mingine-mingine ya kifwa. Bai ndugu zangu, dzilamuleni enye, pore mukalamulwa ni Bwana ; dzyuteni jeri dambi zenu zirizokira ; kalani na kuluhiro ririro moyo risirorega-rega kwa Masihi Mokoli wehu ; ihendeni-to myendo yenu, muhendzane-to na atu osi ; vizho mundafwaha kukala angara a njama ziriyahu nyeri. Kidza dzulu za gosi mwaagirwe ni kumulazhira Mulungu muvera kwa kudzitsereza zhomu na kwa myoyo, Mulungu Baba, na Mwana, na Roho Mweri, kwa viryahu arizhoukombola urumwengu kwa kufwa-kwe na kusirimakwe Mokoli wehu Masihi, ariye Mulungu kidza ni mudamu ; ariyedzitsereza, hata akifikira cho kifwa cha Muhi wa kulinganywa, kwa utu wehu siswi hurio enye dambi anyonge, huriokala hurere kizani kahi za kivurivuri cha kifwa ; apate kuhendya hukale ana a Mulungu, na kufwanula hata uzima wa kare na kare. Kidza kwamba siswi hupate siku zosi kukumbukira mahendzo mabomu zhomu ga Bwana wehu, Mokoli wehu ariye hakaye, Jesu Masihi, kahi za kufwa viryahu kwa utu wehu, na kukumbukira mapato gasigotalika arigohupatira kwa kumwaga milatso-ye ya kima zhomu ; udzaika na kulagiza njama nyeri, zikale mifunga ya mahendzo-ge, ukumbukizo wa siku zosi wa kifwa-che, kwa kuhupatira uhurizi unji usiogoma. Bai na humulazhire iye, hamwe-

nga na Baba na Roho Mweri, muvera wa siku zosi (here zhagirwezho zhomu); kwa kudziika kamare tsini za mahendzo-ge maeri na radi-ye, na kuhenda chadi kumuhumikira kwa ueri na hachi ya ujeri siku zosi za kukala moyo kwehu. *Haami.*

*Haho Kasisi naambire ao mausongererao Ungara ueri maneno gaga,*

**H**ENWI mudzyutao jeri dambi zenu kwa ndani ya myoyo yenu, murio kahi za kuhendzana na kuonerana mbazi na andzienu, nanwi munamala mukale na mwendo musha, kwa kugatuwa malagizo ga Mulungu, na kwa kwenda hangu vikara kahi za ngira-ze nyeri; Songerani hehi na kukuluhira, muhale Sakaramenti ii nyeri mupate kuhurizwa myoyo; nanwi zisemeni dambi zenu kwa kudzitserereza mbere za Mulungu mwenye nguvu zosi, mupige mavwindi kwa upore.

*Haho ndo kwa dzina ra osi mamalao kuhokera Ungara ueri maneno gaga ga kusema dambi na ganenwe ni Padiri mumwenga; naye na atu osini makale madzapiiga mavwindi kwa upore, manene vivi,*

**M**ULUNGU mwenye nguvu zosi, Babe Bwana wehu Jesu Masihi, Muumbi wa vitu zhosi, Mulamuli wa atu osi; Siswi dambi zehu za midhemba-midhemba na mai gehu gosi hunagasema na kugaririra, Hurigoga-henda punde kwa punde, Kwa myazo, na maneno, na mahendo, Ga kutsukiza sana kwako uwe mwenye Indzi ra Kimulungu, Hukidzivuhira koro-zo na tsukizi-yo kwa hachi. Hunadzyuta zhomu kwa jeri, Huna utsungu myoyoni kwa utu wa makosa gehu gago; Hukigakumbukira hunaakakwa; Muzigo-we kautsukulika. Fwonere mbazi, Fwonere mbazi, hewe Baba uriye na mbazi nyinji; Kwa utu wa Mwanao Bwana wehu Jesu Masihi, Uhuusize gosi garigokira; Uhugere kwamba hangu vivi siku zosi Hukuhumikire na kukufwahira Kahi za usha wa mwendo, Kwa kuriishimu na kurilika Dzinaro; Kwa Jesu Masihi Bwana wehu. *Haami.*

*Haho Kasisi naaime (hedu Bishopu akikala haho), na aerekeze aryahu atu, anene, Usiro riri ra dambi.*

**M**MULUNGU mwenye nguvu zosi, Babiyehu wa mulunguni, ariyelaga kwa mbazi-ze nyinji kwamba undaausiza dambi osi magalukao kwakwe kwa kudzyuta kwa moyo na kuluhira ra ujeri; Amuonere mbazi ninwi; amuusize dambi zenu zosi, amuokole nazo; amurungaraze na kumugera nguvu kutimiza udzo wosi; amurehe kahi za uzima wa kare na kare; kwa Jesu Masihi Bwana wehu. *Haami.*

*Haho Kasisi nanene,*

Sirikizani garizho ga kuhuriza moyo maneno ga Mokoli wehu Masihi aambirago atu osi magalukao kwakwe kwa jeri.

**N**DZOONI kwangu henwi nyosini musirimao na kuremererwa, nami nindamuoyeza. *Mat. xi. 28.*

Mulungu viryahu arizhouhenda urumwengu, wagera atu Mwana-we ariyezhalwa hakeye, kwamba kula amukuluhiraye iye akatsaangamika, akale na uzima wa kare na kare. *Joh. iii. 16.*

Sirikizani kaheri anenazho Mweri Paolo.

Neno riri ni ra kukuluhirwa, raagirwe ni kuhokerwa ni atu osi, kwamba Masihi Jesu wakudza urumwenguni aaokole enye dambi. *1 Tim. i. 15.*

Sirikizani kaheri anenazho Mweri Johane.

Mutu akikala udzahenda dambi, huna Mwaywizi kwa Baba, Jesu Masihi mwenye hachi; naye nde ariye sadaka ya dambi zehu. *1 Joh. ii. 1.*

*Kidza yuyahu Kasisi naenderere anene,*

Anulani myoyo yenu.

*Kuahika.* Hunamuanulira Bwana.

*Kasisi.* Na humulazhire muvera Bwana wehu Mulungu.

*Kuahika.* Vinawirya huhende vizho, ni kara-kara.



*Haho Kasisi naierekeze Meza ya Bwana, anene,*

**N**DO viwiryazho zhomu, zha kara-kara, ndo fwa-agirwezho kamare, kwamba sisiwi makati gosi, na kula hatu hukulazhire muvera, hewe  
\* Maneno ga-ga (Baba Mweri) gakatsashomwa siku ya Juma-apili ya Uhahu. Bwana,\* Baba Mweri, Mulungu mwenye nguvu zosi uriye wa kare na kare.

*Haho gashomwe maneno gadzigoikwa kwa siku iryahu, hedu ikikala ni siku isiyokirwa maneno-ge naenderere kushoma gaga,*

**K**WA utu uu sisiwi naswi hamwenga na Malaika na Malaika Abomu, na zheti zhosi zha mulunguni, hanarikunya na kurilika Dzina-ro ra nguma; hu kahi za kukulika siku zosi, hunanena, Mweri, mweri, mweri, Bwana Mulungu wa zheti, mulunguni na-tsi zhedzere nguma-yo: Nguma na ikale kwako, hewe Bwana uriye dzulu zhomu. Haami.

#### MANENO GARIGOIKWA GA SIKU ZA LWAKWE-LWAKWE.

*Siku ya Kirisimasi, na siku fungahe nyumaze.*

**K**WA viryahu urizhohugera Jesu Masihi Mwanao ariye hakeye azhalwe kwa utu wehu sisiwi makati dza gaga; iye ariyehendywa mudamu kamare wa utu wa mwiri wa Musichana Maryamu mameye; kwa kazi iryahu ya Roho Mweri; hasiho hata kapalata ka dambi, kwamba ahutsuse dambi zosi. Kwa utu uu sisiwi naswi, (na mangine).

*Siku ya Ufufulo, na siku fungahe nyumaze.*

**E**LA fwaagirwe zhomu ni kukulika kwa utu wa Kufufuka kwa nguma kwa Mwanao Jesu Masihi Bwana wehu: kwani ndeye Mwana wa Ng'ondzi wa Pasaka wa jeri, ariyelazhwa sadaka kwa utu wehu, akiziusa dambi za urumwengu; naye kwa kifwa-che achononga kifwa,

na kwa kufufuka-kwe kukala moyo akihuudziza siswi uzima wa kare na kare. Kwa utu uu sisiwi naswi, (na mangine).

*Siku ya Kuanuka, na siku fungahe nyumaze.*

**K**WA utu wa Mwanao umuhendzaye zhomu Jesu Masihi Bwana wehu; ariyeaombolera lwazu Ahumwae osi nyuma za Kufufuka-kwe kwa nguma nyinji, kidza mbere za matso gao achanuka achenda mulunguni kuhuhendera-to hatu; kwamba ariho iye, sisiwi naswi fwaanuke kwenda haho, na kutawala hamwenga naye kahi za nguma. Kwa utu uu sisiwi naswi, (na mangine).

*Siku ya Pentekosito, na siku tandahu nyumaze.*

**K**WA utu wa Jesu Masihi Bwana wehu; ambaye zhakala ni kwa kilagane-che cha ujeri Roho Mweri arizhotserera makati dza gaga kulaa mulunguni, hamwenga na vumi bomu ririrokudza kimoho-moho, here luvuto lubomu, were una muhalano wa ndimi za moho, zirizotulama dzulu za vitswa zhao aryahu Ahumwa, kwa kuafundya, na kualongoza kahi za ujeri wosi; akiapa vigerwa zha maneno ga midhemba-midhemba, na zha ugumbao wa kuambiriza Uvoro-udzo kwa kolo zosi za atu, siku zosi kwa chadi, hasiho kutsoka; ndosa sisiwi fwaombozwa kahi za kiza na makosa, hukirefwa kahi za mulangaza mudzo na kahi za kukumanya uwe kwa jeri, na Mwanao Jesu Masihi. Kwa utu uu sisiwi naswi, (na mangine).

*Siku ya Uhahu, iyo tu.*

**U**RIYE Mulungu mumwenga, Bwana mumwenga; si kwamba u Nafusi mwenga tu, ela u Nafusi tahu kahi za Utu umwenga. Kwani viryahu huvikuluhirazho zha nguma za Baba, ndo huvikuluhirazho zha Mwana, na zha Roho Mweri, hasiho lwakwe-lwakwe hedu ubomu na utite. Kwa utu uu sisiwi naswi, (na mangine).

*Akigonya gaga haho henye na gashomwe hedu gaimbwe maneno gaga,*

**K**WA utu uu siswi naswi hamwenga na Malaika na Malaika Abomu, na zheti zhosi zha mulunguni, hunarikunya na kurilika Dzina-ro ra nguma; hu kahi za kukulika siku zosi, hunanena, Mweri, mweri, mweri, Bwana Mulungu wa zheti, mulunguni na-tsi zhedzere nguma-yo: Nguma na ikale kwako, hewe Bwana uriye dzulu zhomu. Haami.

*Haho Kasisi napige mavwindi hariho na Meza ya Bwana, anene kwa dzina ra aryahu osi mandiohokera Ungara Voyo riri rituwaro.*

**K**AHUSUBUTU kuidzirira Meza-yo ii, hewe Bwana mwenye mbazi, kwa kuikuluhira hachi yehu siswi enye, ela kwa kuzikuluhira mbazi-zo bomu zirizo nyinji. Kahufwaha hata kuzizola puku-puku zirizo tsini za Meza-yo. Ela uwe ndiwe Bwana yuyahu uoneraye mbazi siku zosi: Bai, Bwana wa nema, uhugere siswi kurya nyama za mwiri wa Mwanao muhendzwi Jesu Masihi, na kuinwa milatso-ye, hata miiri yehu iriyo na dambi itsuswe kwa mwiri-we, na maroho gehu gaogeswe kwa milatso-ye iriyo ya kima zhomu, hupate vikara na siku zosi kukala ndani mwakwe, naye akale ndani mwehu. Haami.

*Yuyahu Kasisi, akiima mbere za Meza, andihogonya kwihenda-to Mukaha na Divei, kwa viryahu andizhoadima kuumogola uryahu Mukaha kara-kara mbere za atu, na kukihala Kiparya mikononi mwakwe, ndo anene Voyo riri ra Kuvika kwa Mulungu.*

**M**MULUNGU mwenye nguvu zosi, Babiyehu wa mulunguni, kwa mbazi za moyoo wahupa Mwanao wa hakeye Jesu Masihi afwe dzulu za Muhi wa kukinganywa ahupatire ukombolwi; naye haho, kwa kudzilazha akale sadaka mwenga iriyolazhwa lumwenga tu, wahenda sadaka, na maombozozo, na marihiro, garigotimira na kumarigizika na kutosha, kwa utu wa

dambi za urumwengu wosi; naye akiaha, akihulagiza siswi kahi za Uvoro-we udzo ueri fwenderere nao ukumbukizo wa siku zosi wa kifwa-che kiryahu cha kima zhomu, hata andihokudza kaheri; Uhusikire, siswi hurio maguluni hako, hewe Baba wa mbazi; nawe uhugere kwamba huvihokeraho vitu vivi virizhoumbwa ni uwe, mukahe na divei, here arizholagiza Mwanao Mokoli wehu Jesu Masihi, kwa kukumbukira kusirimakwe na kufwa-kwe, hupate kukala angara a Mwiri-we na Milatso-ye virizho vidzo zhomu: naye, usiku uryahu wa kulonderwa-kwe,\* wahala \* *Haho Kasisi naihale Chano mikononi mwakwe:*  
Mukahe; naye arihogonya kula-  
zha muvera,† akiumogola, aki- † *Haho aumogole Mukaha:*  
apa anafundie, akiamba, Ha- ‡ *Haho naike mukono-we dzulu za Mukaha wosi.*  
lani, murye, uu ‡ ndo Mwiri  
wangu mugerwao kwa utu wenu: Hendani vivi kwa kunikumbukira mimi. Vizho § *Haho akihale kiryahu Kiparya mikononi mwakwe:*  
nyuma za Chakurya § akikihala  
kiryahu Kiparya; naye arihogonya kulazha muvera, akaiapa, akiamba, Nwani nyosini kahi za kiki; kwani ii || ndo Milatso yangu ya Kila- || *Haho awike mukono dzulu za kula kiyu (kikihala Kiparya, hedu Dumu) kiricho na Divei indiyokwa kwa mantu ga Mulungu.*  
gane Kisha, imwagwayo kwa utu  
wenu ninwi na kwa atu anji,  
kwa usiro ra dambi: Hendani  
vivi, kula mundihoinwa, kwa kunikumbukira mimi.  
Haami.

*Haho yuyahu Padiri kwandza nauhale Ungara iye mwenye midhamba yosi miiri, kidza aenderere kuagera Mabishopu, na Makasisi, na Mashemasi, vizho, (makikala haho atu ao,) kidza aagere atu vizho kara-kara, mikononi mwao, nao osi makale madzapiga mavwindi. Naye amugeraho mitu uryahu Mukaha naambe,*

**M**WIRI wa Bwana wehu Jesu Masihi, uriyolazhwa kwa utuo, na ukurinde mwiri na roho hata uzima wa kare na kare. Uhale uu uurye, kwa kukumbukira

viryahu Masihi arizhofwa kwa utuo; nawe uurise moyoo kwakwe kwa kuluhiro na muvera.

*Naye Padiri amugeraye mutu Kiparya, naambe,*

**M**MILATSO ya Bwana wehu Jesu Masihi, iriyomwagwa kwa utuo, na ikurinde mwiri na roho hata uzima wa kare na kare. Nwaa ii kwa kukumbukira milatso ya Masihi irizhomwagwa kwa utuo, ukale na muvera.

*Mukahe na Divei virizhoikwa kwa Mulungu vikimarigizika mbere kamadzangwe kupewa ungara osi, yuyahu Kasisi nazhike vingine kwa Mulungu kwa kugatuwa Maneno garyahu garigolagizwa mbere; aahe haho (Mokoli wehu Masihi usiku uryahu) kwa kuhasa Mukahe; na haho (Vizho nyuma za Chakurya) kwa kukihasa kiryahu Kiparya.*

*Mandihokala madzapewa ungara osi, yuyahu Padiri naiuyire Meza ya Bwana, azhike dzulu-ze kwa ishima viryahu virizhosala kahi za vitu virizhoikwa kwa Mulungu, avibiningize na kidemu kidzo cha katani.*

*Kidza haho Kasisi narinene Voyo ra Bwana, aryahu atu maambukize nyuma-ze gago kwa gago.*

**B**BABIYEHU uriye ko mulunguni: Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni; Ela ufwokole na mai: Kwa kukala utawali, na nguvu, na nguma, ni zhako uwe, Kare na kare. Haami.

*Kidza naganene gaga here gatwanazho.*

**H**EWWE Bwana ndiwe Babiyehu wa mulunguni, siswi ahumikio hu maguluni hako, hunamala zhomu kwa udzoo wa Ubaba, uihokere kwa mbazi ii sadaka yehu ya kulika na muvera; hunakuvoya kwa kudzitsereza zhomu, uhugere kwa utu wa kufwaha-kwe Mwanao

Jesu Masihi, na kufwa-kwe, na kwa viryahu hukulu-hirazho milatso-ye, kwamba siswi na Kanisa-ro rosi hupate usiro ra dambi zehu, na mapato manginge gosi ga kusirima-kwe. Naswi haha hunadzilazha siswi enye, na kudzisongeza kwako, hewe Bwana, maroho gehu na miiri yehu, hupate kukala sadaka ya kara-kara, nyeri, iriyo moyo kwako uwe; naswi haha maguluni hako hunakuvoya kwamba, siswi hosini hudziokala angara kahi za Ungara uu ueri, fwadzadzwe ni nema-yo na kuhasako kwa mulunguni. Naswi hungahokala kahufwaha, kwa utu wa dambi zehu za midhamba minji, kukulazhira sadaka yosi itungwayo, ela hunakuvoya uhokere kazi ii ifwagireyo, uhumiki wehu; nawe sipime kufwaha kwehu ela uhuusize makosa gehu, kwa Jesu Masihi Bwana wehu; kwa iye, uwe hamwenga naye, kahi za umwenga wa Roho Mweri, upewe ishima yosi na nguma yosi, hewe Baba mwenye nguvu zosi, kare na kare. Haami.

*Hedu riri.*

**M**MULUNGU mwenye nguvu zosi uriye moyo kare na kare, hunakulazhira muvera zhomu, kwa viryahu uonazho-to kuhurisa siswi, hudziokudza hokera njama zizi nyeri here zhagirwezho, chakurya cha roho cha Mwiri na Milatso zha Mwanao Mokoli wehu Jesu Masihi, virizho zha kima zhomu; nawe kwa utu uryahu unahumanyisa kwamba siswi ni kuhendzwa na kuhenderwa vidzo ni uwe; na kwamba hu vilungo jeri-geri virizho ndani ya mwiri wa njama wa Mwanao, nao ndo kundi ridzo ra atu osi makuluhirao; kidza kwamba kwa tamaa mbidzo hu ahali a ufwa a utawalio wa kare na kare, kwa kufwaha kwa kifwa-che cha kima zhomu cha Mwanao Muhendzwio, na kusirinywa-kwe. Naswi hu maguluni hako, hewe Baba wa mulunguni, hunakuvoya, ufwavwize kwa nema-yo, hata hupate kwenderera kahi za ungara uryahu ueri, na kuhenda kazi zosi mbidzo udzizohendera-to hangu haho kwamba fwenderere nazo; kwa Jesu Masihi Bwana wehu, naye, hamwenga

na uwe na Roho Mweri, akale na ishima yosi na nguma yosi, kare na kare. *Haami.*

*Haho ganenwe hedu gaimbwe maneno gaga,*

**N**NGUMA na ikale kwa Mulungu ariye dzulu, na dheri kahi za-tsi, radi kwa anadamu. Hunakulika uwe, hunakuhasa, hunakuabudu, hunakukunya, hunakulazhira muvera kwa utu wa nguma-yo bomu, hewe Bwana Mulungu, Mutawali wa mulunguni, Mulungu Baba mwenye nguvu zosi.

Hewe Bwana, Jesu Masihi, Mwana uriyezhala hakeyo; hewe Bwana Mulungu, Mwana-wa-Ng'ondzi wa Mulungu, Mwana wa Baba, uwe uzusaye dambi za urumwengu, ufwonere mbazi. Uwe uzusaye dambi za urumwengu, hokera kuvoya kwehu. Uwe ukeresiye mukono wa kurya wa Mulungu Baba, ufwonere mbazi.

Kwani ni uwe hakeyo uriye Mweri; ni uwe hakeyo uriye Bwana; ni uwe hakeyo, hewe Masihi, hamwenga na Roho Mweri, uriye dzulu zhomu kahi za nguma ya Mulungu Baba. *Haami.*

*Haho Kasisi (hedu Bishopu akikala haho) aafumule kwa kuahasa vivi.*

**D**HERI ra Mulungu, ridzirokira ikili zosi, na rimurinde myoyo yenu na myazo yenu kahi za kumumanya na kumuhendza Mulungu, na Mwanawe Jesu Masihi Bwana wehu: na uhaswi wa Mulungu mwenye nguvu zosi, Baba, na Mwana, na Roho Mweri, ukale kwenu na kutoa hamwenga nanwi siku zosi. *Haami.*

*Mavoyo gashomwago nyuma za kutsanga Tsanzi, kula siku, isiyokala na Ungara, na rishomwe mwenga hedu zaidi; nago na gashomwe here vindizhofwaha nyuma za mavoyo garyahu garigo ga Mavoyo ga Madzacha hedu ga Dziloni, hedu nyuma za Ungara ueri, hedu Litania, here yuyahu Padiri andizhoona-to.*

**U**FWAVWIZE kwa mbazi, hewe Bwana, kahi za mavoyo gehu gaga, nawe ierekeze ngira ya

ahumikio mapate kuufikira wokolwi wa kare na kare; kwamba kahi za magaluzo na mautu gosi ga uzima uuugwirwao ni kifwa, machingwe siku zosi kwa wavwizio udzo zhomu urio-to; kwa Jesu Masihi Bwana wehu. *Haami.*

**H**EWWE Bwana mwenye nguvu zosi, uriye Mulungu wa kare na kare, siswi hu maguluni hako, hunakuvoya uone-to kuhulongoza, na kuhueza, na kuhutawala, myoyo yehu na miiri yehu, kahi za ngira za maamulo-go, na kahi za kazi za malagizo-go; kwamba kwa kurindwa ni uwe kwa nguvu zosi, haha urumwenguni na kare na kare, hupate kutsundzwa miiri yehu na maroho gehu; kwa Bwana wehu Mokoli wehu Jesu Masihi. *Haami.*

**M**MULUNGU mwenye nguvu zosi, hunakuvoya kwamba maneno gaga hudzigogasikira vivi rero na masikiro gehu ga-ndze, gaangizwe kwa nema-yo kahi za myoyo yehu ya ndani, hata gazhale ndani mwehu ndude za mwendo mudzo, kwa kurirehera Dzina-ro ishima na nguma; kwa Jesu Masihi Bwana wehu. *Haami.*

**U**HULONGOZE, hewe Bwana, kahi za vihendo zhehu zhosi kwa mahendzo-go madzo, uhufishe mbere kwa kufwavwiza siku zosi; kwamba kwa kazi zehu zosi kuafwa, na kufururizwa, na kumarigizwa ndaniyo uwe, hupate kurilika Dzina-ro ryeri, na musindikizoni kwa mbazi-zo hupate uzima wa kare na kare; kwa Jesu Masihi Bwana wehu. *Haami.*

**M**MULUNGU mwenye nguvu zosi, uriye chaho cha ikili zosi, unamanya utsowi wehu mbere kahudzangwe kuvoya, na ujinga wehu wa kuvoya; Hunakuvoya uonere mbazi uhuye-huye wehu; nago mautu garyahu husigosubutu kugavoya kwa utu wa kutsafwaha kwehu, kidza kahuadima kugavoya kwa kutsaona kwehu, hendza kuhugera gago, kwa kufwaha-kwe Mwanao Jesu Masihi Bwana wehu. *Haami.*

**M**MULUNGU mwenye nguvu zosi, walaga kwamba undasikira mavoyo ga ao mavoyao kwa Dzina ra Mwanao; Hunakuvoya uhuzanyire masikiro-go siswi hudziokuvoya vikara; nawe uhugere kwamba, mautu garyahu hudzigogavoya kwa kukuluhira here uhendzazho, hugapate jeri, kwamba utsowi wehu uavwizwe, na nguma-yo ienezwe; kwa Jesu Masihi Bwana wehu. *Haami.*

*Siku za Jumaapili na siku bomu nyingine (hakikala kahana Ungara) na gashomwe gosi garigolagizwa kushomwa makati ga Ungara, hata musindikizo wa Voyo ra kuavoyera atu osi [Utu-we wosi Kanisa ra Masihi ririro kahi za viha haha urumwenguni] hamwenga na mwenga hedu zaidi kahi za Mavoyo gago gadzigorefwa haha, kusindikiza na Uhaswi.*

*Na Chakurya cha Bwana kikatsasongezwa, masihopatikana atu mwero wa kutosha kukala angara hamwenga na Kasisi, here andizhoona kara-kara.*

*Na atu a Mihaka ya Mushikiti makikala kamakira mirongo miiri ao mafwahao kuhokera Ungara; ela Ungara usihendeke, isihokala ane (hedu ahahu makatsahunguka) makale angara hamwenga na Kasisi.*

*Na kwa kuusa kula chausa kiadimacho kureha kudhi-mana hedu maazo gasigofwaha, kwa mutu wosi atungwaye hatu ha uryahu Mukahe na iryahu Divei, indatosha kwamba uryahu Mukahe na ukale here uriwazho siku zosi; ela naukale Mukahe wa Nganu urio mudzo wa to-to-to mwero wa undiopatikana zhangwangu.*

*Na kikisala kitu kahi za Mukahe na Divei kisichoikwa kwa Mulungu, yuyahu Padiri nakitsukule akihumire mwenye: ela kikisala kitu kahi za kiryahu kirichoikwa kwa Mulungu, kisitsukulwe-ndze ya Mushikiti, ela Kasisi na angara angine mwero wa andioaiha mamudzirire, haho lumwenga nyuma za Uhaswi, na marya manwe na ishima viryahu vidzizhosala.*

*Mukahe na Divei zha Ungara virefwe ni Padiri na Arindzi a Mushikiti, kima-che kikale dzulu za atu a mihaka-ye Mushikiti.*

*Tsundza riri, kula mutu wa mihaka ya mushikiti nakale mungara kana tahu kahi za mwaka, akatsahunguza, na kahi za kana tahu zizi mwenga naikale siku bomu ya Ufufulo.*

## UBAPUTIZI WA AHOHO,

### MBERE ZA ATU MUSHIKITINI.

*Atu na maonyeswe kwamba, vinafwaha zhomu Ubaputizi ukatsahendwa isihokala siku za Jumaapili, hedu Siku bomu nyingine, kwa kukala ndo atu anji matungananaho; na Mutunganano uo unaadima kukala zho-dherwa zha ao mabaputizwao haho kwamba madzakerwa ndani ya mutalo wa Kanisa ra Masihi; kidza kahi za Ubaputizi wa Ahoho kula mutu ariye haho apate kukumbukizwa arizholagana mwenye na Mulungu kahi za Kubaputizwa-kwe. Kwa utu uu vinafwaha kwamba Ubaputizi uhendwe kwa kuhumira maneno ga-tsi. Hamwenga na gaga, vikikala kuna chausa, Ahoho mana-adima kubaputizwa siku nyingine yosi itungwayo.*

*Gwira riri, kula mahoho mulume andiyebaputizwa nakale na Aimirizi ahahu, alume airi na muche mumwenga; na mahoho muche nakale na ache airi na mulume mumwenga.*

*Vikikala hana Ahoho mamalao kubaputizwa, Azhazi ao ni kumupa yuyahu Padiri uworo, siku ya kula-mukira siku-ye, hedu madzacha-ge, mbere atu kama-dzangwe kuaha Mavoyo ga Madzacha. Ndo ao Aimirizi nao enye ahoho mende hehi na Fonti makale-to, nyuma za Mashomo ga hiri kahi za Mavoyo ga Madzacha, hedu nyuma za Mashomo ga hiri kahi za Mavoyo ga Dziloni, here yuyahu Padiri andizhoona vidzo kulagiza. Naye Kasisi adzaho hehi na Fonti,*

(*nayo ni kuadzazwa Madzi madzo*), *naiame haho, nanene,*

**M**WANA yuyu wabaputizwa kare, hedu-dze ?  
*Makiudzigidzya, Kadzangwe : ndo Kasisi naenderere kunena gaga.*

**A**HENDZWI zhomu, kwa viryahu atu osi marizhotsu-kulirwa mimba na kuzhalwa kahi za dambi; na kwa kukala Mokoli wehu Masihi wamba, Kahana mutu aadimaye kuangira utawali wa Mulungu, asihozhalwa lwa hiri na kupewa uzhazi usha kwa Madzi na kwa Roho Mweri; ninamumala ninwi mumuvoye Mulungu Baba, kwa Bwana wehu Jesu Masihi, kwamba kwa udzo-we urio unji *amugere mwana yuyu* neno riryahu *asiroadima* kupata kwa utu-we; naro ndo kubaputizwa kwa Madzi na kwa Roho Mweri, na kuhokerwa kahi za Kanisa ryeri ra Masihi, na kuhendywa *kibungo kiricho moyo cha Kanisa riryahu.*

*Ndo Kasisi nanene,*

Na huvoye.

**M**MULUNGU mwenye nguvu zosi wa kare na kare, uwe kwa mbazi-zo bomu wamokola Nuhu na aryahu a nyumbani mwakwe kwa riryahu safina makatsaangamika madzini; kidza waalongoza-to ana a Isiraeli atuo kahi-kahi za Bahari Tune, kwa kuonyesa mumo muhalano wa Ubaputizio ueri; kidza kwa Kubaputizwa-kwe Mwanao muhendzwio zhomu Jesu Masihi kahi za muho wa Jorodani wagaenza Madzi gakale ga kuogeseza dambi kinjama; Hunakovoya, kwa utu wa mbazi-zo zisizo na musindikizo, *umulole mwana yuyu* kwa mbazi; umogese na kumueza kwa Roho Mweri, kwamba hamwenga na kutia na koro-zo, ahokerwe safinani mwa Kanisa ra Masihi; kidza kwa viryahu andizhorungarara kahi za kuluhiro, na kufwahirwa kahi za tamaa mbidzo, na masina-ge kuhindzya kahi za kuhendzana, *apate kuvuka maimbi ga urumwengu uu wa masirinyo, hata musindikizoni afike-tsi iryahu ya*

uzima wa kare na kare, *atawale kuko hamwenga na uwe kare na kare; kwa Jesu Masihi Bwana wehu. Haami.*

**M**MULUNGU mwenye nguvu zosi usiyedhimwa ni kifwa, ndiwe uangizaye tiba ao mario na utsowi, u mwavwizi wao makuchimbirirao, uzima wao makuluhirao, ufufulo wao mariofwa; Hunamuvoyera *muhoho yuyu*, kwamba vivi audzirirazho Ubaputizio ueri, *apate kuusizwa dambi-ze* kwa uzhazi usha wa rohani. *Umuhokere, hewe Bwana, here urizholaga kwa Mwanao muhendzwio zhomu, arihonena, Voyani, mundapewa; malani mundaona; bishani munda-sundulirwa: Bai vizho vikara uhupe siswi huvoyao; siswi humalao huone; uhusundulire muvirya siswi hubishao; kwamba muhoho yuyu afwahirwe na uhaswi wa kare na kare wa kuogesa-ko kwa mulunguni, naye apate kuufikira utawalio wa kare na kare uriohulaga kwa Masihi Bwana wehu. Haami.*

*Haho atu na maimbe, naye Kasisi anene,*

Sirikizani maneno ga Uvoro-udzo urioorwa ni Mweri *Mariko, Muryango wa kumi, Kifungu cha kumi na tahu.*

**A**TU makimurehera Masihi ahoho atite, *apate kuaguta; nao anafundi makiachemera ao marioareha. Ela Jesu arihoona viryahu, akitsukirwa, akiaambira, Aricheni ahoho atite manidzirire, siakahazeni; kwani utawali wa Mulungu ni wa here aa. Ni jeri namuambira, Asiyehokera utawali wa Mulungu here viryahu muhoho mutite, kandauangira kamare. Kidza akiatsukula mikononi mwakwe, akiakira mikono-ye, akiahasa.*

*Nyuma za kushomwa Uvoro-udzo, yuyahu Padiri nage-rehe maonyo gaga machache kahi za maneno ga Uvoro-udzo.*

**A**HENDZWI, kahi za Uvoro-udzo uu mudzagasikira maneno ga Mokoli wehu Masihi, arizholagiza kwamba ahoho marefwe kwakwe; na arizhokanya aryahu

mariomala kuaziza makatsamusongerera; na aambi-razho atu osi kwamba matuwe utu wao usio na uwi. Mudzang'alirwa kwamba kwa muvano-we na vihendozhe zha-ndze waonyesa radi ya moyo-we kwa ana aryahu; kwani waagwira mikononi mwakwe, akiaikira mikono-ye, akiahasa. Bai sihendeni kimoyo-moyo, kuluhirani zhomu, kwamba undakala radi kumuhokera *muhoho yuyu* vizho; undamugwira kwa mikono ya mbazi-ze; undamupa uhaswi wa uzima wa kare na kare, na kumuhendya *mungara wa* utawali wa kare na kare. Bai kwa vizho humanyazho kwamba Babiyehu wa mulunguni una radi kwa *muhoho yuyu*, arizhoonyesa Mwanawe Jesu Masihi; naswi kahuna kimoyo-moyo cha iye kuiahikiza kazi yehu ii ya mahendzo ya kumureha *muhoho yuyu* kwa Ubaputizi-we ueri; na humulazhire muvera kwa kuluhira na kwa moyo, hunene,

**M**MULUNGU mwenye nguvu zosi wa kare na kare, Babiyehu wa mulunguni, siswi hu maguluni hako, hunakulazhira muvera, kwa viryahu urizhohendza kufwiha siswi hata hukipata kumanya nema-yo na kukukuluhira: Kumanya kuku ukuongeze, nako kukuluhira ukurungaraze myoyoni mwehu siku zosi. Mugere *muhoho yuyu* Roho-ro Mweri, apate kuzhalwa lwa hiri, ahendywe *muhali-wa-ufwa wa* wokolwi wa kare na kare; kwa Bwana wehu Jesu Masihi, ariye moyo na kutawala hamwenga na uwe na Roho Mweri vikara na hata kare na kare. *Haami.*

*Haho Kasisi nanene na aryahu aimirizi aambire maneno gaga.*

**A**HENDZWI zhomu, *mwana yuyu* mudzamureha haha abaputizwe, mudzavoya kwamba Bwana wehu Jesu Masihi aone vidzo kumuhokera, na kumuvugulira dambi-ze, na kumueza kwa Roho Mweri, na kumupa utawali wa mulunguni, na uzima wa kare na kare. Kidza mudzasikira kwamba Bwana wehu Jesu Masihi udzalaga kahi za Uvoro-we udzo kwamba undamupa

mautu gago gosi mudzigogavoya: nacho kilagane kicho kavina hae-hae iye kwa luhande-lwe undakigwira na kukitimiza. Bai kwa utu uo, nyuma za kilagane kiki aricholaga Masihi, ni hata *muhoho yuyu naye* kwa luhande-lwe, alage kwa ukuluhirwi kwa ndimi zenu ninwi *mupigirao* daraka, (hata andihohenda ikili za kukitsukula *mwenye* kilagane kiki), kwamba undamukahala Shetani na kazi-ze zosi, kidza undarikuluhira siku zosi Neno ryeri ra Mulungu na kugagwira malagizo-ge kwa kusikira.

Bai kwa utu uu nakuuza,

**U**WE, kwa dzina ra Mwana yuyu, unamukahala Shetani na kazi-ze zosi, na utana na nguma zisizofwaha za urumwengu uu, na tamaa-ze zosi za kidzitso, nazo tamaa za mwiri, hata ukatsazituwa, hedu kuvufwa ni zizo?

*Kudzigidzya.* Nazikahala zosi.

*Padiri.*

**U**NAKULUHIRA kwa Mulungu Baba mwenye nguvu zosi, Muumbi wa dzulu na-tsi?

Na kwa Jesu Masihi Mwanawe ariyezhalwa hakeye, Bwana wehu? Na kwamba wahenderwa mimba kwa Roho Mweri; akizhalwa ni Musichana Maryamu; akisirinywa kahi za indzi ra Pontio Pilato, akigozhwa, akifwa, akizikwa; akitserera kuzimu, naye siku ya hahu akifufuka; kidza achanuka achangira mulunguni, naye ukeresi mukono wa kurya wa Mulungu Baba mwenye nguvu zosi; ndo andikolaa musindikizo wa urumwengu, adze aalamule mario moyo na mariofwa?

Nawe unakuluhira kwa Roho Mweri; Kanisa ryeri ra urumwengu wosi; Ungara wa aeri, Usiro ra dambi; Kufufuka kwa mwiri; na uzima wa kare na kare nyuma za kufwa?

*Kudzigidzya.* Gaga gosi nagakuluhira zhomu.

*Padiri.*

**U**NAMALA kubaputizwa kahi za kuluhira riri?

*Kudzigidzya.* Ndo nimalazho.

*Padiri.*

**B**AI, unamala kugagwira mahendzo maeri ga Mulungu na malagizo-ge, na kugatuwa gago siku zosi undizokala moyo ?

*Kudzigidzya.* Ele, ninamala.

*Ndo Kasisi nanene,*

**H**EWWE Mulungu uriye na mbazi, *Mwana yuyu* umugere kwamba Adamu wa kare ariye ndani *mwakwe* azikwe, hata mudamu musha afufuke ndani *mwakwe*. *Haami.*

Umugere kwamba tamaa zosi za mwiri zifwe ndani *mwakwe*, na mautu gosi ga Roho gakale moyo gaongezeke ndani *mwakwe*. *Haami.*

Umugere kwamba akale na wadimi na nguvu kumudhima na kumuringira Shetani, na urumwengu, na mwiri. *Haami.*

Umugere kula mutu atungwaye andiyeikwa haha kukala wako kwa kazi yehu na uhumiki wehu siswi, awikwe vidzo zha mulunguni, na kupewa vigerwa zha kare na kare, kwa mbazi-zo, hewe Bwana Mulungu mudzo, uriye moyo na kugatawala mautu gosi, kare na kare. *Haami.*

**M**MULUNGU mwenye nguvu zosi, uriye moyo kare na kare, Mwanao umuhendzaye zhomu Jesu Masihi, kwa kuhuusiza dambi zehu, waombolwa ni madzi na milatso kahi za lwavu-lwe lwa kima zhomu ; naye akialagiza anafundie kwamba, mende makaafundye kolo zosi, na kuabaputizi Kwa Dzina ra Baba, na ra Mwana, na ra Roho Mweri ; Hunakuvoya ugasirikize mavoyo ga mutungananoo ; ugaeze madzi gaga gakale ga kuogeseza dambi kinjama ; umugere *Mwana yuyu endaye* baputizwa mumo, ahokere nema-yo idziyotimira, akale siku zosi kahi za mutalo wa anao akuluhirwi atsagulwio ; kwa Jesu Masihi Bwana wehu. *Haami.*

*Ndo Kasisi namatsukule yuyahu mwana nikononi mwakwe, aambire aryahu aimirizi,*

Mupeni dzina Mwana yuyu.

*Naye Kasisi amuhadze dzina-re kwa kurituwa riryahu mamuambiraro, kidza (makimumanyisa kavindamubumiza Mwana) undamuhosa kahi za Madzi kara-kara na pore, nanene,*

**N**GANYA, ninakubaputizi Kwa Dzina ra Baba, na ra Mwana, na ra Roho Mweri. *Haami.*

*Ela makimumanyisa kwamba yuyahu Mwana ni munyonge, vindatosha kumumwagira madzi, na kunena garyahu garigo mbere,*

**N**GANYA, ninakubaputizi Kwa Dzina ra Baba, na ra Mwana, na ra Roho Mweri. *Haami.*

*Haho yuyahu Kasisi nanene,*

**H**UNAMUHOKERA Mwana yuyu kahi za mutunganano wa kundi ra Masihi, \* *Haho Kasisi namu-pige muvano wa Masihi-wa-kukinganywa vvyahu Mwana dzulu za kidhangu-che.* \*naswi hunamwangiza muvano wa Masihi-wa-kukinganywa, kuonyesa kwa mba hangu vikara kandagwirwa ni haya kurisema kuluhiro ra Masihi ariyegozhwa, na kupigana kilume na dambi, na urumwengu, na Shetani, tsini za bendera-ye ; na kuenderera kukala ashikari mukuluhirwi wa Masihi, muhumiki-we, hata siku-ze za haha urumwenguni zigome. *Haami.*

*Haho Kasisi nanene,*

**N**DUGU zangu muhendzwao zhomu, vivi huonazho *Mwana yuyu* kukala udzazhalwa uzhazi usha, na kuangizwa kahi za mwiri wa Kanisa ra Masihi, na humulazhire muvera Mulungu mwenye nguvu zosi kwa mapato gago, naswi kwa moyo mumwenga humuvoye kwamba *Mwana yuyu* aenderere siku-ze zosi ziserezo muhalano wa chaho kiki.

*Haho na mapige mavwindi osi, manene :*

**B**BABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni.



Hupe rero chakurya chehu cha kuhutosha. Nawe uhuu-size makosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. Haami.

*Haho Kasisi nanene,*

**H**UNAKULAZHIRA muvera zhomu hewe Baba mwenye mbazi zosi, kwa viryahu udzizhokala radi kumupa *Muhoho yuyu* uzhazi usha kwa Roho-ro Mweri, na kumuhokera akale *Mwanao wa kumurera*, na kumwangiza kahi za Kanisa-ro ryeri. Naswi vivi hurizho maguluni hako, hunakuvoya kwamba *Mwana yuyu* kwa viryahu *adzizhofwerera* dambi, na kukala moyo kwa hachi, na kukala *udzazikwa* hamwenga na Masihi kahi za kifwa-che, apate kumugozha yuyahu mudamu wa kare, na kuwusa kamare mwiri wosi wa dambi; kidza kwamba, viryahu *adzizhogerwa* kukala *mungara wa kifwa cha Mwanao*, vizho *naye akale mungara wa kufufuka-kwe*; hata musindikizo, hamwenga na masereo kahi za Kanisa-ro ryeri, *ije naye akale muhali-wa-ufwa wa utawalio wa kare na kare*; kwa Masihi Bwana wehu. *Haami.*

*Haho na maime osi, naye Kasisi aambire aryahu Aimirizi Maonyo gaga.*

**K**WA utu wa viryahu *adzizholagana Mwana yuyu*, kwa ndimi zenu ninwi mumupigirao daraka, kumukahala Shetani na kazi-ze zosi, na kumukuluhira Mulungu, na kumuhumikira; ni hata ninwi mukumbukire kwamba ni dzulu zenu, ni kazi imuwiryayo, kulola kwamba *Muhoho yuyu* afundye, andihokala unaadima kung'alirwa nazho, viryahu virizho vibomu hati, na kilagane, na kuahikiza, *adzizhohenda* haha kwa ndimi zenu. *Naye* kwamba apate kwenderera kugamanya mautu gago, ni hata ninwi kumumala asirikize Kuambirizwa; na zaidi ni kumuhendera kwamba *adzifundye* Kuluhiro, na Voyo ra Bwana, na garyahu Malagizo Kumi, kwa maneno ga-tsi, na kudzifundya mautu

mangine gosi gawiryago Mumasihia kugamanya na kugakuluhira apate kukala na matsiya rohani mwakwe; kidza *Mwana yuyu* narerwe-to apate kukala na mwendo wa kumogoha Mulungu na wa Kimasihia; mukale mukikumbukira siku zosi kwamba, Ubaputizi unafwonyesa dini yehu huriyoahikiza; nayo ndo kutuwa arizhofwonyesa Mokoli wehu Masihi, na kuhalanywa na iye; kwamba here arizhofwa iye, na kufufuka kwa utu wehu, vizho siswi naswi huriobaputizwa, huifwerere dambi, huifufukire hachi; hukale siku zosi kuzialaga tamaa zehu zosi mbii zirizo na wonongi, na kwenderera kula siku kahi za vidzo zhosi na mwendo wa kumogoha Mulungu.

*Ndo aenderere na kunena gaga,*

**N**ANWI lolani kwamba *Mwana yuyu* arefwe kwa Bishopu kuikirwa mikono ni iye, haho andihoodima kunena Kuluhiro, na Voyo ra Bwana, na garyahu Malagizo Kumi, kwa maneno ga-tsi, na kuongezewa mafundyo garigo kahi za Maudzigidzyanyo ga Kanisa garigoikwa kwa utu uo.

---

## UBAPUTIZI WA NJAMA WA AHOHO NYUMBANI.

*Mapadiri a kula Mushikiti na maonye atu punde kwa punde kwamba, makatsaricha dui Ubaputizi wa Ana ao kuriko Jumaapili ra kwandza hedu ra hiri nyuma za kuzhalwa kwao, hedu siku nyingine bomu ituwayo kahi-kahi, isihokala kuna chausa kibomu kiricho cha hachi, andichokiona ni kara-kara yuyahu Padiri.*

*Nao maonye kwamba, masihokala na chausa kibomu hedu utu, makatsahendya Ana ao kubaputizwa kwao nyumbani. Ela mandihoona ni suti kuhenda vizho, ndo Ubaputizi urefwe vivi:*

*Kwandza, yuyahu Padiri wa Mushikiti (hedu, akikala*

*kaho, Padiri mungine wosi atungwaye andiyepatikana ariye na amulo) hamwenga na atu mario haho na mamugayire Mulungu, manene Voyo ra Bwana, na Mavoyo mungine garigolagizwa kushomwa haho mbere kahi za Kara-kara ya Ubaputizi mbere za atu, mawero wa mandizhoadima kwa murongo mario nao na utu wao. Kidza, iye Mwana apewe dzina ni mumwenga waho mario haho, naye Padiri amumwagire Madzi, nanene maneno gaga ;*

**N**GANYA, ninakubaputizi Kwa Dzina ra Baba, na ra Mwana, na ra Roho Mweri. Haami.

*Haho osi mapige mavwindi, naye Padiri amulazhire Mulungu muvera, anene,*

**H**UNAKULAZHIRA muvera zhomu, hewe Baba mwenye mbazi zosi, kwa viryahu udzizhokala radi kumupa Muhoho yuyu uzhazi usha kwa Roho-ro Mweri, na kumuhokera akale Mwanao wa kumurera, na kumuangiza kahi za Kanisa-ro ryeri. Naswi vivi hurizho maguluni hako, hunakuvoya kwamba viryahu adzizhogerwa kukala mungara wa kifwa cha Mwanao, vizho akale mungara wa kufufuka-kwe ; hata musindikizo, hamwenga na masereo a aerio, ahale ufwa wa utawalio wa kare na kare ; kwa iye Mwanao Jesu Masihi Bwana wehu. Haami.

*Nao makatsahenda kimoyo-moyo cha Mwana ariye-baputizwa vivi kukala udzabaputizwa kara-kara na wagirwi vitoshazho kwa hachi, naye kaagirwe ni kubaputizwa kaheri. Ela hamwenga na gaga, yuyahu Mwana ariyebaputizwa vivi akitia, akikala moyo, vinafwaha arefwe Mushikitini, kwamba akikala ni Padiri wa Mushikiti uryahu ariyemubaputizi mwenye yuyahu Mwana, Mutunganano wa Kanisa mamanyiswe ya kukala jeri kara-kara ya Ubaputizi ariyohumira kinjama : Mautu gakikala garyahu nanene vivi,*

**M**IMI namupa ujeri kwamba namubaputizi Mwana yuyu here kara-kara ya Kanisa zhagirwezho na

kulagizwa, murongo musiku, hatu hasiku, mbere za zhodherwa asiku.

*Ela yuyahu Mwana chamba wabaputizwa ni Padiri mungine ariye na amulo atungwaye, ndo Padiri wa Mushikiti wa hatu arihozhalwa hedu kubaputizwa yuyahu Mwana, nauze amanye kwamba yuyahu Mwana wabaputizwa here wagirwi, hedu sozho. Na haho ao mamurehao Mwana wosi atungwaye Mushikitini maki-udzigidzya kwamba yuyahu Mwana wabaputizwa kare, ndo Padiri aenderere kuauza, anene,*

**M**WANNA yuyu wabaputizwa ni hani ?

Mariokalaho ni ano hani arihobaputizwa Mwana yuyu ?

Kwa kukala ni kanji mautu mungine gawiryago Sakaramenti ii garichwa kwa oga na haraka, atu marizho nazho makati ga udhia ; bai namuza kaheri,

Mwana yuyu wabaputizwa kwa kuhumira kitu chani ?

Mwana yuyu wabaputizwa kwa kuhumira maneno gani ?

*Na yuyahu Padiri akiona kwa viryahu maudzigidzya-zho ao madziomureha Mwana, kwamba mautu gosi gahendwa here zhagirwezho ; haho nasimubaputizi yuyahu Mwana lwa hiri, ela namuhokere here arizho mumwenga kahi za kundi ra Amasihia a jeri, anene vivi,*

**M**IMI namupa ujeri kwamba utu uu wahendeka-to, kwa kutuwa kara-kara yagirweyo, kahi za kubaputizwa-kwe Mwana yuyu ; naye angahozhalwa kahi za dambi za chaho, na tsini za koro za Mulungu, ela vikara kwa kuogeswa-kwe uzhazi usha kahi za Ubaputizi udzahokerwa kahi za mutalo wa ana a Mulungu, ahali-a-ufwa a uzima wa kare na kare : kwani Bwana wehu Jesu Masihi kakahala kuagera ahoho dza aa nema-ye na mbazi-ze, ela ni kuaiha kwa mahendzo zhomu mamudzirire, here Uvoro-udzo ueri urizho chodherwa kwa kuhuhuriza myoyo kahi za maneno gaga.

Mweri *Mariko* x. 13.

**A**TU makimurehera Masihi ahoho atite, apate kua-guta; nao anafundi makiachemera ao marioareha. Ela Jesu arihoona viryahu, akitsukirwa, akiaambira, Aricheni ahoho atite manidzirire, siakahazeni; kwani utawali wa Mulungu ni wa here aa. Ni jeri namuambira, Asiyehokera utawali wa Mulungu here viryahu muhoho mutite, kandauangira kamare. Kidza akiatsukula mikononi mwakwe, akiaikira mikono-ye, akiahasa.

*Nyuma za kushomwa Uvoro-udzo, yuyahu Padiri nage-rehe maonyo gaga machache kahi za maneno ga Uvoro-udzo.*

**A**HENDZWI, kahi za Uvoro-udzo uu mudzasikira maneno ga Mokoli wehu Masihi, arizholagiza kwamba ahoho marefwe kwakwe; na arizhoakanya aryahu mariomala kuaziza makatsamusongerera; na aambirazho atu osi kwamba matuwe utu wao usio na uwi. Mudzang'alirwa kwamba kwa muvano-we na vihendo-zhe zha-ndze waonyesa radi ya moyo-we kwa ana aryahu; kwani waagwira mikononi mwakwe, akiaikira mikono-ye, akiahasa. Bai sihendeni kimoyomoyo, kuluhirani zhomu, kwamba udzakala radi vizho kumuhokera Muhoho yuyu; udzamugwira kwa mikono ya mbazi-ze; kidza (here adzizholaga kahi za Neno-ryeri) undamupa uhaswi wa uzima wa kare na kare, na kumuhendya mungara wa utawali-we wa kare na kare. Bai, kwa vizho humanyazho kwamba Babiyehu wa mulunguni una radi kwa Muhoho yuyu, arizhoonyesa Mwanawe Jesu Masihi, na humulazhire muvera kwa kuluhira na kwa moyo, hurinene riryahu Voyo arirohufundya Bwana mwenye:

**B**ABIYEHU uriye ko mulunguni, Dzina-ro na rikale ryeri. Utawaliona udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize ma-

kosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. Haami.

**M**MULUNGU mwenye nguvu zosi wa kare na kare, Babiyehu wa mulunguni, siswi hu maguluni hako, hunakulazhira muvera, kwa viryahu urizhohendza kufwiha siswi hata hukupata kumanya nema-yo, na kukukuluhira: Kumanya kuku ukuongeze, nako kukuluhira ukurungaraze myoyoni mwehu siku zosi. Mugere Muhoho yuyu Roho-ro Mweri, kwamba iye kwa kuzhalwa lwa hiri na kuhendywa muhali-wa-ufwa wa wokolwi wa kare na kare, kwa Bwana wehu Jesu Masihi, aenderere kukala muhumikio, na kukifikira kilagane-cho; kwa yuyahu Bwana wehu Jesu Masihi Mwanawo, ariye moyo na kutawala hamwenga na uwe na Roho Mweri, vikara na hata kare na kare. *Haami.*

*Haho Kasisi nauze dzina ra Mwana yuyahu; na Aimirizi makigonya kurihadza, nanene vivi yuyahu Padiri,*

**U**WE, kwa dzina ra Mwana yuyu, unamukahala Shetani na kazi-ze zosi, na utana na nguma zisizofwaha za urumwengu uu, na tamaa-ze zosi za kidzitso, nazo tamaa za mwiri, hata ukatsazituwa, hedu kuvufwa ni zizo?

*Kudzigidzya. Nazikahala zosi.*

*Padiri.*

**U**NAKULUHIRA kwa Mulungu Baba mwenye nvugu zosi, Muumbi wa dzulu na-tsi?

Na kwa Jesu Masihi Mwanawe ariyezhalwa hakeye, Bwana wehu? Na kwamba wahenderwa mimba kwa Roho Mweri; akizhalwa ni Musichana Maryamu; akisirinywa kahi za indzi ra Pontio Pilato, akigozhwa, akifwa, akizikwa; akitserera kuzimu, naye siku ya hahu akifufuka; kidza achanuka achangira mulunguni, naye ukeresi mukono wa kurya wa Mulungu Baba

mwenye nguvu zosi; ndo andikolaa musindikizo wa urumwengu, adze aalamule mario moyo na mariofwa?

Nawe unakuluhira kwa Roho Mweri; Kanisa ryeri ra urumwengu wosi; Ungara wa Aeri; Usiro ra dambi; Kufufuka kwa mwiri; na uzima wa kare na kare nyuma za kufwa?

*Kudzigidzya.* Gaga gosi nagakuluhira zhomu.

*Padiri.*

**B**AI, unamala kugagwira mahendzo maeri ga Mulungu na malagizo-ge, na kugatuwa gago siku zosi undizokala moyo?

*Kudzigidzya.* Ee, ninamala.

*Haho yuyahu Kasisi nanene,*

**H**UNAMUHOKERA Mwana yuyu kahi za mutungana nano wa kundi ra Masihi,\* naswi hunamwangiza muvano wa Muhi-wa-kukinganywa, kuonyesa kwamba hangu vikara kandagwirwa ni haya kurisema kuluhira ra Masihi ariyegozhwa, na kupigana kilume na dambi, na urumwengu, na Shetani, tsini za bendera-ye; na kuenderera kukala ashikari mukuluhirwi wa Masihi, muhumiki-we, hata siku-ze za haha urumwenguni zigome. Haami.

\* Haho Kasisi namu-pige muvano wa Muhi-wa-kukinganywa yuyahu Mwana dzulu za kidhangu-che.

*Haho Kasisi nanene,*

**N**DUGU zangu, muhendzwao zhomu, vivi huonazho Mwana yuyu kukala udzazhalwa uzhazi usha kwa Ubaputizi na kuangizwa kahi za mwiri wa Kanisa ra Masihi, na humulazhire muvera Mulungu mwenye nguvu zosi kwa mapato gago; naswi kwa moyo mu-mwenga humuvoye kwamba Mwana yuyu aenderere siku-ze zosi ziserezo muhalano wa chaho kiki.

*Haho Kasisi nanene,*

**H**UNAKULAZHIRA muvera zhomu, hewe Baba mwenye mbazi zosi, kwa viryahu udzizhokala

radi kumupa Muhoho yuyu uzhazi usha kwa Roho-ro Mweri, na kumuhokera akale Mwanao wa kumurera na kumwangiza kahi za Kanisa-ro ryeri. Naswi vivi hurizho maguluni hako, hunakuvoya kwamba Mwana yuyu kwa viryahu adzizhofwerera dambi, na kukala moyo kwa hachi, na kukala udzazikwa hamwenga na Masihi kahi za kifwa-che, apate kumugozha yuyahu mudamu wa kare, na kuwusa kamare mwiri wosi wa dambi; kidza kwamba, viryahu adzizhogerwa kukala mungara wa kifwa cha Mwanao, vizho naye akale mungara wa kufufuka-kwe; hata musindikizo, hamwenga na masereo kahi za Kanisa-ro ryeri, iye naye akale muhali-wa-ufwa wa utawalio wa kare na kare; kwa Jesu Masihi Bwana wehu. *Haami.*

*Haho na maimo osi, naye Kasisi aambire aryahu Aimirizi Maonyo gaga.*

**K**WA utu wa viryahu adzizholagana Mwana yuyu, kwa ndimi zenu ninwi mumupigirao daraka, kumukahala Shetani na kazi-ze zosi, na kumukuluhira Mulungu, na kumuhumikira; ni hata ninwi mukumbukire kwamba ni dzulu zenu, ni kazi imuwiryayo, kulola kwamba Muhoho yuyu afundywe, andihokala unaadima kung'alirwa nazho, viryahu virizho vibomu hati, na kilagane, na kuahikiza, adzizhohenda kwa ndimi zenu. Naye kwamba apate kuenderera kugamanya mautu gago, ni hata ninwi kumumala, asirikize Kuambirizwa; na zaidi ni kumuhendera kwamba adzifundye Kuluhira, na Voyo ra Bwana, na garyahu Malagizo Kumi, kwa maneno ga-tsi, na kudzifundya mautu mangine gosi gawiryago Mumasihia kugamanya na kugakuluhira apate kukala na matsiya rohani mwakwe; kidza Mwana yuyu narerwe-to apate kukala na mwendo wa kumogoha Mulungu na wa Kimasihia; mukale mukikumbukira siku zosi kwamba, Ubaputizi unafwonyesa dini yehu huriyoahikiza; nayo ndo kutuwa arizhofwonyesa Mokoli wehu Masihi, na kahalanywa na iye; kwamba here

arizhofwa iye, na kufufuka kwa utu wehu, vizho siswi naswi huriobaputizwa, huifwerere dambi, huifufukire hachi; hukale siku zosi kuzialaga tamaa zehu zosi mbii zirizo na wonongi, na kuenderera kula siku kahi za vidzo zhosi na mwendo wa kumogoha Mulungu.

*Ela ao madziomureha Muhoho Mushikitini makiudzigidzya na kusisa-sisa garyahu marizo ga Kasisi, hata kavimanyikana-to kwamba Mwana yugahu wabaputizwa na Madzi, Kwa Dzina ra Baba, na ra Mwana, na ra Roho Mweri, (nago ndo marutu garigo ni suti kahi za Ubaputizi,) haho Kasisi namubaputizi here kara-kara iriyolagizwa mbere kahi za Ubaputizi wa Ahoho mbere za atu; isihokala makati ga kumuhosa Mwana kahi za Fonti, nanene maneno gaga.*

**U**KIKALA kudzangwe kubaputizwa, Nganya, nina-kubaputizi kwa Dzina ra Baba, na ra Mwana, na ra Roho Mweri. Haami.

## UBAPUTIZI WA ATU AZIMA, MAADI-MAO KUDZIGIDZYA ENYE.

*Mandihokala haho atu azima mamalao kubaputizwa, na apewe uvoro Bishopu, hedu mutu andiyeikwa ni iye kugalola mautu garyahu, jumaa zima mbere za siku-ye, rikatsahunguka, nao mandiomwambira ni Azhazi ao, hedu atu angine enye ikili; kwamba, here zhagirwezho, mapate kuuzwa-uzwa chamba madzafundywa ga kutosha kahi za marutu garigo mabomu ga Dini ya Kimasihia; kidza mapate kuambirwa kwamba madzihendye-to kuhokera Sakaramenti ii nyeri kwa kuvoya na kufunga.*

*Nao makionwa manafwaha, bai siku iryahu ya Jumaa-pibi, hedu siku bomu nyingine, atu mandihokala madzitunganana, ndo Aimirizi aryahu makale-to kuareha mbere za Fonti nyuma za Mashomo ga hiri ga Mavoyo*

*ga Madzacha, hedu ga Mavoyo ga Dziloni, here Padiri andizhoona vidzo.*

*Naye Kasisi aime haho, auze chamba hana mutu kahi za aa madziorefwa ariyebaputizwa kare, hedu kahana: Nao makimwambira, Kahana; ndo Kasisi anene vivi,*

**A**HENDZWI zhomu, kwa viryahu atu osi marizho-tsukulirwa mimba na kuzhalwa kahi za dambi, (nacho kirichozhalwa ni mwiri ni kukala mwiri,) na mario kahi za mwiri kamaadima kumufwahira Mulungu, ela ni kutoa kahi za dambi, makihenda makosa manji ga vihendo; na kwa kukala Mokoli wehu Masihi wamba, Kahana mutu aadimaye kuangira utawali wa Mulungu, asihozhalwa lwa hiri na kupewa uzhazi usha kwa Madzi na kwa Roho Mweri; ninamumala ninwi mumuvoye Mulungu Baba kwa Bwana wehu Jesu Masihi, kwamba kwa udzo-we unji aagere atu aa neno riryahu masiroadima kupata kwa utu wao; naro ndo kubaputizwa kwa Madzi na kwa Roho Mweri, na kuhokerwa kahi za Kanisa ryeri ra Masihi, na kuhendywa vilungo virizho moyo zha Kanisa riryahu.

*Ndo Kasisi anene,*

*Na huvoye.*

*(Haho mutunganano wosi na mapige mavwindi.)*

**M**MULUNGU mwenye nguvu zosi wa kare na kare, uwe kwa mbazi-zo bomu wamokola Nuhu na aryahu a nyumbani mwakwe kwa iryahu safina makatsaangamika madzini; kidza waalongoza-to ana a Isiraeli atuo kahi-kahi ya Bahari Tune, kwa kuonya mumo muhalano wa Ubaputizio ueri; kidza kwa Kubaputizwa-kwe Mwanao muhendzwio zhomu Jesu Masihi, kahi za muho wa Jorodani, wagaeza madzi gakale ga kuogeseza dambi kinjama; Hunakuvoya, kwa utu wa mbazi-zo zisizo na musindikizo, ualole ahumikio aa kwa mbazi; uaogese na kuaeza kwa Roho Mweri, kwamba hamwenga na kutia na koro-zo, mahokerwe safinani mwa Kanisa ra Masihi; kidza kwa viryahu mandizhorungarara kahi za

kuluhiro, na kufwahirwa kahi za tamaa mbidzo, na kuhindzya masina *gao* kahi za kuhendzana, *mapate* kuvuka maimbi ga urumwengu uu wa masirinyo, hata musindikizoni *mafike-tsi* iryahu ya uzima wa kare na kare, *matawale* kuko hamwenga na uwe kare na kare; kwa Jesu Masihi Bwana wehu. *Haami*.

**M**MULUNGU mwenye nguvu zosi usiyedhimwa ni kifwa, ndiwe uangizaye tiba ao mario na utsowi, u mwavwizi wao makuchimbirirao, uzima wao makuluhirao; ufufulo wao mariofwa; Hunaavoyera *atu aa*, kwamba vivi *maudzirirazho* Ubaputizio ueri, *mapate* kuusizwa dambi *zao* kwa uzhazi usha wa rohani. Uahokere, hewe Bwana, here urizholaga kwa Mwanao muhendzwo. zhomu, arihonena, Voyani, mundapewa; malani, mundaona; bishani, mundasundulirwa: Bai vizho vikara uhupe siswi huvoyao; siswi humalao huone; uhusundulire muviryaa siswi hubishao; kwamba *atu aa mafwahirwe* na uhaswi wa kare na kare wa kuogesa-ko kwa mulunguni, *nao mapate* kuufikira utawalio wa kare na kare uriohulaga kwa Masihi Bwana wehu. *Haami*.

*Haho atu na maimbe, naye Kasisi anene,*

Sirikizani maneno ga Uvoro-udzo, urioorwa ni Mweri Johana, Muryango wa hahu, kuaha. Kifungu cha kwandza.

**K**WERE na mutu kahi za Mafarisai, dzina-re akiifwa Nikodemo, naye were ni mubomu kahi za Ayahudi. Iye wamuendera Jesu usiku, akimuambira, Bwana, hunamanya kwamba u mwalimu udzire kulaa kwa Mulungu; kwani kahana aadimaye kuhenda mivano ii uihendayo uwe, isihokala Mulungu yu hamwenga naye. Jesu akimudzigidzya, akimwambira, Ni jeri, ni jeri nakwambira, asihozhalwa mutu uzhazi ulao dzulu, (*asihozhalwa lusha mutu*), kaadima kuwona utawali wa Mulungu. Nikodemo akimwamba, Unaadimadze mutu kuzhalwa akikala ni mutumia? Unaadima kuangira

Iwa hiri ndani mwa mameye na kuzhalwa? Jesu akimudzigidzya, Ni jeri, ni jeri nakwambira, Asihozhalwa mutu kwa madzi na kwa Roho, kaadima kuangira utawali wa Mulungu. Kirichozhalwa ni mwiri ni kukala mwiri; na kirichozhalwa ni Roho ni kukala roho. Simake kwa viryahu nidzizhokwambira, Ni hata muzhalwe lwa hiri. Peho ni kururuma ihendzako, na mumiro-we unaukikira; ela kumanya ilaako, hedu yendako; ndo arizho kula ariyehalwa kwa Roho.

*Kidza naganene Maonyo gaga.*

**A**HENDZWI, kahi za Uvoro-udzo uu mudzagasikira maneno ga Mokoli wehu mwenye Masihi, kwamba mutu asihozhalwa kwa madzi na Roho, kaadima kuangira utawali wa Mulungu. Nanwi kwa neno riri munaadima kuona Sakaramenti ii kukala kaina hae-hae, iriho inapatikana. Ni dza viryahu, makati ga kuanuka-kwe mulunguni, (here hushomazho kahi za muryango wa kusindikiza wa Uvoro-udzo wa Mweri Mariko,) waalagiza anafundie, akiamba, Endani urumwengu wosi, mukambirize Uvoro-udzo kwa kula chumbe. Iye akuluhiraye na kubaputizwa undaokoka; ela iye asiyekuluhira undapigwa ulongo. Neno riri naro rinafwonyesa pato bomu huripataro kwa utu uo. Ndosa Mweri Petero Muhumwa, arihoaha kuambiriza Uvoro-udzo anji madungwa myoyoni mwao, makimuuza iye na Ahumwa angine, makiamba, Henwi alume ndugu zehu, huhende-dze? akiudzigidzya, akiambira, Dzyuteni, mubaputizwe kula mumwenga wenu kwa kuusizwa dambi, nanwi mundapata noso ra Roho Mweri. Kwa kukala kilagane kiryahu ni chenu kidza ni cha ana enu, na cha osi mario kure, mwero wa andioaiha Bwana Mulungu wehu. Akiaadha kwa maneno mangine manji, akiamba, Dziti-zheni kahi za kizhazi kiki kiricho kombo-kombo. Kwani (here Muhumwa yuyahu arizho chodherwa hatu hangine) Ubaputizi ni kufwokola vikara, (si kuziusa nyenye za mwiri, ela udzigidzyo ra moyo mudzo kwa Mulungu.)

kwa kufufuka-kwe Jesu Masihi. Bai sihendeni kimoyomoyo, kuluhirani zhomu, kwamba undakala radi kua-hokera *atu aa mario* haha, *madzyutao jeri*, *mamuenderao* kwa kuluhiro; *undaagera usiro ra dambi zao*, na kuapa Roho Mweri; naye undaapa uhaswi wa uzima wa kare na kare, undaahendya *makale angara a* utawali-we wa kare na kare.

Bai kwa vizho humanyazho kwamba Babiyehu wa mulunguni una radi kwa *atu aa*, arizhoonyesa Mwanawe Jesu Masihi; na humulazhire muvera kwa kuluhiro na kwa moyo, hunene,

**M**MULUNGU mwenye nguvu zosi wa kare na kare, Babiyehu wa mulunguni, siswi hu maguluni hako, hunakulazhira muvera, kwa viryahu urizhohendza kufwiha siswi hata hukipata kumanya nema-yo, na kukukuluhira: Kumanya kuku ukuongeze, nako kukuluhira ukurungaraze myoyoni mwehu siku zosi. Agere *atu aa* Roho-ro Mweri, *mapate kuzhalwa lwa hiri*, na kuhendywa *ahali-a-ufwa a* wokolwi wa kare na kare; kwa Bwana wehu Jesu Masihi, ariye moyo na kutawala hamwenga na uwe na Roho Mweri, vikara na hata kare na kare. *Haami*.

*Haho yuyahu Kasisi nambire* aryahu *mandiobaputizwa maneno gaga*:

**A**AHENDZWI zhomu, *mudziokudza* haha kumala kuupata Ubaputizi ueri, *mudzasikira* madzizho-muvoyera *atu a* mutunganano uu, kwamba Bwana wehu Jesu Masihi aone vidzo kumuhokera na kumuhasa, na kumuvugulira dambi *zenu*, na kumupa utawali wa mulunguni, na uzima wa kare na kare. Kidza *mudzasikira* kwamba, Bwana wehu Jesu Masihi udzalaga kahi za Neno-re ryeri kwamba undahupa mautu gago gosi hudzigomuvoya; nacho kilagane kicho, kavina hae-hae iye kwa luhande-lwe undakigwira na kukitimiza.

Bai kwa utu uo, nyuma za kilagane kiki aricholaga

Masihi, ni hata *ninwi narwi* kwa luhande *lweni*, *mulage* kwa ukuluhirwi mbere za aa *zhodherwa zheni* na mutunganano uu wosi, kwamba *mundamukahala* Shetani na kazi-ze zosi, kidza *mundarikuluhira* siku zosi Neno ryeri ra Mulungu, na kugagwira malagizo-ge kwa kusikira.

*Haho Kasisi naauze* aryahu *atu mandiobaputizwa*, *kula mutu mauzo gaga*:

*Kuuza.*

**U**UWE unamukahala Shetani na kazi-ze zosi, na utana na nguma zisizofwaha za urumwengu uu, na tamaa-ze zosi za kidzitso, nazo tamaa za mwiri, hata ukatsazituwa, hedu kuvufwa ni zizo;

*Kudzigidzya.* Nazikahala zosi.

*Kuuza.*

**U**UNAKULUHIRA kwa Mulungu Baba mwenye nguvu zosi, Muumbi wa dzulu na-tsi?

Na kwa Jesu Masihi Mwanawe ariyehalwa hakeye, Bwana wehu? Na kwamba wahenderwa mimba kwa Roho Mweri; akizhalwa ni Musichana Maryamu; akisirinywa kahi za indzi ra Pontio Pilato, akigozha, akifwa, akizikwa; akitserera kuzimu, naye siku ya hahu akifufuka; kidza achanuka achangira mulunguni, naye ukeresi mukono wa kurya wa Mulungu Baba mwenye nguvu zosi; ndo andikolaa musindikizo wa urumwengu, adze aalamule mario moyo na mariofwa?

Nawe unakuluhira kwa Roho Mweri; Kanisa ryeri ra urumwengu wosi; Ungara wa Aeri; Usiro ra dambi; Kufufuka kwa mwiri; na uzima wa kare na kare nyuma za kufwa?

*Kudzigidzya.* Gaga gosi nagakuluhira zhomu.

*Kuuza.*

**U**UNAMALA kubaputizwa kahi za kuluhiro riri?  
*Kudzigidzya.* Ndo nimalazho.

*Kuiza.*

**B**AI, unamala kugagwira mahendzo maeri ga Mulungu na malagizo-ge, na kugatuwa gago siku zosi undizokala moyo ?

*Kudzigidzya.* Nindahenda chadi kuhenda vizho, Mulungu akiniavwiza.

*Haho Kasisi nanene,*

**H**EWEE Mulungu uriye na mbazi, *atu aa* uagere kwamba Adamu wa kare ariye ndani *mwao* azikwe, hata mudamu musha afufuke ndani *mwao*. *Haami.*

Uagere kwamba tamaa zosi za mwiri zifwe ndani *mwao*, na mautu gosi ga Roho gakale moyo, gaongezeke ndani *mwao*. *Haami.*

Uagere kwamba *makale* na wadimi na nguvu kumudhima na kumuringira Shetani, na urumwengu, na mwiri. *Haami.*

Uagere kwamba kwa viryahu *maikwazho* haha kukala *ako* kwa kazi yehu na uhumiki wehu siswi, *ma-vwikwe* vidzo zha mulunguni, na kupewa vigerwa zha kare na kare, kwa mbazi-zo, hewe Bwana Mulungu mudzo, uriye moyo na kugatawala mautu gosi, kare na kare. *Haami.*

**M**MULUNGU mwenye nguvu zosi, uriye moyo kare na kare, Mwanao umuhendzaye zhomu Jesu Masihi, kwa kuhuusiza dambi zehu, waombolwa ni madzi na milatso kahi za lwavu-lwe lwa kima zhomu, naye akialagiza anafundie kwamba, mende makaafundye kolo zosi, na kuabaputizi Kwa Dzina ra Baba, na ra Mwana, na ra Roho Mweri; Hunakuvoya ugasirikize mavoyo ga mutunganano uu; ugaeze Madzi gaga gakale ga kuogeseza dambi kinjama; uagere *atu aa mendao* baputizwa mumo *mahokere* nema-yo idziyotimira, *makale* siku zosi kahi za mutalo wa anao akuluhirwi atsagulwio; kwa Jesu Masihi Bwana wehu. *Haami.*

*Haho yuyahu Kasisi namugwire mukono wa kurya wa kula mutu andiyebaputizwa, naye akigonya kumuika-to hehi na Fonti, hatu hafwahaho, here aonazho vidzo, auze Dzina aryahu Aimirizi; kidza amwangize kahi za madzi, hedu kumumwagira madzi, anene,*

**N**GANYA, ninakubaputizi Kwa Dzina ra Baba, na ra Mwana, na ra Roho Mweri. *Haami.*

*Haho Kasisi nanene,*

**H**UNAMUHOKERA mutu yuyu kahi za mutungana nano wa kundi ra Masihi; \* *Haho Kasisi namu-pige muvano wa Muhi-wa-kukinganywa yuyahu* \* naswi hunamwangiza muvano wa *kuonyesa mutu dzulu za kidhanguche.* Muhi-wa-kukinganywa, kuonyesa kwamba hangu vikara kandagwirwa ni haya kurisema kuluhirwa ra Masihi ariyegozhwa, na kupigana kilume na dambi, na urumwengu, na Shetani, tsini za bendera-ye; na kuenderera kukala ashikari mukuluhirwi wa Masihi, muhumiki-we, hata siku-ze za haha urumwenguni zigome. *Haami.*

*Haho Kasisi nanene,*

**N**NDUGU zangu muhendzawo zhomu, vivi huonazho *atu aa* kukala madzazhalwa uzhazi usha, na kuangizwa kahi za mwiri wa Kanisa ra Masihi, na humulazhire muvera Mulungu mwenye nguvu zosi kwa mapato gago, naswi kwa moyo mumwenga humuvoye kwamba, *atu aa* menderere siku *zao* zosi ziserezo muhalano wa chaho kiki:

*Haho na rinenwe Voyo ra Bwana, osini makale madzapiga mavwindi.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. *Haami.*



**S**ISWI hu maguluni hako, hewe Baba wa mulunguni, hunakulazhira muvera, kwa viryahu urizhoona vidzo kufwiha siswi kudza imanya nema-yo na kukukuluhira uwe; Kumanya kuku ukuongeze, nako kukuluhira ukurungaraze myoyoni mwehu siku zosi. *Agere atu aa Roho-ro Mweri*; kwamba kwa viryahu madzizhozhalwa lwa hiri, na kuhendywa *ahali-a-ufwa a* wokolwi wa kare na kare, kwa Bwana wehu Jesu Masihi, menderere kukala *ahumikio*, mavipate vilagane-zho; kwa iye Bwana Jesu Masihi Mwanao, ariye moyo na kutawala hamwenga nawe, kahi za umwenga wa iye Roho Mweri, kare na kare. *Haami.*

*Haho osi na maima, naye Kasisi anene Maonyo gaga; anene kwandza na aryahu Aimirizi.*

**K**WA utu wa viryahu madzizholagana *atu aa* mbere zenu ninwi, kumukahala Shetani na kazi-ze zosi, na kumukuluhira Mulungu, na kumuhumikira; ni hata ninwi mukumbukire kwamba ni dzulu zenu, ni kazi imuwiryayo, kuakumbukiza here virizho vibomu hati, na kilagane, na kuahikiza, madzizhohenda vikara mbere za mutunganano uu, na zaidi mbere za ninwi muriotsagulwa kukala zhodherwa *zhao*. Kidza ni dzulu zenu kuamala mahende chadi kufundywa kara-kara Neno ryeri ra Mulungu; kwamba mapate kukula kahi za nema, na kahi za kumumanya Bwana wehu Jesu Masihi, makale na mwendo wa kumogoha Mulungu, na hachi, na uhurizi, kahi za urumwengu uu wa vikara.

*(Haho naenderere na kunena na aryahu madziobaputizwa haho, anene,)*

**N**ANWI mudziomuvwala Masihi vikara kwa Uba-putizi, ni fungu *renu*, ni kazi imuwiryayo, kwa viryahu madzizhohendywa *ana a* Mulungu na *a* mulangaza, kwa kumukuluhira Jesu Masihi, kwenenda kara-kara na mwifwa *wenu* wa Kimasihia, na here zhagirwezho *ana a* mulangaza; mukale mukikumbukira siku zosi

kwamba Uba-putizi unafwonyesa dini yehu huriyoya-hikiza; nayo ndo kutuwa arizhofwonyesa Mokoli wehu Masihi, na kuhalanywa na iye; kwamba here arizhofwa iye, na kufufuka kwa utu wehu; vizho siswi naswi huribaputizwa huifwerere dambi, huifufukire hachi; hukale siku zosi kuzialaga tamaa zehu zosi mbii za wonongi, na kwenderera kula siku kahi za vidzo zhosi na mwendo wa kumogoha Mulungu.

*Kula mutu ariyebaputizwa vizho, vinafwaha aangizwe nguvu ni Bishopu nyuma za kubaputizwa-kwe kumwenga vindizhoadimika; kwamba akaribishwe Ungara Ueri.*

*Atu masiobaputizwa kahi za utsanga wao makirefwa kubaputizwa mbere kamadzangwe kuifikira myaka ya kuhenda ikili na kudzipigira daraka enye; vindatosha kuumira Ada ra Uba-putizi wa Ahoho mbere za atu mushikitini, hedu (hakikala na zani bomu) Ada ra Uba-putizi wa Njama; isihokala kugaluzwa neno ra [Mwana] rikale [Muhoho hedu Mutu] here vindizhokala kara-kara.*

## MAUDZIGIDZYANYO,

NAGO NI MAFUNDYO GA KUDZIFUNDYA KULA MUTU MBERE KADZANGWE KUREFWA KWA BISHOPU KUANGIZWA NGUVU.

*Kuuza.*

**D**ZINA-RO ndiwe hani?

*Kudzigidzwa.* Dzina rangu ndimi (Nganya).

*Kuuza.* Ni ano hani mariokupa dzina riri?

*Kudzigidzwa.* Marionipa dzina riri ni Aimirizi angu kahi za Uba-putizi wangu; nami kahi za utu uryahu nahendywa kilungo cha Masihi, muhoho wa Mulungu, muhali-wa-ufwa wa utawali wa mulunguni.

*Kuuza.* Ni utu wani mariokuhendera Aimirizio makati garyahu?

*Kudzigidzya.* Malagana makipiga hati mautu mahahu kwa dzina rangu mimi. Ra kwandza ni ra mimi kumukahala Shetani na kazi-ze zosi, na utana wa urumwengu uu uwi na uzuzu-we, na tamaa zosi za mwiri zirizo na dambi. Hiri, kwamba nindagakuluhira Mautu gosini ga Kuluhiro ra Umasihia. Hahu, kwamba nindagagwira mahendzo maeri ga Mulungu na malagizo-ge, na kugatuwa siku zosi nindizokala moyo.

*Kuuza.* Unaona moyoni mwako kwamba ni hata ugakuluhire, na kugahenda, garyahu marigolagana kwa dzina-ro ?

*Kudzigidzya.* Naona jeri ; nami Mulungu akinavwiza nindahenda vizho. Nami kwa moyo wangu namulazhira muvera Babiyehu wa mulunguni, kwa viryahu arizhoniha na kuniika kahi za utu uu wa wokolwi, kwa Jesu Masihi Bwana wehu. Nami namuvoya Mulungu anigere nema-ye, nipate kwenderera muryahu hata musindikizo wa kukala moyo kwangu.

*Auzaye.*

Nena mautu ga Kuluhiro-ro.

*Kudzigidzya.*

**N**AKULUHIRA kwa Mulungu Baba mwenye nguvu zosi, Muumbi wa dzulu na-tsi :

Na kwa Jesu Masihi Mwanawe wa hakeye, Bwana wehu, Ariyehenderwa mimba ni Roho Mweri, Akizhalwa ni Musichana Maryamu, Akisirinywa kahi za indzi ra Pontio Pilato, Akigozhwa, akifwa, akizikwa, Akitserera kuzimu ; Siku ya hahu akifufuka, akilaa nyufuni, Achana nuka, achangira mulunguni, Naye ukeresi mukono wa kurya wa Mulungu Baba mwenye nguvu zosi ; Ndo andihouya kudza kualamula atu mario moyona mariofwa.

Nakuluhira kwa Roho Mweri ; na Kanisa Ryeri ra urumwengu wosi ; na Ungara wa Aeri ; na Usiro ra dambi ; na Kufufuka kwa mwiri ; na Uzima wa kare na kare. Haami.

*Kuuza.* Kahi za Mautu gaga ga Kuluhiro-ro unapata mafundyo gani garigo mabomu ?

*Kudzigidzya.* Kwandza ni kudzifundya kukuluhira kwa Mulungu Baba, ariyeniumba mimi, na urumwengu wosi.

Hiri, nikuluhire kwa Mulungu Mwana, ariyenikombola mimi, na anadamu osi.

Hahu, nikuluhire kwa Mulungu Roho Mweri, aniezaye mimi, na atsagulwi osi a Mulungu.

*Kuuza.*

Udzamba kwamba Aimirizio malaga kwa dzina-ro, kwamba undagagwira Malagizo ga Mulungu. Nambira bai ni mangahi garyahu ?

*Kudzigidzya.* Ni kumi.

*Kuuza.* Ni higo ?

*Kudzigidzya.*

**N**I garyahu arigoganena Mulungu kahi za Chuwo cha Kuombola, Muryango wa mirongo miri, akiamba, Mimi ni Bwana Mulunguo, niryekuomboza-tsi ya Misiri, kulaa kahi za nyumba ya usunye.

I. Usikale na milungu mingine, isihokala mimi tu.

II. Sidzihendere kizuka chosi cha kutsonga, hedu muhalano wa kitu chosi kiricho mulunguni dzulu, hedu kiricho tsini dzulu ya-tsi, hedu kiricho kahi za madzi tsini ya-tsi. Sivizamire, hedu sivihase : kwa kukala mimi Bwana Mulunguo ni Mulungu mwenye wivu, naarihiza ana kwa dambi za babizao hata kizhazi cha hahu na cha-ne cha ao manizirao, na kuaonera mbazi magana magana manji manihendzao, magagwirao malagizo gangu.

III. Sirihadze kizuzu Dzina ra Bwana Mulunguo : kwa kukala Bwana kandamuhendya mujeri iye arihadzaye Dzina-re kizuzu.

IV. Ikumbukire siku ya Sabatu uyeze. Siku tandahu humika, uhende kazi-zo zosi ; ela siku ya fungahe ni

Sabatu ya Bwana Mulungu. Siku iryahu usihende kazi yosi, uwe mwenye, hedu mwanao mulume, hedu mwanao muche, hedu muhumikio mulume, hedu muhumikio muche, hedu mufugoo, hedu mujeni adziyeangira ndani za muviryo. Kwa kukala kwa siku tandahu Bwana waumba mulunguni na-tsi, na bahari, na zhosi virizho mumo, akioya siku ya fungahe; ndosa Bwana waihasa siku ya fungahe, akiyeza.

V. Aishimu babayo na mameyo, siku-zo zipate kukala nyinji kahi za-tsi uriyopewa ni Bwana Mulungu.

VI. Salage.

VII. Sizinge.

VIII. Siiye.

IX. Sikale chodherwa cha ulongo kwa mwandzio.

X. Siihendere kidzitso nyumba ya mwandzio, simuhendere kidzitso muche wa mwandzio, hedu muhumikiwe mulume, hedu muhumikiwe muche, hedu ng'ombe-ye, hedu ndzowe-ye, hedu chosi aricho nacho mwandzio.

#### *Kuuza.*

Kahi za Malagizo gago ni mautu gani udzifundyo zhomu?

*Kudzigidzya.* Nadzifundya mautu mairi: ganiwiryago kwa Mulungu, na ganiwiryago kwa Mwandzangu.

*Kuuza.* Gakuwiryago kwa Mulungu ni higo?

*Kudzigidzya.* Ganiwiryago kwa Mulungu ni kumukuluhira, na kumogoha, na kumuhendza kwa moyo wangu wosi, na ikili zangu zosi, na roho rangu rosi, na nguvu zangu zosi; na kumuabudu, na kumulazhira muvera, na kumwemerera iye kamare, na kumuvoya, na kuriishimu Dzina-re ryeri na Neno-re, na kumuhumikira jeri siku zangu zosi za kukala moyo.

*Kuuza.* Gakuwiryago kwa Mwandzio ni higo?

*Kudzigidzya.* Ganiwiryago kwa Mwandzangu ni kumuhendza here nidzihendzazho mwenye, na kuahendera atu osi here nihendzazho manihendere mimi: Na kuahendza baba na mama, na kuaishimu, na kuaawwiza:

Na kumuishimu na kumusikira Mutawali, na osi mario-pewa wadimi tsini-ze: Na kudzitsereza tsini za abomu angu osi, na alimu angu, na manirisao roho, na bwana zangu: Na kukala na mwendo wa kuaogoha na kuaishimu osi mario dzulu zangu: Nikatsamulumiza mutu wosi atungwaye kwa maneno hedu kwa mahendo: Nikale mujeri, muhachi, kahi za gosi nihendago: Kidza nikatsakala na mufundo moyoni hedu kumena: Kidza nizulie mikono yangu ikatsaguta na kuiya, na kudzirinda lurimi lwangu nikatsanena maneno mai, hedu ulongo, hedu kurya lwambo: Na kudzirinda mwiri wangu kwa kudziunya, na kukala muhurizi, nikatsakala na mautu mai ga urevi na kuzinga: Kidza nikatsahenda kidzitso na kutamani vitu zha atu; ela nikale kudzifundya na kuhenda kazi kara-kara kudzipatira chakurya, na kugahenda garyahu ganiwiryago kahi za mutalo uryahu Mulungu andiohendza kuniikira.

#### *Auzaye.*

Mwanangu mudzo, manya zhomu neno riri, kwamba mautu gaga kuadima gughenda hakeyo, hedu kugatuwa Malagizo ga Mulungu, na kumuhumikira, usihopata nema-ye iriyo lwakwe; nayo ni hata udzifundye kuimala kwakwe kwa kuvoya kwa chadi. Haya bai, nahendza urinene Voyo ra Bwana, nisikire chamba unaadima kurinena.

#### *Kudzigidzya.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahurika majezoni; Ela fwokole na mai. Haami.

*Kuuza.* Kahi za Voyo riri ni utu wani uumalao kwa kwe Mulungu?

*Kudzigidzya.* Ninamumala kwamba Bwana Mulungu

wangu Babiyehu wa mulunguni, ariye Mulazhi wa vidzo zhosi, anirehere mimi nema-ye, na atu osi; hupate kumuabudu, na kumuhumikira, na kumusikira, here vihuwiryazho. Nami namuvoya Mulungu, ahurehere mautu gosi gahufwahago maroho gehu na miiri yehu; na kufwonera mbazi, na kuhuusiza dambi zehu; kidza kwamba akale radi kufwokola na kuhuchinga na mazani gosi ga rohani na ga mwirini; naye ahurinde na dambi zosi na uwi wosi, na kufwokola na adui wehu wa rohani, na kifwa cha kare na kare. Nami nakuluhira kwamba undagahenda gaga kwa mbazi-ze na udzo-we, kwa utu wa Bwana wehu Jesu Masihi. Ndosa naamba, Haami, na vikale vizho.

*Kuuza.*

**N**I nyingahi Sakramenti arizoziiika Masihi kahi za Kanisa-re?

*Kudzigidzya.* Ni mbiri tu, ziagirwezo ni atu osi kwa wokolwi, nazo ndo Ubaputizi, na Chakurya cha Bwana.

*Kuuza.* Unaonadze, neno riri *Sakramenti* ni inoni?

*Kudzigidzya.* Neno riri Sakramenti naona ni muvano wa-ndze uonekao wa nema ya ndani, ya rohani, huriyogerwa; nao muvano uu ndo uriolagizwa ni Masihi mwenye, upate kukala ngira ya kuihokerera nema iryahu, na mufunga wa kuhumanyisira kukala nayo.

*Kuuza.* Ii Sakramenti ina mafungu mangapi?

*Kudzigidzya.* Ina mafungu mairi; uryahu muvano wa-ndze uonekao, na iryahu nema ya ndani, ya rohani.

*Kuuza.* Uryahu Ubaputizi, muvano-we wa-ndze uonekao ni inoni?

*Kudzigidzya.* Ni madzi; yuyahu mutu abaputizirwago mumo, *Kwa Dzina ra Baba, na ra Mwana, na ra Roho Mweri.*

*Kuuza.* Iryahu nema ya ndani ya rohani ni inoni?

*Kudzigidzya.* Ni mutu kuifwerera dambi, na kupata uzhazi usha kwa hachi: kwani siswi kwa utu wehu wa

chaho fwazhalwa kahi za dambi, naswi hu ana a koro, ela kwa nema iryahu siswi ni kuhendywa ana a nema.

*Kuuza.* Ni utu wani umalwao kwa ao mandiobaputizwa?

*Kudzigidzya.* Kudzyuta, kwa vizho mandizhoricha dambi; na Kuluhiro, kwa vizho mandizhovikuluhira zhomu vilagane zha Mulungu arizholagana nao kahi za Sakramenti iyo.

*Kuuza.* Bai vidze kubaputizwa Ahoho atite, nao kamaadima kuhenda mautu garyahu kwa kukala atsanga?

*Kudzigidzya.* Kwa kukala ni kulagana kugahenda gosi kwa milomo ya ao maapigirao daraka; na kilagane kicho ni hata makitimize enye mandihokala abomu.

*Kuuza.* Kwa inoni yalagizwa Sakramenti ya Chakurya cha Bwana?

*Kudzigidzya.* Yalagizwa kwa utu wa kukumbukira siku zosi iryahu sadaka ya kifwa cha Masihi, na gago mapato hupatago muryahu.

*Kuuza.* Fungu ra-ndze, hedu muvano, kahi za Chakurya cha Bwana ni inoni?

*Kudzigidzya.* Ni Mukahe na Divei, arizholagiza Bwana kwamba vihokerwe.

*Kuuza.* Fungu ra ndani, utu urioonyeswa, ni inoni?

*Kudzigidzya.* Ni Mwiri na Milatso zha Masihi, nazho kavina hae-hae ni kuhalwa na kuhokerwa jeri ni ao makuluhirao kahi za Chakurya cha Bwana.

*Kuuza.* Siswi ni kukala angara a mapato gani kahi za utu uo?

*Kudzigidzya.* Maroho gehu ni kupewa nguvu na kuvai-zwa kwa Mwiri na Milatso-ye Masihi, here viryahu miiri yehu ipewazho nguvu kwa uryahu Mukahe na iryahu Divei.

*Kuuza.* Ni utu wani umalwao kwa ao madzirirao Chakurya cha Bwana?

*Kudzigidzya.* Utu umalwao kwa ao ni kudzipeleleza, mamanye chamba madzadzyuta jeri dambi zao za kare,

na kumala zhomu kukala na mwendo musha; na kukala na kuluhiri ririro moyo kahi za mbazi za Mulungu zirizorefwa kwa Masihi, na kukumbukira na muvera kifwa-che; na kuhendzana na atu osi.

## KARA-KARA YA KUANGIZA NGUVU,

HEDU KUAIKIRA MIKONO ATU MARIOBAPUTIZWA KARE, NAO MADZAFIKA MYAKA YA KUHENDA IKILI.

*Siku indiyokwa, atu osi mandioangizwa nguvu maki-gonya kuikwa na kuima kara-kara mbere za Bishopu; haho iye (hedu Padiri mungine andiyelagizwa ni iye) nashome Maonyo gaga gatongodhyago mbere.*

**K**WAMBA utu uu wa Kuangiza nguvu urefwe kwa ngira indiyofwaha-to ao mandiohokera, Kanisa ridzaona vidzo kulagiza kwamba, akatsaangizwa nguvu mutu, isihokala aadimaye kunena riryahu Kuluhiri, na Voyo ra Bwana, na garyahu Malagizo Kumi; kidza unamanya kugaudzigidzya mungine gauzwago kahi za Maudzigidzyano mafuhi: naro lagizo riri vinfwaha zhomu kurigwira; kwamba ahoho makikula na kukala atu mario na ikili zao, nao madzagonya kudzifundya garyahu marigopigirwa daraka ni Aimirizi ao kahi za Ubaputizi, mapate kugaahikiza na kugaangiza nguvu kwa milomo yao enye, lwazu-lwazu mbere za Kanisa; kidza malage kwamba kwa nema ya Mulungu mandajeza kwenderera mbere kwa ukuluhirwi kugatsundza mautu garyahu madzigogaahikiza kwa kunena enye.

*Haho Bishopu nanene,*

**V**IDZE ninwi murio haha mbere za Mulungu, na mutunganano uu, munakihenda kaheri kiryahu kilagane kibomu, hati riryahu rirohendwa kwa madzina

genu makati ga kubaputizwa kwenu; munariahikiza na kuriangiza nguvu ninwi enye, munene kwamba ni hata mugakuluhire na kugahenda mautu garyahu gosi murigopigirwa daraka na Aimirizi enu?

*Haho ao na maudzigidzye kula mumwenga kwa mumiro usikirikao,*

Ee, ninagaahikiza.

*Bishopu.*

**W**AVWIZI wehu u kahi za Dzina ra Bwana; *Kuahika.* Ariyeumba mulunguni na-tsi.

*Bishopu.* Dzina ra Bwana na rilikwe;

*Kuahika.* Hangu vikara hata kare na kare.

*Bishopu.* Bwana ugasikire mavoyo gehu.

*Kuahika.* Na kugaya kwehu na kukufikire.

*Bishopu.* Na huvoye.

**M**MULUNGU mwenye nguvu zosi uriye moyo kare na kare, uwe udzakala radi kuagera ahumikio aa uzhazi usha kwa Madzi na Roho Mweri, udzaagera usiro ra dambi zao zosi; hunakuvoya, hewe Bwana, uaangize nguvu kwa yuyahu Mwavwizi Roho Mweri, kula siku uaongezeze vigerwa-zho zha nema zha mid-hemba minji ndani mwao; nazho ni roho ra ikili na kung'alirwa; roho ra ojano na nguvu za rohoni; roho ra kumanya na ra kumogoha Mulungu jeri; nawe uadzaze hewe Bwana, roho ra kukutya kwa ueri, vikara na siku zosi. *Haami.*

*Haho ao osi na madze kara-kara mapige mavwindi mbere za Bishopu, naye aike makono-we kitswani mwa kula mutu mumwenga-mumwenga, anene,*

**M**MUCHINGE yuyu Muhohoo, hewe Bwana, [hedu, *Muchinge yuyu Muhumikio, hewe Bwana,*] kwa nema-yo ya mulunguni, apate kwenderera kukala wako siku zosi; aongerere kula siku kahi za Roho-ro Mweri, hata aufikire utawalio wa kare na kare. *Haami.*

*Haho Bishopu nanene,*

Bwana nakale hamwenga nanwi.

*Kuahika.* Nakale hamwenga na roho-ro.

*Kidza osi na mapige mavwindi, yuyahu Bishopu  
naenderere kunena,*

Na huvoye.

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeki kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. Haami.

*Na Voyo riri.*

**M**MULUNGU mwenye nguvu zosi, uriye moyo kare na kare, ndiwe uhugeraye kugahenda na kugahenda mautu garyahu garigo madzo na kufwaha mbere za Indzi-ro ra Kimulungu; Siswi hu maguluni hako, hunaavoyera aa ahumikio, hudzioaikira mikono yehu vikara, here marizhohenda Ahumwao aeri, hupate kuaonyesa, kwa muvano uu, radi uriyo nayo kwao na udzoo urio wa nema. Hunakuvoya, mukonoo wa ubaba ukale dzulu zao siku zosi; Roho-ro Mweri akale siku zosi hamwenga nao; na kwa viryahu undizhoulongoza kahi za kurimanya na kurisikira Neno-ro, vikale kwamba, musindikizo maupate uzima wa kare na kare; kwa Jesu Masihi Bwana wehu, naye ndeye ariye moyo na kutawala hamwenga na uwe na Roho Mweri, Mulungu mumwenga siku zosi hata, kare na kare. Haami.

**H**EWWE Bwana mwenye nguvu zosi, Mulungu wa kare na kare, hunakuvoya uone-to kuhulagiza, na kuhueza, na kuhutawala, myoyo yehu na miiri yehu, kahi za ngira za malamulo-go, na kahi za mahendo ga malagizo-go; kwamba kwa undizhohurinda zhomu haha

na siku zosi, hutsundzwe miiri yehu na maroho gehu; kwa Bwana wehu Mokoli wehu Jesu Masihi. Haami.

*Haho Bishopu na ahase, anene vivi,*

**U**HASWI wa Mulungu mwenye nguvu zosi, Baba, na Mwana, na Roho Mweri, na ukale dzulu zenu, na kutoa hamwenga nanwi kare na kare. Haami.

*Kahana andiyeahikizwa kudza kwa Ungara ueri, hata andihokala udzaangizwa nguvu, hedu kukala mutu adziyekala-to kuangizwa nguvu naye unahenda mwenye.*

## KARA-KARA YA ULOZI.

*Atu osi mandiolozwa kwandza uvoro wa Ulozi wao ni hata umanyiswe Mushikitini siku ya Jumaapili tahu lwakwe-lwakwe, makati ga Mavoyo ga Madzacha, hedu vikikala kahana Mavoyo ga Madzacha, ni kukala makati ga Mavoyo ga Dziloni, nyuma za Mashomo ga hiri; yuyahu Padiri nanene here ro ada ririzho,*

**N**NINAMANYISA uvoro wa Ulozi wa Nganya wa (hatu hasiku) na Nganya wa (hatu hasiku). Chamba kuna mutu kahi-kahi za ninwi amanyaye chausa, hedu kizizo cha hachi, cha kuazulia atu aa makatsalunganywa kahi za Ulozi ueri, vinawirya munene. Gago ndo makati ga kwandza [hedu ga hiri, hedu ga hahu] ga kumuza gaga.

*Nao vikikala manatoa kahi za mihaka ya Mishikiti ya lwakwe-lwakwe, Uvoro wao ni hata uruzwe kahi za mishikiti yosi miiri; naye Padiri wa mishikiti uu nasialoze hata apate taratasi kwa Padiri wa mishikiti uryahu wa hiri ya kumumanyisa kwamba Uvoro udzauzwa kana tahu.*

*Siku iriyorikwa ya kuloza makati gakisika, aryahu*

*mandiolozwa na mangire ndani ya mushikiti hamwenga na asena ao na atu a kwao : maime hamwenga osi airi, iye Mulume luhande lwa mukono wa kurya, na iye Muche luhande lwa mukono wa kumotso, ndo Kasisi anene,*

**A**HENDZWI zhomu, hudzaturanana haha mbere za Mulungu na mutunganano uu, hupate kualunganya Mulume yuyu na Muche yuyu kahi za Ulozi ueri; nao ni utu wa ishima, uriolagizwa ni Mulungu kare mbere, anadamu kamadzangwe kukosa, kidza unafwonyesa uryahu umwenga urio wa njama ario nao Masihi na Kanisa-re; nao utu uu ueri Masihi wauulula na kuuangiza urembo kwa viryahu arizhokwenda harusini iye mwenye, na kwa muvano uryahu wa kwandza ariouhenda kahi za Kana ya Galili; kidza unalikwa utu uo ni Mweri Paulo kwamba uishimiwe ni atu osi: bai kwa viryahu kavifwaha kudzihirika mumo hedu kudzangiza haraka na hasiho kuririkana hedu na ikili mbii, atu mapate kutimiza tamaa za miiri yao here nyama masio na ikili; ela maangirao na mangire na ishima, na kuririkana, na maojano, na ikili, na kumogoha Mulungu; maririkane ni kwa utu wani Ulozi walagizwa ni Mulungu.

Kwandza, Walagizwa kwa utu wa kuzhala ana, mapate kurerwa ao kahi za kumogoha Mulungu na urezi-we, na kwa kurirehera nguma Dzina-re ryeri.

Hiri, Walagizwa upate kukala muhaso wa dambi, atu madzitanye na uzindzi; na kwamba ao masio nacho kiryahu kigerwa cha uvumirizi mapate kulola, na kudziika-to utu wa kukala vilungo visizho nyenye zha mwiri wa Masihi.

Hahu, Walagizwa kwa utu wa aryahu kukala hamwenga, na kuavwizana, na kutsundzana, here viwiryazho, makati ga kuhendekerwa na makati ga kuhungukirwa. Nao utu uo urio ueri atu aa airi mario haha madzire lunganywa mumo. Bai chamba mutu atungwaye unaadima kuonyesa chausa cha hachi cha kuaziza makatsalunganywa kara-kara na wagirwi, nanene vikara, hedu hangu vikara hata kare na kare anyamale.

*Kidza nanene na aryahu mandiolozwa, ambe,*  
**M**IMI namuonya na kumulagiza ninwi nyosi airi, kwa viryahu mundizhoalamulwa siku iryahu ya hukumu indiyogosha, haho zindihogunulwa njama za myoyo yosi, vikikala mumwenga kahi za ninwi airi unamanya kizizo kindichomuzulia ninwi kulunganywa kahi za Ulozi kara-kara na wagirwi, museme vikara zhenye. Kwani manyani kwamba osi mariolunganywa kwa viryahu visizho kara-kara na Neno ra Mulungu kamalunganywa ni Mulungu, na Ulozi wao si wa wagirwi.

*Na siku iryahu ya Ulozi, akikala mutu atungwaye unakala chodherwa na kuonyesa kizizo chosi kindichozizwa makatsalunganywa kahi za Ulozi, here virizholagizwa ni Malagizo ga Mulungu, hedu Malagizo ga Utawali uu; naye mutu yuyahu yu-to kupiga daraka, na apigi a daraka angine hamwenga naye, mvero wa kutosha kwao mamalao kulozwa; hedu aike mufunga (kwa kima kirichotimira cha kadiri madzikopata atu aryahu mamalao kulozwa) kwamba upate kuonyesa kukala ni jeri adzigolazhira chodherwa: haho ndo suti Ulozi utizwe, hata vigome kulolwa virizho ujeri. Vikikala kakisemerwe kizizo kamare, haho Padiri namwambire yuyahu Mulume,*

**H**EW (Nganya) unahendza kukala naye Muche yuyu akale mucho wa kumulola, mukale hamwenga here Mulungu arizholagiza kahi za utu ueri wa Ulozi? Undamuhendza, undamuhuriza moyo-we, na kumuishi-mu, na kumutsundza, akikala mukongo akikala muzima; na angine osi undadzahusa nao, udziike uwe kukala na iye hakeye, siku zosi mundizokala moyo nyosi airi?

*Yuyahu Mulume naudzigidzwe,*

*Ee, naahikiza.*

*Haho Kasisi namwambire yuyahu Muche,*

**H**EW (Nganya) unahendza kukala naye Mulume yuyu akale mulumeo wa kukulola, mukale

hamwenga here Mulungu arizholagiza kahi za utu ueri wa Ulozi? Undamusikira, na kumuhumikira, undamuhendza, na kumuishimu, na kumutsundza, akikala mukongo akikala muzima; na angine osi undadzahusa nao, udziike uwe kukala na iye hakeye, siku zosi mudi-zokala moyo nyosi airi?

*Yuyahu Muche naudzigidzye,*

*Ee, naahikiza.*

*Haho Padiri nanene,*

Ni hani amulazhaye Muche yuyu kumuloza Mulume yuyu?

*Haho ndo mandihopigirana daraka here vivi.*

*Yuyahu Padiri amukohere yuyahu Muche mikononi mwa babaye hedu musena-we, kidza amonyese yuyahu Mulume auhirike mukono-we wa kurya na kugwira mukono wa kurya wa yuyahu Muche, anene nyumaze gaga gatwanago.*

**M**IMI (Nganya) nakuhala uwe (Nganya) ukale muchangu wa kukulola, nikale nawe na kukugwira hangu vivi rero, vidzoni viini, kwa unji kwa uchache, kahi za ukongo kahi za matsiya, nikuhendze na kukutsundza, hata kifwa kindihohutanya, here lagizo ryeri arirolagiza Mulungu; nami kwa utu uo nakupigira daraka rangu.

*Haho marichane mikono; naye Muche auhirike mukono-we wa kurya na kugwira mukono wa kurya wa yuyahu Mulume, naye anene nyuma za Padiri vizho,*

**M**IMI (Nganya) nakuhala uwe (Nganya) ukale mulumangu wa kunilola, nikale nawe na kukugwira hangu vivi rero, vidzoni viini, kwa unji kwa uchache, kahi za ukongo kahi za matsiya, nikuhendze, na kukutsundza, na kukusikira, hata kifwa kindihohutanya, here lagizo ryeri arirolagiza Mulungu; nami kwa utu uo nakupigira daraka rangu.

*Haho na marichane mikono kaheri; naye Mulume amupe yuyahu Muche pehe, ariike dzulu za chuwo hamwenga na ada, here madzizhozoera kupewa Kasisi na Mwawwizi-we. Kasisi naihale iryahu pehe amupe yuyahu Mulume, amuwike yuyahu Muche chala cha-ne cha mukono-we wa kumotso. Naye Mulume aigwire iryahu pehe haho, nanene kwa kufundywa ni yuyahu Kasisi,*

**M**IMI kwa Pehe ii nakulola, kwa mwiri wangu nakuishimu, nami vitu zhangu zhoshi zha uru-mwenguni nakugera: Kwa Dzina ra Baba, na ra Mwana, na ra Roho Mweri. Haami.

*Haho yuyahu Mulume nairiche iryahu pehe muryahu kahi za chala cha-ne cha mukono wa kumotso wa yuyahu Muche, mapige mavwindi osi airi; naye Padiri nanene,*

Na huvoye.

**H**EWWE Mulungu wa kare na kare, Muumbi, Muri-ndzi wa anadamu osi, ndiwe Mulazhi wa nema zosi za rohoni, ndiwe Chaho cha uzima wa kare na kare; Uahase ahumikio aa, mulume yuyu na muche yuyu, fwahasao siswi kwa Dzina-ro; kwamba here Isaaka na Rebeka marizhotoa hamwenga kwa ukuluhirwi, atu aa vizho maritimize hati rao na kilagane chao maricholagana, (irizho Pehe ii mariyogerana na kuhokerana idzakala ni muvano-we, mufunga-we,) nao makale siku zosi hamwenga kahi za kuhendzana na dheri vidzizhotimira, mende kara-kara na malagizo-go; kwa Jesu Masihi Bwana wehu. Haami.

*Haho Kasisi nailunganye mikono yao ya kurya, anene,*

*Adzioalunganya Mulungu, mudamu akatsaatanya.*

*Haho Padiri nanene na aryahu atu.*

**K**WA kukala (Nganya) na (Nganya) madzaahikizana kahi za Ulozi ueri, na utu uo madzaulazhira zhodherwa mbere za Mulungu na mutunganano uu, kidza madzapigirana daraka na kulagana enye na enye,



naro madzaronyesa lwazu kwa kugera na kuhokera Pehe, na kugwirana mikono; mimi ninamba aa ni Mulume na Muchewe hamwenga, Kwa Dzina ra Baba, na ra Mwana, na ra Roho Mweri. Haami.

*Naye Padiri agaongeze maneno gaga ga Uhaswi.*

**M**MULUNGU Baba, Mulungu Mwana, Mulungu Roho Mweri, namuhase, amutsundze, na kumurinda; Bwana namulole kwa mbazi na kumugera nema-ye; na kwa viryahu andizhomudzaza uhaswi wosi wa rohani na nema, mukale-to hamwenga kahi za uzima uu, hata kahi za urumwengu udzao mupate kukala na uzima wa kare na kare. Haami.

*Haho ndo yuyahu Padiri hedu Aawwizi, kwenda Mezani mwa Bwana, na kunena hedu kuimba Zaburi ii.*

*Beati omnes. Zab. cxxviii.*

**B**BAHA kula mutu amogohaye Bwana: kula endaye kahi za ngira-ze.

Kwani undarya kazi za mikono-yo: baha uwe, nawe undafwahirwa.

Muchoe undakala here muzabibu uzhalao-to: ndani ya nyumba-yo;

Anao here vitsahukuzi zha mizeituni: kanda za meza-yo.

Lola, ndo andizhohaswa: mutu amogohaye Bwana.

Bwana undakuhasa kulaa Sayuni: nawe undawona udzo wa Jerusalem siku zosi za kukala moyo kwako;

Ni jeri, nawe undaona ana a anao: dheri na rikale dzulu za Isiraeli.

Nguma na ikale kwa Baba, na kwa Mwana: na kwa Roho Mweri;

Here virizhokala kwandza, na vikara: hata kare na kare ni vizho. Haami.

*Hedu Zaburi ii.*

*Deus misereatur. Zab. lxxvii.*

**M**MULUNGU na afwonere mbazi, ahuhase: afwonyese mulangaza wa uso-we:

Ngira-yo imanyikane dzulu za-tsi: wokolwio umanyikane kahi za kolo zosi.

Atu na makulike, hewe Mulungu: atu osi na makulike.

Kolo za atu mafwahirwe, maimbe na kuererwa: kwa kukala undaalamula atu na hachi, undaalongoza kolo za atu dzulu za-tsi.

Atu na makulike, hewe Mulungu: atu osi na makulike.

Tsi na izhale vitu-zhe: Mulungu, Mulungu wehu, undahuhasa.

Mulungu undahuhasa: pembe zosi za-tsi zindamogoha.

Nguma na ikale kwa Baba, na kwa Mwana: na kwa Roho Mweri;

Here virizhokala kwandza, na vikara: hata kare na kare ni vizho. Haami.

*Zaburi ikigoma, yuyahu Mulume na yuyahu Muche na mapige mavwindi mbere za Meza ya Bwana, naye Kasisi aime haho Mezani, naerekeze, anene,*

*Bwana, fwonere mbazi.*

*Kuahika. Masihi, fwonere mbazi.*

*Padiri. Bwana, fwonere mbazi.*

**B**BABIYEHU uriye mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni; Ela fwokole na mai. Haami.

*Padiri. Hewe Bwana, uaokole ahumikio aa, mulume na muhe;*

*Kuahika. Makukuluhirao uwe.*

*Padiri. Hewe Bwana, uarehere waywizi kulaa kahi za hatu-ho haeri;*

*Kuahika. Uarinde siku zosi.*

*Padiri. Kwao ukale ngome iriyo na nguvu,*

*Kuahika. Kuachinga na nyuso za adui zao.*

*Padiri.* Hewe Bwana, usikire kuvoya kwehu.  
*Kuahika.* Kugaya kwehu na kukufikire.

*Padiri.*

**H**EWU Mulungu wa Iburahimu, nawe u Mulungu wa Isaaka, nawe u Mulungu wa Jakabu, uahase aa ahumikio, ilaye mbeyu ya uzima wa kare na kare myoyoni mwao; kwamba gosi mandigodzifundya-to kahi za Neno-ro ryeri, magatimize kahi za vihendo zhao. Hewe Bwana, kuko uriko mulunguni ualole kwa mbazi, na kuahasa. Nawe dza viryahu urizhoahasa Iburahimu na Sara, kwa kuahuriza zhomu, uone-to vizho kuahasa aa ahumikio; hata kwa mandizhosikira mahendzo-go, na kukala-to kahi za urindzio, makale kutoa kahi za kuhendza-ko hata musindikizo wa kukala moyo kwao; kwa Jesu Masihi Bwana wehu. *Haami.*

*Voyo riri rituwanaro na ririchwe, vikikala yuyahu  
 Muche si mutu wa kuzhala ana kaheri.*

**H**EWU Bwana mwenye mbazi, Babiyehu wa mulunguni, ni kwa vigerwa-zho zha nema anadamu maongezekazho; Hunakuvoya uaavwize atu aa airi kwa kuahasa, kwamba makale atu a kuhendekerwa kahi za kuzhala ana, na kukala hamwenga kapindi kahi za kuhendzana-to na ukuluhirwi, hata mapate kuona ana ao kurerwa kahi za kuluhira ra Masihi na mautu madzo, kwa kukulika na kukuishimu; kwa Jesu Masihi Bwana wehu. *Haami.*

**H**EWU Mulungu, uwe kwa nguvu-zo nyinji waumba vitu zhasi hasiho kitu; kidza (urihogonya kuhenda-to mangine), ukireha kwamba yuyahu mulume (ariyeumbwa kwa kuhalana na sura-zo mwenye), kwakwe iye kipatikane chaho cha yuyahu muche; nawe kwa viryahu urizhoalunganya hamwenga, wafundya kwamba ao urioahendya kukala here mumwenga kwa Ulozi, kavindakala kara-kara kamare kuatanya: hewe Mulungu, uriyeueza utu uo wa Ulozi ukikala ni njama mbidzo sana, hata kahi za utu uo ni kuhalanywa na

kuonyeswa ulozi na umwenga wa rohani virizho kahi za Masihi na Kanisa-re; Ualole kwa mbazi ahumikio aa, kwamba yuyu mulume amuhendze muchewe, kara-kara na Neno-ro, (here Masihi arizhomuhendza mulozwi-we, naro ni Kanisa, akidzilazha mwenye kwa utu-we, kwa kurihendza na kurirera, here mutu ahendzazho mwiri-we,) kidza kwamba muche yuyu akale akimuhendza mulume-we na kumufwahira, mukuluhirwi, musikiri; naye kwa upore wosi, na uhurizi, na dheri, aatuwe atu ache aeri mamogohao Mulungu. Hewe Bwana, uahase osi airi, uagere na kuhala ufa wa utawalio wa kare na kare; kwa Jesu Masihi Bwana wehu. *Haami.*

*Haho Kasisi nanene,*

**M**ULUNGU mwenye nguvu zosi, ariyeaumba haho chaho azhazi ehua kwandza, Adamu na Hawa, akiaeza na kualunganya hamwenga kahi za ulozi; Amumwagire ninwi mali za nema-ye, amueze na kumuhasa, kwamba mumufwahire miiri yenu na maroho genu, nanwi mukale hamwenga kahi za kuhendzana kweri hata siku zenu za kukala moyo zigome. *Haami.*

*Kidza vikikala kahana kuambiriza kuonyesako viviryazho Mutu na Muchewe, haho Padiri nagashome gaga gatuwanago.*

**H**ENWI nyosini muriolozwa, na ninwi muazao kuangira kahi za utu uryahu ueri wa Ulozi, sirikizani ganenwago ni Maoro maeri kahi za mautu gawiryago alume kwa ache ao, na aryahu ache kwa alume ao.

Mweri Paulo, kahi za Waraka-we arioahirikira Waefeso, Muryango wa tsano, unalagiza vivi alume osi mariolola ache; Henwi alume, ahendzeni ache enu, here viryahu Masihi arizhorihendza Kanisa, na kudzilazha mwenye kwa utu-we, apate kurieza akigonya kuritsusa kwa kuogesa na madzi, hamwenga naro Neno; kwamba adzipatire mwenye Kanisa ra nguma, risiro na kapalata, heđu munyau, heđu utu wosi

here dza uo ; ela kwamba rikale ryeri, hasiho kukala na aebu. Vizho alume maagirwe ni kuahendza ache ao here viryahu maihendzazho miiri yao enye. Iye amuhendzaye muchewe unadzihendza mwenye : kwani kahana ariyeimena nyama ya mwiri-we mwenye kamare, ela ni kuiirisa na kuitsundza, here viryahu Masihi aritsundzazho Kanisa : kwa kukala siswi hu vilungo zha mwiri-we. Kwa utu uu mutu undaaricha babaye na mameye, naye undagwirana na muhe-we ; nao airi mandakala ni mwiri mumwenga. Njama ii ni bomu ; ela nanena zha Masihi na zha Kanisa. Hamwenga na gaga, na ninwi kula mutu lwakwe-lwakwe namuhendze muchewe, here adzihendzazho mwenye.

Naye Mweri Paulo, kahi za kuaorera Akolosai, unanena vivi na alume osi mariolola ache ; Alume, ahendzeni ache enu, siaonereni utsungu.

Sirikizani na anenazho Mweri Petero, Muhumwa wa Masihi, naye were ni mutu ariyelola muhe, aambirazho mariolola ; Nanwi alume, toani na achenu kara-kara na mumanyazho ; kwa kumupa iye muhe ishima, here kiya kiricho kinyonge zaidi, kidza here murizho ahali-a-ufwa hamwenga a nema ya uzima, kwamba kuvoya kwenu kukatsazizwa.

Gago mudzigosikira ndo gawiryago mulume kwa muchewe. Bai vikara, ninwi ache vizho, sirikizani mukadzifundye gago gamuwiryago kwa alume enu, here garizhoikwa lwazu kahi za Maoro maeri.

Mweri Paulo, kahi za uryahu Waraka arioahirikira Aefeso, hudziahadza vikara, unamufundya ninwi here gaga ; Henwi ache, dzitserezeni kwa alume enu enye, here viryahu kwa Bwana. Kwani mulume ni kitswa cha muhe-we, here viryahu Masihi naye ni kitswa cha Kanisa : naye mwenye ni Mokoli wa mwiri. Bai here Kanisa ririzho tsini za Masihi, nao ache makale vizho kwa alume ao kahi za mautu gosi. Naye unanena kaheri, Yuyahu muhe nalole kwamba amogohe mulume-we.

Na kahi za Waraka-we arioahirikira Akolosai, Mweri Paulo unamupa mafundyo gaga mafuhi ; Henwi ache, dzitserezeni kwa alume enu, here vifwahazho kahi za Bwana.

Mweri Petero unamufundya-to, anenaho gaga ; Henwi ache, dziikeni tsini za alume enu enye ; kwamba, viki-kala kuna angine masiosikira ro Neno, mapatikane kwa mwendo wa ache ao hasihokala na riryahu Neno ; makiwona mwendo wenu wa kutsuka hamwenga na oga. Nanwi kudzialula kwenu kukatsakala kuryahu kudzialula kwa kusuka nyere, na kuvwala viya zha dahabu, hedu kudziwika mavwalo ; ela na kukale mutu ariyefitswa wa moyoni, kahi za mavwalo gasigoonongeka ; ga roho ra upore na uhurizi, ririro ra kima kinji mbere za Mulungu. Kwani aryahu atu ache aeri nao haho kare, ao mariomukuluhira Mulungu, ndo marizhodzialula, na kudziika tsini za alume ao enye ; here Sara arizhomusikira Iburahimu, akimuiha bwana ; nanwi mu ahohoe iye vikara, mukihenda vidzo, nanwi kamuogoshezhwa ni kuhondoswa kosi.

*Vinafwaha kwamba ao madziolozwa mahokere Ungara ueri makati ga kulozwa kwao, hedu siku ya kwandza mandihoadima nyuma za kulozwa kwao.*

---

## KARA-KARA YA KUZIKA NYUFU.

*Na vilowe-to kwamba Kara-kara ii ituwanyo ikatsahumirwa kwa kuazika atu mariofwa mbere kamadzangwe kubaputizwa, hedu ao mariopigirwa gomera ra Kanisa, hedu ao mariodzialaga enye.*

*Kasisi na Aawwizi maludhane luryahu Lufu muviryani mwa Muhala wa Mushikiti, kidza malutongodhyere, chamba ni kuangira Mushikitini, chamba ni kwenda Mbirani, manene, hedu maimbe,*

**N**DIMI niriye ufufulo na uzima, unamba Bwana : anikuluhiraye mimi, angahokala udzafwa, undafufuka : na kula mutu ariye moyo na kunikuluhira mimi kandafwa kare na kare. *Mwari Joh. xi. 25, 26.*

**N**AMANYA kwamba Mukomboli wangu u moyo, naye siku ya musindikizo undaima dzulu za-tsi. Kidza kikonde changu kindihogoma kuonongeka, hasiho mwiri wangu nindamona Mulungu : naye nindamona mimi mwenye, matso gangu gandumulola, si mungine. *Ayubu xix. 25, 26, 27.*

**K**AFWANGIRIRE na kitu kahi za urumwengu uu, kidza kuombola na kitu kafwadima. Bwana walazha, naye Bwana udzausa ; narihaswe Dzina ra Bwana. *1 Tim. vi. 7. Ayubu i. 21.*

*Makigonya kuangira Mushikitini, na ishomwe Zaburi mwenga kahi za zizi, hedu zosi mbiri.*

*Dixi, Custodiam. Zab. xxxix.*

**N**AAMBA, Nindatsundza ngira zangu : pore nika-henda dambi kwa lurimi lwangu. Nindaunya kanwa kangu na mukowa : yuyahu muwi akalaho mbere zangu.

Nere bwibwi kwa kutsanena : nanyamala, hata madzo siganenere ; kigondzi changu kikhuta-huta.

Moyo wangu ukiaka moho ndani mwangu, nami nirihokala nikiaza-aza uryahu moho ukilazha luchemi : nami nikinena na lurimi lwangu ;

Bwana, nimanyisa musindikizo wangu, na kiezoo cha siku zangu ni nyingahi : unimanyise nirizho munyonge.

Lola, siku zangu udzazihendya here visiku : myaka yangu si kitu mbere-zo ; jeri kula mutu angahokala una utu udzo ni muhuye tu.

Ni jeri kula mutu ni kwenda here kivuri-vuri, ni jeri manadzisirinya bule : ni kuhenda mali tsumbi-tsumbi, naye kamanya ni hani andiyezikundzumanya.

Na vikara ninarindizani : tamaa yangu i kwako uwe. Nitizha na makosa gangu gosi : sinihendye nikakala kitseo kwa azuzu.

Nere bwibwi, sigunulire kanwa kangu : kwa kukala ni uwe uriyegahenda.

Niusira pigo-ro nidzagomezwa kwa kueremerwa ni mukonoo.

Umupigaho mutu kwa kumuchemera kwa utu wa dambi-ze, uwe ni kuugonyeza utana-we here uriwazho ni poho : ni jeri kula mutu ni muhuye tu.

Sikira kuvoya kwangu, hewe Bwana, usirikize kiriro changu : usinyamalire matsozi gangu.

Kwani mimi kwako ni mujeni : ni muvomoli wa kadzumba here marizhokala ano baba osi.

Niricha, nipate kutangamuka : mbere sidzangwe kuuka haha, na kutsakalaho kaheri.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Domine, refugium. Zab. xc.*

**B**WANA, ndiwe uriyekala makalo gehu : kahi za vizhazi zhosi.

Mbere mirima yere kaidzangwe kuzhalwa, mbere kudzangwe kuumba-tsi na urumwengu : hangu kare na kare hata kare na kare uwe ndiwe Mulungu.

Unamugaluza mutu akale vumbi : unamba, Uyani, anadamu.

Kwani myaka magana kumi mbere-zo ni here dzana tu irihokira : ni here isa ra usiku.

Uwe ni kausa here madzi ga mureto, manakala here usindzizi : madzacha ma here nyasi zimerazo.

Madzacha ni kutsehula na kumera : dziloni ni kutoswa na kunyala.

Kwani hunagomezwa kahi za kutsukirwa-ko : hunasirima kahi za koro-zo.

Udzagaika mai gehu mbere-zo : dambi zehu za njama zi kahi za mulangaza wa usoo.

Kwani siku zehu zosi zidzakira kahi za koro-zo : hunamarigiza myaka yehu here usisi wa moyo.

Siku za myaka yehu ni myaka mirongo mihahu na kumi; hedu kwa utu wa nguvu inaadima kukala mirongo mine : ela nguma-ye ni masirimo na kigondzi tu; kwani ni kukira haraka naswi ni kubururuka.

Ni hani amanyaye nguvu za kutsukirwa-ko : na koro-zo zirizho mwero wa kuogoshako ?

Uhufundye kuzitala siku zehu : kwamba hudzipatire moyo wa ikili.

Uya, hewe Bwana, hata rini : uaonere mbazi ahumikio.

Fwakushe madzacha kwa mbazi-zo : hupate kufwahirwa na kuererwa siku zehu zosi.

Uhufwahire mwero wa zo siku urizohusirinya : nayo myaka huriyoona uwi.

Kazi-yo ioneke kwa ahumikio : na nguma-yo kwa ana ao.

Kidza utana wa Bwana Mulungu wehu na ukale dzulu zehu : nayo kazi ya mikono yehu uhurungarazire, jeri kazi ya mikono yehu uirungaraze.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Haho na riturwe gaga Mashomo galaago kahi za Waraka wa kwandza wa Mweri Paulo ariohirikira Akorintho, Muryango wa kumi na tsano.*

1 Akor. xv. 20.

**V**IKARA Masihi udzafufuka kahi za nyufu, udzakala lumbuko ra ao mariolala. Kwa kukala here kifwa ni kwa utu wa mudamu, vizho na kufufuka nako ni kwa utu wa mudamu. Kwa kukala here osi mafwazho kahi za Adamu, vizho osi manahendywa kukala moyo kahi za Masihi. Ela kula mutu kahi za hatu-he : Masihi

ni lumbuko ; kidza ao mario a Masihi, kahi za kudza-kwe. Kidza unadza uryahu musindikizo, haho andihomupa Mulungu, iye Baba, uryahu utawali ; haho andihokala udzausa kula indzi, na kula lamulo, na kula wadimi. Kwani ni suti atawale, hata andihokala udzaaika adui-ze osi tsini za magulu-ge. Adui wa kusindikiza andiyeuswa ni kifwa. Kwani, Wazhiika vitu zhosi vikale tsini za magulu-ge. Ela haho anenaho kwamba, Vitu zhosi vidzai kwa vikale tsini, ni lwazu kwamba iye ariyehika vitu zhosi vikale tsini-ze kamo. Na haho vitu zhosi vindihokala vidzai kwa tsini-ze, ndo Mwana naye undakala tsini za iye ariyehika vitu zhosi tsini-ze, kwamba Mulungu akale zhosi kahi za osi. Hedu, mandahendadze ao mabaputizwao kwa utu wa nyufu ? Chamba nyufu kamafufuka kamare, vidze ao kubaputizwa kwa utu wao ? vidze siswi naswi kukala kahi za mazani kula murongo ? Kula siku nafwa, jeri kwa kudzilika kwangu kwa utu wenu, ndugu zangu, niriko nako kahi za Masihi Jesu Bwana wehu. Chamba here utu wa kidamu napigana na nyama a tsakani kuko Efeso, vinanifwahani ? Chamba nyufu kamafufuka, na hurye na hunwe, kwa kukala machero hunafwa. Sikengweni : Vikalo vii ni kuononga utu udzo. Lamukirani hachi, sihendeni dambi ; kwani angine kamana umanyi wa Mulungu : nanena gaga kumugwiza haya. Kanji mutu undamba, Nyufu ni kufufulwadze ? nao ni kudza na mwiri wani ? Hewe muzuzu we, kiryahu ulayacho uwe kakikala moyo, kisihofwa : nacho ulayacho, kulaya uryahu mwiri undiokalaho, ela ni tembe tuhu, kanji ya nganu, hedu ya mudhemba mungine ; ela Mulungu ni kuigera mwiri here ahendzazho, na kula mbeyu ni kugerwa mwiri-we wenye. Nyama zosi si nyama mwenga : ela i haho nyama ya mudamu, na nyama nyingine ya nyama a magulu mane, na nyingine ya nyama mabururukao, na nyingine ya makumba. Kidza i haho miiri ya mulunguni, na miiri ya-tsi : ela nguma ya iryahu ya mulunguni i

lwakwe, na ngumà ya iryahu ya-tsi i lwakwe. I haho nguma ya dzuwa iriyo lwakwe, na nyingine ya mwezi, na nyingine ya nyenyezi; kwani nyenyezi na nyenyezi nguma zao zi lwakwe-lwakwe. Na kufufuka kwa nyufu ni vizho. Ni kulaywa kahi za wonongeki; ni kufufulwa kahi za utu wa kutsaonongeka: ni kulaywa kahi za uhuye-huye; ni kufufulwa kahi za nguma: ni kulaywa kahi za unyonge; ni kufufulwa kahi za nguvu: ni kulaywa mwiri wa nafusi; ni kufufulwa mwiri wa roho. Chamba kuna mwiri wa nafusi, na mwiri wa roho pia u haho. Ndo virizhoorwa, Mutu wa kwandza Adamu akikala nafusi iriyo moyo. Adamu wa kusindikiza akikala roho igerayo uzima. Ela uryahu urio wa roho si wa kwandza, ela ni uryahu urio wa nafusi; kidza uryahu urio wa roho. Mutu wa kwandza ni wa-tsi, ni wa mitsanga; mutu wa hiri ni wa mulunguni. Here arizho iye wa mitsanga, ndo marizho nao mario a mitsanga: na here arizho iye wa mulunguni, na ao a mulunguni ma vizho. Kidza viryahu hurizhohala sura za iye wa mitsanga, naswi vizho hundahala sura za iye wa mulunguni. Bai nanena riri, ndugu zangu, kwamba nyama na milatso kazhadima kuhala ufwa utawali wa Mulungu; hedu kionongekacho kakihala ufwa kisichoonongeka. Lolani, namuambira njama: Kahundalala siswi hosini, ela hosini hundagaluzwa, lumwenga, here kupesa na kulangaza, palapanda ya musindikizo: kwani palapanda indarira, na nyufu zindafufulwa kahi za utu usio na wonongeki, naswi hundagaluzwa. Kwani suti uu uonongekao uvwikwe utu wa kutsaonongeka, na uu ugwirwao ni kifwa uvwikwe utu wa kutsafwa. Ela uu uonongekao undihokala udzavwikwa utu wa kutsaonongeka, na uu ugwirwao ni kifwa undihokala udzavwikwa utu wa kutsafwa, ndo rindihokala neno riryahu ririroorwa, Kifwa kidzamizwa kahi za kudhimwa. Hewe kifwa, kudhima-ko ku hiko? Hewe kifwa, luvula-lo lu hiko? Luvula lwa kifwa ni dambi; na nguvu za dambi ni uryahu wagirwi: ela Mulungu nalikwe, ahugeraye

kudhima kwa Bwana wehu Jesu Masihi. Bai, ndugu zangu, hindzyani, mukatsarega-rega, siku zosi mukale mukihenda kazi zhomu kahi za Bwana, kwa kukala munamanya kwamba kutsoka kwenu si bule kahi za Bwana.

*Makifika Mbirani, makati ga kuluhenda-to luryahu Lufu kululaza mo ndani ya-tsi, yuyahu Kasisi nanene gaga, hedu yuyahu Kasisi na aryahu Aawwizi magaimbe:*

**M**UDAMU ariyezhalwa ni mutu muche siku-ze za kukala moyo ni chache, naye wedzere masirinyo. Ni kumera here luwa, akanyala; ni kuchimbira here kivuri-vuri, katoa.

Hungahokala kahi-kahi za uzima hu kahi-kahi za kifwa: humwendere hani andiyefwawwiza usihokala uwe, hewe Bwana, nawe ndiwe uriye na hachi kutsukirwa kwa dambi zehu?

Ela-kidza, hewe Bwana Mulungu uriye Mweri zhomu, hewe Bwana uriye na nguvu zosi, hewe Mokoli Mweri uriye na mbazi zosi, usifwangize kahi za malumizo garigo na utsungu ga kifwa cha kare na kare.

Uwe Bwana, unazimanya njama za myoyo yehu; sigafundire masikiro-go ga mbazi hukuvoyaho; nawe ufwonere mbazi, Bwana uriye Mweri zhomu, hewe Mulungu mwenye nguvu zosi, Hewe Mokoli Mweri mwenye mbazi, nawe ndiwe Mulamuli mwenye hachi wa kare na kare, sihuriche murongo wehu wa kifwa, kwa malumizo gatungwago ga kifwa, hukagwa hukakukosa.

*Haho, mwiri undihotsukhirwa mitsanga ni angine kahi za ao maimireo kanda, yuyahu Kasisi nanene,*

**K**WA kukala Mulungu udzaona vidzo kwa mbazi-ze zirizo nyinji kudzihalira roho ra yuyu ndugu yehu muhendzwi adziyefwa, siswi hunawika mwiri-we kahi za-tsi; kiricho mitsanga kiuye mitsanga, kiricho

ivu kiuye ivu, kiricho vumbi kiuye vumbi ; kwa tamaa iriyo ya jeri isiyo kimoyo-moyo ya Kufufuka kwa uzima wa kare na kare, kwa Bwana wehu Jesu Masihi ; andiyeugalaza mwiri uu wa unyonge wehu, uhalane na mwiri wa nguma-ye, kwa mwero wa kuhenda-kwe iye, aadimazho kuvitsereza vitu zhosi vikale tsini-ze.

*Haho na ganenwe hedu gaimbwe,*

**NAUSIKIRA** mumiro unalaa mulunguni ukinena, Ora, Baha ao afwadzi mafwao kahi za Bwana hangu vikara : ni vizho unanena Roho ; kwa kukala manaoya nyuma za kutsoka kwao kwa kazi.

*Haho Kasisi nanene,  
Bwana, ufwonere mbazi.  
Masihi, ufwonere mbazi,  
Bwana, ufwonere mbazi.*

**BABIYEHU** uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela fwokole na mai. Haami.

*Kasisi.*

**MULUNGU** mwenye nguvu zosi, zi moyo hamwenga na-uwe roho za ao maukao kuku kahi za Bwana, kidza roho za akuluhirwi, mariogonya kuusirwa muzigo wa mwiri, zi hamwenga nawe kahi za kufwahirwa na raha ; Hunakulazhira muvera zhomu, kwa viryahu udzizhoona vidzo kumutizha ndugu yehu yuyu ukamuomboza kahi za masirinyo ga urumwengu uu wa dambi ; hunakuvoya uone vidzo kwa nema ya udzoo, kugatimiza punde mitalo ya atsagulwio, na kureha utawalio haraka ; kwamba siswi, hamwenga na aryahu osi mariofwa kahi za kuluhiro ra jeri ra Dzina-ro ryeri, hupate utimiri wehu wa-to na raha, miiri yehu na maroho

gehu, kahi za nguma-yo ya kare na kare isiyogoma ; kwa Jesu Masihi Bwana wehu. *Haami.*

*Voyo.*

**HEWE** Mulungu mwenye mbazi, ndiwe Baba wa Bwana wehu Jesu Masihi, ariye Ufufulo ariye Uzima ; naye kula mutu atungwaye amukuluhiraye iye angahokala udzafwa, undakala moyo ; na kula mutu atungwaye ariye moyo, na kumukuluhira iye, kandafwa kifwa cha kare na kare ; kidza ndeye ariyehufundya kwa Muhumwa-we Mweri Paulo, kwamba hukatsaakakwa, here atu masio na tamaa, kwa utu wa aryahu mariolala kahi za iye ; Naswi hu maguluni hako, hewe Baba, hunakuvoya uhufufule siswi kahi za kifwa cha dambi, ufwangize kahi za uzima wa hachi ; kwamba hundihofwerera uzima uu, hupate kuoya kahi za iye, here hukuluhirazho kwamba udzaoya ndugu yehu yuyu ; hata kahi za Kufufuka kwa atu osi siku ya musindikizo, vikale siswi kuahikizwa mbere-zo ; hupate na uhaswi uryahu, Mwanao umuhendzaye zhomu andioahasa osi makuhendzao uwe na kukogoha, aambire, Ndzooni, henwi ana muriohaswa ni Baba, muuhokere utawali muriohenderwato hangu chaho cha urumwengu : Uhugere gaga, hunakuvoya, hewe Baba wa mbazi, kwa Jesu Masihi, Munereri wehu, Mukomboli wehu. *Haami.*

**NEMA** ya Bwana wehu Jesu Masihi, na mahendzo ga Mulungu, na ungara wa Roho Mweri, vikale hamwenga naswi hosini hata kare na kare. *Haami.*

---

## MUVERA WA ATU ACHE NYUMA ZA KUZHALA.

*Yuyahu mutu muche makati-ge ga kuombola nyuma za kudzifungula, nangire Mushikitini na nguwo za to-to-to, apige mavwinda hatu hafwahaho, here ririzho*

*ada ra Mushikiti wryahu, hedu here Mwenye amulo andizholagiza : kidza yuyahu Kasisi namwambire,*

**K**WA kukala Mulungu mwenye nguvu zosi udzaona-to kwa udzo-we kukugera kudzifungula-to, na arizhokurinda kahi za zani bomu ya uzhazi; kwa utu uo umulazhire Mulungu muvera kwa moyo, unene,

*Haho Kasisi nashome Zaburi ya 116.*

*Dilexi quoniam.*

**N**AMUHENDZA Bwana : kwa kukala wasikira mumiro wangu na mavoyo gangu ;

Kwa kukala wanizanyira sikiro-re : ndosa nindamugayira siku zangu zosi za kukala moyo.

Nyugwe za kifwa zanilinga-linga, utsungu wa kuzimu wanigwira : nikiona masirinyo na kigondzi.

Ndo niri horigayira dzina ra Bwana : Nakuvoya, hewe Bwana, ritizhe roho rangu.

Bwana una udzo, una hachi : ni jeri Mulungu wehu una mbazi.

Bwana ni kuarinda ao mariogoloka mwendo wao : naregera kwa unyonge, akinokola.

Uyira raha-ro, hewe roho rangu : kwani Bwana udza-kuhendera-to zhomu.

Kwani udzaritizha roho rangu rikatsafwa : matso gangu gakatsakala na matsozi, na magulu gangu gaka-tsahereza.

Nindaenderera mbere za Bwana : kahi za-tsi za mario moyo.

Nakuluhira, ndosa nindanena : nere nikisirinywa zhomu :

Nami nikinena haraka : Anadamu osini ni alongo.

Nimulazhireni Bwana : kwa udzo-we wosi arionihendera ?

Nindakihala kiparya cha wokolwi : nindarigayira Dzina ra Bwana.

Nindagausa mahati gangu kwakwe Bwana : ni jeri mbere za atue osi.

Kahi za mihala ya nyumba ya Bwana : kahi-kahi-zo uwe, hewe Jerusalem. Mulikeni Bwana.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza, na vikara : hata kare na kare ni vizho. Haami.

*Hedu, Zaburi 127. Nisi Dominus.*

**N**YUMBA asihoiaka Bwana : aaki manasirima bule. Mudzi asihourinda Bwana : murindzi ni kuchesa bule.

Ni bule kwenu kurauka, na kukala dii mukatsakwenda oya, na kurya chakurya cha kukonyeka : kwani ndo amupazho muhendzwi-we usindzizi.

Lola, ahoho ni siiro ra Bwana : uzhalo wa ndani ni kigerwa-che.

Here mivi mukononi mwa ngumbao : ndo mario ana a uhohoni.

Baha mutu iye ariyeadzaza dhyaka-re iyo : kamandakala na haya manenaho na adui ao muviryani.

Nguma na ikale kwa Baba, na kwa Mwana : na kwa Roho Mweri ;

Here virizhokala kwandza na vikara : hata kare na kare ni vizho. Haami.

*Haho Kasisi nanene,*

*Na huvoye.*

*Bwana, ufwonere mbazi.*

*Masihi, ufwonere mbazi.*

*Bwana, ufwonere mbazi.*

**B**ABIYEHU uriye ko mulunguni, Dzina-ro na rikale ryeri. Utawalio na udze. Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha. Nawe uhuusize makosa gehu, Here siswi fwausizazho mahukosao. Nawe utsahuhirika majezoni ; Ela fwokole na mai : Kwa kukala utawali, na nguvu, na nguma, ni zhako uwe, Kare na kare. Haami.



*Padiri.* Hewe Bwana, umokole mutu muche yuyu, muhumikio ;

*Kuahika.* Akukuluhiraye uwe.

*Padiri.* Ukale kwakwe ngome iriyo na nguvu ;

*Kuahika.* Hariho na uso wa mudui-we.

*Padiri.* Bwana, sikira kuvoya kwehu.

*Kuahika.* Kugaya kwehu na kukufikire.

*Padiri.* Na huvoye.

**H**EWWE Mulungu mwenye nguvu zosi, siswi hu maguluni hako, hunakulazhira muvera kwa viryahu urizhoona-to kumokola mutu muche yuyu muhumikio, kahi za malumiro na mazani ga uzhazi garigo mabomu ; Hunakuvoya, Baba mwenye mbazi zosi, umugere kwamba, kwa kuavwizwa ni uwe, akale mukuluhirwi, na kwenenda here uhendzazho uwe, kuku kahi za uzima wa vikara ; kidza kahi za uzima udzao akale mungara wa nguma ya kare na kare ; kwa Jesu Masihi Bwana wehu. *Haami.*

*Yuyahu mutu muche adzaye kulazha muvera, ni suti alazhe Vigerwa zha ada ; kidza hakikala na Ungara, vinafwaha kwamba awhokere Ungara ueri.*

## MAONYO,

UTU-WE NI KUONYA KORO ZA MULUNGU  
MWENYE NGUVU ZOSI NA MALAMULO-GE  
DZULU ZA ENYE DAMBI,

HAMWENGA NA MAVOYO MASIKU, GAHUMIKAGO SIKU YA  
KWANDZA YA KUZIRA CHAKURYA, NA MAKATI ME-  
NGINE, HERE ANDIZHOLAGIZA YUYAHU MWENYE AMBI.

*Nyuma za Mavoyo ga Madzacha, Litania ikigoma kushomwa, kara-kara na ada ra kuzoera, yuyahu Kasisi kahi za hatu hashomwaho, hedu hatu ha kuambirizira, undanena vivi,*

**H**ENWI ndugu zangu, kahi za Kanisa ra Kare kwere kuna mautu ga kumanyisana kwa kumo-

goha Mulungu, makati ga kuaha Kuzira Chakurya, atu mariomanyikana kukala na dambi zirizokala lwazu makikanywa mbere za atu, na kuombozewa makosa kahi za urumwengu uu, kwamba maroho gao gapate kuokoka siku ya Bwana ; na kwamba atu angine, marioonywa kwa kukanywa kwao, mapate kuzidi kuhenda oga wa kukosa.

Hatu ha gago, hata kuryahu kumanyisana kurefwe kaheri, (nao ni utu wa kumalwa,) hunaona vidzo kwamba makati gaga mbere za ninwi nyosini gashomwe malamulo ga Mulungu gafwahago atu osi ga kuahukanira enye dambi masiodzyuta, nago ganaombola kahi za Chuwo cha Kukumbukiza, muryango wa mirongo miri na fungahe, na hatu hangine kahi za Maoro ; na kwamba ninwi kahi za kila neno muahike, *Haami* : Kwamba ninwi, kwa kuonywa koro bomu za Mulungu dzulu za enye dambi, mupate kuangirwa ni myoyo ya kudzyuta zhomu kwa jeri ; nanwi mupate kwenenda kwa kudzi-manyirira siku zizi za mazani ; kwa kugachimbira mai garyahu gambago ninwi kwa makanwa genu munamba ganaagirwa ni hukaniro ra Mulungu.

**U**DZAHUKANIRWA ahendaye kizuka cha kutsonga hedu cha kuiza, kwamba akihase.

*Aryahu atu mandaahika na kunena,*  
Haami.

*Padiri.* Udzahukanirwa amuhukaniraye babaye hedu mameye.

*Kuahika.* Haami.

*Padiri.* Udzahukanirwa atsuhaye muhaka wa mwandziwe.

*Kuahika.* Haami.

*Padiri.* Udzahukanirwa amuangamizaye mutsowi wa matso kwa kumukoseza ngira.

*Kuahika.* Haami.

*Padiri.* Udzahukanirwa aronongaye lamulo ra mujeni, na ra mwana kia na ra muche gungu.

*Kuahika.* Haami.

*Padiri.* Udzahukanirwa amupigaye mwandziwe kwa njama.

*Kuahika.* Haami.

*Padiri.* Udzahukanirwa alalaye na mukaza mwandziwe.

*Kuahika.* Haami.

*Padiri.* Udzahukanirwa ahokeraye fungu ra kumwala-mutu asiye makosa.

*Kuahika.* Haami.

*Padiri.* Udzahukanirwa amukuluhiraye mudamu, na kumuhala mudamu kukala nde chimbiri-ro-ye, na kumuricha Bwana moyoni mwakwe.

*Kuahika.* Haami.

*Padiri.* Madzahukanirwa masio na mbazi, na azindzi na mahalao akaza atu, na enye kidzitso, na mahasao vizuka, na maryao lwambo, na arevi, na ahoki.

*Kuahika.* Haami.

*Padiri.*

**H**AYA bai kwa kukala manahukanirwa ao osi makosao na kulaa kahi za malagizo ga Mulungu kwenda tanga-tanga, (here mwambirizi Daudi arizho chodherwa); siswi kwa viryahu hukumbukirazho lamulo ra kuogosha rilewalewaro dzulu ya vitswa zhehu, naro siku zosi ri-to kuhugwerera, na humuuyire Bwana Mulungu wehu, na kudzyuta kosi na myoyo ya kudzi-tsereza; kwa kuuririra na kuulombolera mwendo wehu wa dambi, na kwa kuahikiza na kusema lwazu makosa gehu, na kwa kumala kuzhala ndude zagirwezo ni kudzyuta. Kwa kukala vikara tsoka ridzaikwa masinani ha mihi, hata kula muhi usiozhala ndude mbidzo ni kutemwa na kutsufwa mohoni. Ni utu wa kuogosha kugwa mikononi mwa Mulungu ariye moyo: undaanyesera vula enye dambi, mihambo na moho na kibiriti, na peho na luvuto: ndo rindirokala fungu rao marinwe. Kwani lolani, Bwana udzire kulaa hatu-he kurihiza uwi wa ao matoao dzulu ya-tsi. Ela ni hani aadimaye

kuvumirira siku ya kudza-kwe? Ni hani andiyeadima kuvumirira andihoombola? Lungo-lwe lu mukononi mwakwe, naye undatsusa sana muhala-we: undaikundzumanya nganu-ye mo lutsagani, ela zho vitsu undavitsoma na moho usiozimika. Siku ya Bwana inadza here mwivi usiku: na haho atu mandihonena, Dheri, vitu zhosi vi-to, ndo wonongeki wa kimoho-moho undaadzirira, here utsungu umudzirirao mutu muhe ariye na mimba, nao kamandatiya. Ndo koro za Mulungu zindihoombola siku ya kudzirihiza, ambazo enye dambi mario anyeti madzadzikiira kwa unyeti wa myoyo yao; ao mariovudhya udzo wa Mulungu na uvumirizi-we na kutsukula-kwe, arihoaiha siku zosi kudza kudzyuta. Ndo mandihonigayira, (anena Bwana) ela sindasikira; mandanimala kimbere-mbere, ela kamandanona; na gago ni kwa kukala mazira umanyi, makatsahokera kumogoha Bwana, ela makimena ojanu rangu, makinivudhya kukanya kwangu. Ndo haho kamandapata kubisha kwa kuchererwa, na muryango undakala udzasindikwa; mandachererwa kuririra mbazi haho gandihokala makati ga hukumu. A! mumiro wa kuogosha wa maamulo ga hachi zhomu, gandigonenwa dzulu zao, haho mandihoambirwa, Endani, ninwi mudziohukanirwa, kahi za moho wa kare na kare, mariohenderwa-to Shetani na malaikae. Bai, ndugu, na hudzimanyirire kimbere-mbere, siku ya wokolwi mbere kaidzangwe kugoma; kwa kukala usiku unadza, asihoadima mutu kuhenda kazi. Ela siswi hukalaho na mulangaza, na huukuluhire uryahu mulangaza, na kwenenda here ahoho a mulangaza; kwamba husi-tsufwe kahi za kiza cha-ndze, hariho na kurira na kuhafuna meno. Husiuvudhye udzo wa Mulungu, afwihaye kwa mbazi hupate kuhendwa-to, naye kwa mbazi-ze zisizo na musindikizo unalaga kuhuusiza gago garigokira, hukimuuyira kwa myoyo idziyotimira ya ujeri. Kwani dambi zehu zingahokala tune here bendera zindahendwa nyaruhe here thaluji; nazo zingahokala do, zindakala

here nyoga nyaruhe. Galukani, anena Bwana, muriche uwi wenu wosi, kidza dambi zenu kazindamuangamiza : gatsuheni kure nanwi mai genu gosi murigogahenda : Dzihendereni myoyo misha na maroho masha : Hambe munahendza kufwa, henwi nyumba ya Isiraeli? nami sifwahirwa na kifo cha iye afwaye, anena Bwana Mulungu. Galukani bai, nanwi mundakala moyo. Hungahokala hudzakosa ela huna Muvoyeri kwa Baba, Jesu Masihi mubachi; naye ndeye sadaka ya dambi zehu. Kwani wahendwa maranga kwa utu wa makosa gehu, wapigwa kwa utu wa uwi wehu. Bai na humuuyire, iye nde ahokeraye kwa mbazi enye dambi osi madzyutao kwa jeri; hudzipe myoyo kwa kumanya kwamba yu-to kuhuhokera, unahendza sana kuhuusiza dambi hukimue-ndera kwa kudzyuta na kukuluhira; hukidziika tsini-ye na kwenda hangu vikara kahi za ngira-ze; hukidzihika gogo-re rangwangu na muzigo-we usioremerera, na kumutuwa kwa kudzitserereza na kuvumirira na kuhe-ndzana, na kulagizwa kwa kutawalwa ni Roho-re Mweri; hukimala siku zosi apewe nguma, na kumuhumikira here zhagirwezho kahi za kazi zehu hamwenga na kulazha muvera: Hukihenda vivi, Masihi undahutizha kahi za kuhukanirwa kwa wagirwi, na kahi za kulahizwa kwa nguvu kundikoapata ao mandioikwa luhande lwa mukono wa kumotso; naye undafwika luhande lwa mukono wa kurya, undahupa kuhaswa kwa Babaye, kwa kuhulagiza kuhala utawali-we wa nguma: Na aone-to kufwangiza mumo siswi hosini, kwa utu wa mbazi-ze zisizogoma. Haami.

*Haho na mapige mavwindi osi, na yuyahu Kasisi na aryahu Aavwizi makale manapiga mavwindi hatu madzi-hozoera kushoma Litanja, makashome Zaburi ii:*

*Miserere mei, Deus. Zaburi 51.*

**N**ONERA mbazi, hewe Mulungu, kwa mwero wa mahendzo-go: kwa mwero wa unji wa mbazi-zo mbidzo gahanguse makosa gangu.

Niogesa-to kahi za uwi wangu: unitsuse kahi za dambi yangu.

Kwani nagamanya makosa gangu: na dambi yangu i mbere zangu siku zosi.

Dzulu-zo uwe, uwe hakeyo nidzahenda dambi, nidzahenda garigo mai matsoni hako: upate kukala na hachi unenaho, ukale mweri ualamulaho.

Lola, nazhalwa kahi za uwi: na mama wanitsukula mimba kahi za dambi.

Lola, unamala ujeri kahi za ndani: kidza hatu hariho-fitswa undanimanyisa ikili.

Nitsusa kwa esobu, nami nindakala mutsuki: niogesa, nami nindakala mwaruhe kukira thaluji.

Nihendya nisikire fwahiro na kuererwa: kwamba misoza uriyoibunda ifwahirwe.

Fitsa usoo na dambi zangu: ugahanguse mai gangu gosi.

Niumbira moyo mutsuki, hewe Mulungu: unihendere lusha roho ririro kara-kara ndani yangu.

Sinitsuhe kure nawe: siniusize Roho-ro Mweri.

Uniudzize fwahiro ra wokolwio: unitsetseze kwa roho ririro-to.

Ndo nindihoafundya akosa ngira-zo: na enye dambi mandakuuyira.

Nitizha na milatso, hewe Mulungu, uwe uriye Mulungu wa wokolwi wangu: na lurimi lwangu lundaimba ga hachi-yo.

Hewe Bwana, gunula milomo yangu: na kanwa kangu kandaomboza nguma-yo.

Kwa kukala kufwahirwa na sadaka, hedu ninga-kugera: kuna radi na sadaka irungurayo.

Sadaka za Mulungu ni roho ridzirovundzika: moyo udzirovundzika na kuakakwa, hewe Mulungu, kundau-vudhya.

Ihendere Sayuni vidzo kwa viryahu uonazho-to: uake nyao za Jerusalem.

Ndo undihofwahirwa na sadaka za hachi, na sadaka

ya kurungura na sadaka nzima ya kurungura : ndo mandiholazha ng'ombe dzulu za kiza-cho.

Nguma na ikale kwa Baba, na kwa Mwana : na kwa Roho Mweri ;

*Kuahika.* Here virizhokala kwandza, na vikara : hata kare na kare ni vizho. Haami.

Bwana, fwonere mbazi.

*Masihi, fwonere mbazi.*

Bwana, fwonere mbazi.

**B**ABIYEHU uriye ko mulunguni, Dzina-ro na rikale ryeri, Utawalio na udze, Mahendzo-go na gahendeke kuku-tsi, here gahendekazho ko mulunguni. Hupe rero chakurya chehu cha kuhutosha ; Nawe uhuusize makosa gehu, Here siswi fwausizazho mahukosao ; Nawe utsahuhirika majezoni, Ela fwokole na mai. Haami.

*Padiri.* Hewe Bwana, aokole ahumikio ;

*Kuahika.* Makukuluhirao uwe.

*Padiri.* Arehere wavwizi ulaa dzulu.

*Kuahika.* Uachinge kwa nguvu kare na kare.

*Padiri.* Fwavwize, hewe Mulungu Mokoli wehu.

*Kuahika.* Nawe kwa utu wa nguma ya Dzina-ro ufwokole ; fwonere mbazi siswi enye dambi, kwa utu wa Dzina-ro.

*Padiri.* Hewe Bwana, sikira kuvoya kwehu.

*Kuahika.* Kiriro chehu na kikufikire.

*Padiri.* Na huvoye.

**H**EW E Bwana, hunakuvoya zhomu, usikire kwa mbazi mavoyo gehu, nawe uarichire osi masemao dambi zao mbere-zo ; kwamba ao madzisemao myoyoni mwao kukala mana dambi, mapate kuusizwa ; kwa Masihi Bwana wehu. *Haami.*

**H**EW E Mulungu mwenye nguvu zosi, Baba wa mbazi, uaoneraye mbazi anadamu osi, nawe kuvizira urizhomba hata kimwenga ; kwendzi kifwa cha mwenye

dambi, ela unaona ni baha ariche dambi-ye, na kuokoka : Kwa mbazi-zo uhuusize makosa gehu ; uhuhokere na kuhuhuriza siswi hudzioakakwa na kutsoka kwa utu wa mizigo ya dambi zehu. Ndiwe siku zosi mwenye mbazi ; ndiwe hakeyo uusaye dambi. Huusize bai, Bwana mudzo, ausize atuo urioakombola ; sangire kahi za maneno na ahumikio, mario mitsanga minyonge, akia enye dambi ; ela ugaluze koro-zo kure naswi, husemao kwa kudzitsereza uwi wehu, na kudzyuta jeri makosa gehu, kidza ufwavwize haraka kahi za urumwengu uu, kwamba hukale moyo hamwenga nawe kare na kare kahi za urumwengu udzao ; kwa Jesu Masihi Bwana wehu. *Haami.*

*Ndo haho atu ni kunena gaga gatuwago, nyuma-ze yuyahu Padiri.*

**U**HUGALUZE, hewe Bwana, naswi hundagaluka. Ukale radi, hewe Bwana, Ukale radi na atuo, Magalukao kwako kwa kurira na kuzira chakurya, na kuvoya. Kwa kukala uwe ndiwe Mulungu wa mbazi, Wedzere huruma, muvumirizi, na mwenye mbazi zhomu. Uwe ni kuhuusiza haho fwagirweho ni kupigwa, Na kahi za koro-zo unakumbukira mbazi. Ausize atuo, Bwana mudzo, Ausize, siuriche ufwao kuangalala. Husikire, hewe Bwana, kwa kukala mbazi-zo ni bomu. Na kwa mwero wa mbazi-zo uhulole ; Kwa utu wa udzo-we na uneneri-we Mwanao ahadzwaye-to, Jesu Masihi Bwana wehu. *Haami.*

*Ndo haho Padiri ni kunena hakeye,*

**B**WANA nahuhase, na kuhurinda ; Bwana nahuanulire mulungaza wa uso-we dzulu zehu, na kuhugera dheri, vikara na hata kare na kare. *Haami.*